

**NATIONAL ASSEMBLY OF  
SEYCHELLES**

*Wednesday 15<sup>th</sup> March, 2023*

*The Assembly met at 9am*

*National Anthem*

*Moment of Reflection*

*Mr Deputy Speaker in the Chair*

**MR DEPUTY SPEAKER**

Bonzour tou Manm Onorab. E bonzour tou manm piblik ki pe swiv Lasanble Nasyonal nenport landrwa kot zot ete pou sa Merkrede le 15 Mars.

Ozordi Lasanble i rebran e apartir ozordi ziska Vandredi le 17 *item* prensipal lo nou *Order Paper* i pou repons tou bann MNAs lo mesaz Prezidan lo Leta Lanasyon ki ti delivre Vandredi pase.

Avan nou fer sa koman parti *Communication from the Chair* ozordi nou a rapel poudir le 13 Mars i Lazournen *Commonwealth*. E parey i tradisyon tou-le-z-an i annan mesaz sorti kot *Head of The Commonwealth* ki nou Lasanble i lir. Donk mon pou pas lo mesaz *His Majesty the King Charles the III* pou sa lokazyon.

*‘Commonwealth Day was an occasion of particular pride for my beloved Mother, The late Queen – a treasured opportunity to celebrate our Commonwealth family, to whose service she dedicated her long and remarkable life.*

*In succeeding Her Majesty as Head of the Commonwealth, I draw great strength from her example, together with all that I have learnt from the extraordinary people I have met, throughout the Commonwealth over so many years.*

*The Commonwealth has been a constant in my own life, and yet its diversity continues to amaze and inspire me. Its near-boundless potential as a force for good in the world demands our highest ambition; its sheer scale challenges us to unite and be bold.*

*This week marks the tenth anniversary of the Charter of the Commonwealth, which gives expression to our defining values – peace and justice; tolerance, respect and solidarity. Care for our environment, and for the most vulnerable among us.*

*These are not simply ideals. In each lies an imperative to act, and to make a practical difference in the lives of the 2.6*

*billion people who call the Commonwealth home.*

*Whether on climate change and biodiversity loss, youth opportunity and education, global health, or economic co-operation, the Commonwealth can play an indispensable role in the most pressing issues of our time. Ours is an association not just of shared values, but of common purpose and joint action.*

*In this we are blessed with the ingenuity and imagination of a third of the world's population, including one and a half billion people under the age of thirty. Our shared humanity contains such precious diversity and thought, culture, tradition and experience. By listening to each other, we will find so many of the solutions that we seek.*

*This extraordinary potential which we hold in common, is more than equal to the challenges we face. It offers us unparalleled strength not merely to face the future, but to build it. Here, the Commonwealth has an incredible opportunity, and responsibility to create a genuinely durable future – one that offers the kind of prosperity that is in harmony with nature and that will also secure our*

*unique and only planet for generations to come.*

*The myriad connections between our nations have sustained and enriched us for more than 7 decades. Our commitment to peace, progress and opportunity will sustain us for many more.*

*Let ours be a Commonwealth that not only stands together but strives together, in restless and practical pursuit of the global common good.'*

Lafen sitasyon. Mesaz Lerwa Charles III pou komemorasyon Commonwealth Day ki ti le 13 Mars.

E alor prezan nou pou pas lo bann repons pou diskour Leta Lanasyon, mesaz Prezidan lo Leta Lanasyon ki ti Vandredi pase. E zisteman koman nou pou koz lo Prezidan ozordi son lanniverser. Mon asire ki lo lapar Lasanble Nasyonal nou kapab anvoy swe meyer ve pou son lanniverser pou Leta pou Sef Legzekitiv Prezidan Larepublik.

Mon ava prezan pas laparol avek Leader Lopozisyon pou son repons lo Leta Lanasyon.

### **HON SEBASTIEN PILLAY**

Mersi Mr Speaker. E bonzour tou koleg Onorab e byensir

bonzour spesyal pou tou bann frer ek ser Seselwa ki pe ekout nou.

Semenn pase Prezidan Ramkalawan ti fer son trwazyenm diskour lo Leta nou Nasyon e ozordi nou Lasanble i komans reponn sa diskour. Responsabilite pou demar bann repons pou diskour Prezidan i tonm lo mwan. Sa i en privelez, en devwar enportan ki mon annan. Fotespere sa ki mon annan pou dir pa *spoil* laniverser personn.

Fransman apre ki mon'n ekout li pou sa plis ki 2erdtan ki in koze, konklizyon ki mon'n kapab tire se ki si sa Prezidan ek sa Gouvernman ki la i kontinyen fer parey zot pe fer nou pou fini dan en presipis. Kontan, pa kontan me sa Gouvernman pe *fail* nou pep.

Mon'n osi realize ki en move zouvriye toultan i blanm son zouti.

**(APPLAUSE)**

**HON SEBASTIEN PILLAY**

*Sorry* pou koz koumsa, me diskour Prezidan lo Leta nou Nasyon in en lanbarasman total. Dan plas koz lo Leta nou Nasyon ankor enn fwa Prezidan i vin menas bann travayer Seselwa. Eski sa i normal?

I kler ki son pandil politik in de balanse e son sel opsyon se al fer kanpanny dan nou 26 distrik apre ki pandan sa 2an edmi personn pa'n tann li e i pa'n pare pou ekout personn.

Senserman mon pa konnen ki sa msye ti pe mazine. Sa ki in fer devan sa Lasanble e sa ki in dir i montre nou ki Prezidan pa konnen kisisa Leta nou Nasyon, i dekonekte avek la realite. Pa zis sa, me sa ki nou'n tande semenn pase i montre en lenkonpetans serye lo lapar Gouvernman pou diriz nou pei.

I pa etonn mwan alor, ler mon vwar mon bann frer ek ser lo lot kote latap pres pou pa konnen kan pou bat lanmen. Menm en *standing ovation* pou debout apre ki in fini koze, safwasi zot pa'n kapab fer.

*No wonder* personn pa'n vin deor Lasanble avek plakar pou kriy “Viv nou Prezidan,” safwasi.

**(APPLAUSE)**

**HON SEBASTIEN PILLAY**

E la mon bezwen dir Seselwa i vwar zot dan gran kler, zot pe *fail* nou pep e zot pe *fail* nou pei. Olye etal en plan lo ki direksyon pei pou pran, kote nou ete avek redinamiz nou Sekter Lapes, ki plan nou annan pou ranforsi

nou Sekter Agrikol, ki mannyer nou pou *tackle* pri lavi. Problem dan Minister Lasante.

Bann size ki tous labaz Leta nou Nasyon ozordi, Prezidan i vin eksplik nou son fristrasyon, i vin tir lakoler lo travayer Seselwa. I dir nou pep i fristre e li osi i fristre. I vin donn nou en leson dan lemosyon. Be nou pa psikolog nou. Lasanble pa en landrwa kot nou resevwar pasyan pou eksplik son problem psikolojik ou mantal.

I dir nou i annan sabotaz, trenn lipye, menm prizonnyen ek *ex-solda* ki pe fer vini zarm. Be konmsi annou serye nou en pe ! Me foutou ler ou annan levidans sa bann keksoz eski ou vin dir an piblik oubyen eski ou pran aksyon? Sa i iresponsab. Kwa ki anpes sa bann ki pe fer sa bann tel aksyon si i annan pou kasyet prezan?

Prezan, ler i Prezidan Larepiblik ki vin dir nou sa an piblik, lekel ki pou pran aksyon prezan, nou oubyen li? Aret zwe avek sekirite nou pei. Mwan mon dir ki sa i en lot lagrenn bat latet. En lese par en Gouvernman ki pe *fail* pou tir latansyon lo son lenkonpetans. Se sa Leta nou Nasyon ozordi - lenkonpetans Gouvernman ki pe fer dimoun fristre e ankoler.

Parey mon'n toultan dir, en Prezidan i devret konnen kwa ki vre Leta son Nasyon. I bezwen donn lenspirasyon e ankouraz son pep. I pa kapab konplent e koz lo fristrasyon konmsi pa li ditou ki *State House* e pa li ditou ki ti demann Seselwa an 2020 pou vot pou li. Ki sa zafer vin koz sa ki'n pase 3an pase?

Lo sabotaz, lo met bonm dan stasyon petrol. Eski sa fek arive lannen pase? Pa ou'n sipoze kondann bann ki'n fer sa? Koz lo sa ki pe arive ozordi dan nou pei, kote nou pe ale. Ou pe zis relev lanmor reken parey ou'n toultan fer ler ou koz lo sa 43an.

Mon pa kapab konpran ler ou dir nou ou ti kapab pe pas letan avek ou pti zanan lo lans, sa i byen. Be konmsi serten faver ki ou pe fer nou *State House*? Kestyon se akfer ou ti demann dimoun pou vot pou ou? Si ou pa anvi sa responsabilite e sa travay, si i tro difisil *do the honorable thing, step down* e les en lot dimoun fer !

**(APPLAUSE)**

**HON SEBASTIEN PILLAY**

Sesel i dan en pake problem avek sa kalite *leadership*. Ziska kan ki zot pou sey kasyet

inefikasite mank direksyon ki'n vin routin sa Gouvernman?

Nenk zot fer promes, me selman pa kapab delivre. Problenm pa avek sa bann travayer ki anba, problenm i avek sa ki anler lo *top*. Si anler latet pa bon ki ou ekspekte anba fer? Mazinen ou'n pas letan vwayaze (selman ou, ou al for Lerop ek bann pei Arab e Vis-Prezidan i al plito Lafrik) kote ou pou ganny letan *monitor* sa ki pe pase?

La lot fwa menm Sesel i en *high income country*, ki ou'n al fer *Qatar* dan *meeting low-income countries*?

**(APPLAUSE)**

**HON SEBASTIEN PILLAY**

Pa en gaspiyaz larzan piblik sa? Nou ti'n kapab aste dra pou met lopital avek sa larzan. Ou pou Prezidan Sesel ki pou met rikord mondyal pou *travel*.

Laverite Seselwa la deor pa satisfè avek *way* ou bann Sef dan ou Gouvernman sanmenm zot fristre, sanmenm zot pe konplent, sanmenm zot lo *Facebook*. Kantmenm serten ou bann Minis pa kontan e la mon tandè i annan ki'n menm al fer *CID investigate* serten travayer ki pe konplent.

Si zot ti pe fer travay formidab parey ou pe dir,

dimoun pa ti pou fristre. O kontrè sa pep pa santi ki Gouvernman i dan son kote e ou dan plas adres fristrasyon lepep ou vin donn li lanmen fristre.

Ou konnen enner nou tro koze, ou konplent pep i fristre, selman ou menm ou, ou ensilte lentelizans sa pep par dir ki sa bann kestyon ki ti ganny donner dan sitwayennte i annan Seselwa ti pou *fail*. Be ou'n gete konbyen Seselwa ki'n fini *top* dan bann gro legzanmen enternasyonal?

Aret mank respe pou sa pep. Lannen pase ou ti dir ki etranze i travay plis ki nou e Seselwa i pares, sa lannen nou lipye i lo fren. Konmsi ou donn nou 2 grad, nou pares e nou... mon pa pou dir sa lot mo. Prezan ou a rode akoz nou fristre.

Me si ozordi ou pe konplent sa sabotaz dormi lo *file*, trenn lipye komanter lo *Facebook*. Lekel ki'n ankouraz travayer Seselwa e travayer Sekter Piblik pou sabotaz bann Gouvernman *SPPF*, *US* e Lepep dan lepase?

Si dimoun pe dormi lo *file* ozordi se sa ki ou'n montre zot fer. Si zot pa pe *return call* se sa ki ou'n montre zot fer, lekel ki ti ankouraz zot donn tou lenformasyon ki pe pase dan zot

Minister oubyen departman anndan dan Lasanble? Lekel ki ti bloke pou pa donn nouvo Gouvernman *US* bann Minis ki ti bezwen?

E Onorab Gervais Henrie ozordi ki dan Chair, ti deza admet sa isi dan sa Lasanble. Lekel ki ti rod tou leskiz pou anpes Minis Adam prezant plan *Master Plan* lo lopital? Lalis sa bann kalite sabotaz i long, e lekel ki ti servi *Facebook* pou atak tou son oponan politik? E menm admet anba *Oath* Ankour ki in deza annan *fake profile*.

**(APPLAUSE)**

**HON SEBASTIEN PILLAY**

Prezidan si ou bann Minis pa oule dir ou, si ou bann *MNA* pa oule dir ou, si oule konn sours fristrasyon sa pep, si oule konn sours ou prop fristrasyon, rod en laglas e get ladan.

**(APPLAUSE)**

**HON SEBASTIEN PILLAY**

*United Seychelles* i met lo rikord ki sa kalite *SONA* napa plas dan en demokrasi ki pe evolue. I pa montre respe e i pa fer zistis sa pep ki'n elekte sa Prezidan la. Seselwa i travay dir pou batir sa

pei. Nou pa pares e nou pa... parey mon'n dir taler.

Kestyon Lepep Seselwa, i ziska kan ki nou pou kontinyen aksepte sa kalite medyokrite e lensilt pou nou lentelizans? Pou reponn sa nou tou nou bezwen fer refleksyon serye.

Alors pou sa rezon ozordi bomaten mwan mon bezwen pa zis donn Lepep Seselwa en repons *SONA* me fer e vre ladres lo Leta nou Nasyon. En keksoz ki Prezidan in *fail* konpletman pou fer Vandredi.

**(APPLAUSE)**

**HON SEBASTIEN PILLAY**

Pou komanse i enportan pou fer sa pep konpran ki mannyer ou Gouvernman ki'n vin o pouvwar atraver bat latet ozordi pe fer tou pou sey anbet Seselwa ankor.

Ou dir nou Seselwa i fristre aköz sabotaz e trenn lipye pa siporter *US* ki pa pe travay dan Gouvernman. Me sa i en mansonz, en mansonz kategorik aköz si *US* ti ankor annan sa ta siporter ki travay dan Gouvernman, zanmen nou ti pou dan Lopozisyon.

**(APPLAUSE)**

**HON SEBASTIEN PILLAY**

Dir nou konbyen nouvo *PS*, *DG*, Direkter, *DA*, *CEO* ki ou'n apwente, konbyen ki *US*? Ou vwar sa bann kalite *statement* irresponsab i anmenn divizyon e diskord dan nou pei.

Ler *CEO STC* ki ou'n apwente i dir avek zournal Nasyon le 4 Mars zot pe al revwar zot lafors travayer, e sa pou vedir plis ki 200 Seselwa ki travay *STC* i kapab perdi louvraz, eski se *US* ki responsab? Sanmenm ou pe dir nou ou pou pous bann ki pe trenn lipye. Zot in fini fer zot plan e pe sey zistifye ki pou arrive.

Akoz ou pa plito rode kwa ki pe anpes Gouvernman performen? Pa siporter *US* ki pe trenn lipye, se ou Gouvernman ki enkonpetan, se ou Gouvernman ki pa oule ekout bann *MNA*, menm zot prop *MNA*. Se ou Gouvernman ki pa oule ekout piblik. Seselwa i fristre avek ou e ou Gouvernman. E apre son semenn answit zot a taye pou vin fer *damage control*.

Ler ou vin sant nou "Sesel pour tou son zanfan", eksetera e ou'n gard dimoun dan pozisyon, ou pa'n pous zot eksetera, isi lo sa kote latab nou fristre, nou ankoler akoz ou pa

pe dir laverite. Nou fatigue tann mansonz.

Sa ki nou konnen se ki ou'n pous en bann dimoun tre konpetan dan sa Gouvernman, oubyen ou'n kre kondisyon pou zot ale. Bokou avek tre bon kalifikasyon e menm *Masters*. Ozordi i annan bokou pa kapab ganny en dyob akoz tou dimoun i per pou anploy zot, menas ki ou Gouvernman in fer.

Vwala en lot rezon akoz keksoz pa pe marse dan sa pei. Vandredi ti fer ou trwazyenm *SONA* devan Lasanble e i paret ou'n bliye ki ou'n fer plizyer sanzman dan bann Minister e departman e lantrepriz piblik.

Ou'n apwent en bann nouvo dimoun *the buck stops with you*. Aret vin fer krwar i annan sabotaz, aret vin koz lo sa ki oule destabiliz pei. Si ou konnen pran aksyon. E si ou anvii pous tou *US*, pouse. Nou a desann kot Lorloz e nou a fer ou konnen ki sa nou lafors !

**(APPLAUSE)**

**HON SEBASTIEN PILLAY**

Prezidan, Prezidan, ou *Cabinet* pa pe performen. Ou Gouvernman pa pe performen. Sey blanm siporter *US*, pa pou sanz lefe ki ou pa pe kapab diriz nou pei parey ou ti promet.

Prezan pou adres fristrasyon Gouvernman pe al fer 26 *meeting* dan 26 distrik. Ki sa pou ou al tat delo?

Konmsi i paret mwan ou pe kopi lo sa ki Prezidan Michel ti fer an 2008, ou bezwen ou'n vwar en liv kekpar. Problem, problem ennler nou tro koze, premye kou ou ti dir pa ekrir ou, ekrir Minis. La ozordi ou dir nou ou bezwen anvoy let kot Minis.

Savedir ni ou taktik pa reponn let pa'n marse e ni ou taktik fer Minis reponn let pa'n marse. Ou pa'n anvi ekoute, nou ti dir ou nou. E lala rezilta. E la aprezan mon dir ou, arete anvoy let kot dimoun pe konplent Minis kot sa Minis li menm. Akoz viktimizasyon i arive dan Gouvernman apre akoz sa. 26 *meeting* dan 26 distrik pa pou adres lefe ki bann dimoun in fini perdi konfyans dan ou Gouvernman. Zot pa kapab pran desizyon e ler zot pran desizyon zot donn nou en verson apre fer en lot keksoz. Sa enn ki zot dir nou zot pa fer, zot fer en lot. Zis parey ou'n fer pandan sa 43an.

Annou regard logmantasyon saler, Minis Hassan ti vin devwale dan Lasanble ki tou dimoun pou ganny 10poursan. Apel byen ki *US* ti dir Seselwa, sa pou vin en

kabri dan sak. Minis pa ti vin fer bann demagozi apiye par mazorite *LDS*?

Pli bon logmantasyon nou ti dir, be dir nou eski tou dimoun pou gannyen sa 10poursan la? Konbyen pou reste le *tax* pou fini pran sa ki pou li, eksplik nou la. Par lo la ki nou pe vwar? E nou konnen i annan let pe sirkile dan bann *middle management* antrepriz piblik ki pe dir ki *PEMC* in dir ki 10poursan pou aplik zis pou bann travayer pli ba. E bann *middle management* pou ganny 5poursan e bann pli o pou ganny 3poursan. Oli 10poursan pou tou dimoun?

Sa logmantasyon saler parey tou desizyon sa Gouvernman *LDS* in vin en nespes konfizyon. En parti mansonz e en parti egzazasyon. E la mon soke ler ou dir ek Sekter Prive fer parey. Be kwa ki Sekter Prive pou fer parey? Eski i pou donn 10poursan, eski i pou donn 5poursan, oubyen eski i pou donn 3poursan? Aret bat latet Seselwa !

**(APPLAUSE)**

**HON SEBASTIEN PILLAY**

Pou sa *graduate* ki dan *middle management* dan serten lantrepriz piblik *PEMC*, *Public*



*Enterprise Monitoring Commission* ki anba kontrol Minis Finans e *State House* in fini dir, ou pa pe gannyen sa 10poursan. Eski se *US* ki kontrole *PEMC*? Oubyen se *State House* ki deside?

I osi enteresan ler ou pe dir avek Sekter Prive fer parey, me selman ou annan antite Gouvernman ki zot *Board* in deside pa pou donner 10poursan. Me *charity starts at home*. Si ou pa kapab fer en antite Gouvernman fer sa ki ou devret fer, ki mannyer ou kapab al demann Sekter Prive fer parey?

Depi 2020 Seselwa pe esper zot sakouy pye, i paret i annan detrwa boug i asiz anler dan pye zot manz tou mang apre zot larg tou leyo lo nou anba.

**(APPLAUSE)**

### **HON SEBASTIEN PILLAY**

Pye i sakouye li, fey sek i tonbe ek leyo i tonbe, me mang pa tonm ditou. Sanmenm sa met larzan dan pos Seselwa e nou a demande aköz dimoun i fristre.

En lot legzanp se trezyenm mwan saler. *US* i reste ferm ki trezyenm mwan saler i en *entitlement*. Lannen pase Gouvernman *LDS* in fer en nespes boulders avek sa, zot in

vini fer gro lebra, zot ki pou dir ki pou fer, apre zot in fer *about turn* lo la.

Nou ti menm ganny *ban* koz lo la dan Lasanble, mon ti ganny met deur. Apre Speaker i a vin koz mon travay dan linite. Mwan mon pe koz lo lapar Seselwa, zot met mwan deur? Apre ki zot fer? Pas par deryer pou sey rod larzan pou donn *IOT* pou pey trezyenm mwan saler.

Li Speaker i protez Gouvernman, mwan mon ava aksepte. Listwar in prouve ki mwan mon ti annan rezon. Me sa ki malere dan serten sirkonstans, menm en travayer ki ti sipoze ganny son 100poursan pa'n gannyen e dan serten ka zot in ganny peye 50poursan e lot 50poursan zot konnen ki in ganny dir?

*The other 50percent* in ganny donner koman en *bonus*. Sa ler sa ti son 100poursan trezyenm mwan. Tousala in ganny fer anba *watch* Gouvernman *LDS*. Prezan nou a demande aköz ki dimoun i fristre?

Seselwa i annan rezon fristre, e vre Leta nou Nasyon i se ki nou pep i seryezman dezapwente avek performans Gouvernman *LDS*, e performans Prezidan Ramkalawan li menm. E en

gran parti sa i akòz sa kalite politik ki ou ek ou parti in anmennen dan Lopoziyon.

E ozordi ler ou dan Gouvernman ou pe rekòlte sa ki ou'n senmen. En dra pres pou pa kapab donnen dan lopital. Pri lavi, ou fer en *SONA* ni en mo ou pa dir lo pri lavi. (Pa grense lot kote mon pa ankor fini) Pri lavi ki a la baz lakoler pep Seselwa ozordi. Pri lavi Sesel ki pe pet plafon. I paret ou Gouvernman pa anvi fer naryen akòz ou ek ou Minis ou'n dir sa se lenvansyon politisyen.

Be sa fanmir ki pa kapab pey *bill* kouran sa mwan akòz zot in bite avek repeyman *loan*, eski sa lenvansyon lekel sa? In ler pou arete zwe avek soufrans sa pep. La i paret *STC* i lo son prop misyon personnel li, en nouvo *Board* ki ou ou'n apwente pa pe fer naryen, *Management* ki ou'n apwente pa fer naryen.

E sa bann meyer *middlemen* ki ou ti promet dan kanpany eleksyon nou pa ankor kapab vwar. Yer selman nou ti oule ferm *STC*, yer ou ti *boycott* e dir ki i devret fer vini zis bann komodite esansyel. Ozordi anba ou *watch* (konmsi Onorab Henrie), *STC* i ouver ziska farmasi. Selman ou fer monte dipen pou pey pou latizann dan farmasi pou soutir

serten fer konpetisyon ek Sekter Prive. Sanmenm sa ki apel en bon plan pou Sesel.

**(APPLAUSE)**

**HON SEBASTIEN PILLAY**

E la apre ki dimoun in konplent ou *SONA*, mon'n dan Lasanble mon'n fer 13 repons pou premye fwa mon'n tann en *SONA* kot en Prezidan pa'n kapab dir naryen lo Leta nou Nasyon. Fransman.

**(APPLAUSE)**

**HON SEBASTIEN PILLAY**

Nou tande Lendi swar *STC* pe al fer desann pri komodite kan, kan pe al fer desann? 2024. Be zot o aret pran Seselwa pou, zot be sa pa en bat latet? 2024 pa lavey eleksyon? Sa i apel pran Seselwa pou boufon.

Antretan ki pou arive, *STC* a kontinyen degorz nou. Gouvernman a kontinyen tir avek malere, dipen in fini vin pli ser li. Zot, zot a *enjoy*, zot a *travel*, zot a vin pas dimyel obor nou labous an 2024 apre 2025 nou a bwar en pe vineg apre. Koze bann kozer, oli bann ki ti dir fer politik ek resours Leta, napa ankor? Oli bann ki ti blanm *SPPF*? Sanmenm ki apel fer pli byen sa. Mwan mon dir sanmenm ki apel *fail* sa pep.

**(APPLAUSE)**

**HON SEBASTIEN PILLAY**

Sa lenkonsistans dan parol, dan aksyon, dan sa ki nou dir, nou vwar li partou. E se sa ki kontribye dan nou fristrasyon. Regard *SEYPEC*. *SEYPEC* in fer 40 milyon mon krwar Dolar profi, selman Kreol in kabannen anba sa pri *fuel*. Prezidan pa koz lo la ditou li. Loto pou serten Sesel i mars lo *enough*, me sa pou bann ki pli mizer pou bann ki annan zot pa bezwen aköz zot servi avyon. Sa pri *fuel* in anmenn bokou soufrans pou en kantite dimoun. Seselwa pa zis fristre, Seselwa pardonn mon langaz Mr Speaker, Seselwa i araze.

**(APPLAUSE)**

**HON SEBASTIEN PILLAY**

Seselwa pa pe zis demande ki aksyon i ganny pran. Selman pandan plizyer lannen par Prezidan ki la, in dekri *SEYPEC* konman en fardo lo lepep. Ki'n fer Seselwa pey son bann gro lenvestisman dan *Tanker* pou benefisyè serten Sef. Ozordi zot menm ki pe dir *tanker* in profitab, zot in fer \$40milyon. Be ki ou kapab konpran? Ou sanz *tune* konmsi manrmay.

Antretan pri *fuel* ti monte, pri servis e pri lavi Sesel ti monte. E la mon oule dir *IMF* ti donn Sesel larzan pou soulaz pri lavi, ki zot in fer avek zot in met dan kof? Oubyen pa dir nou zot in servi pou *travel* avek? Mon bann frer ek ser, nou pe glise e Leta nou Nasyon ozordi ki bokou Seselwa i dan problem e ler ou dan problem Gouvernman pa konn ou. Bokou zot in vwar ler zot in rankontre difikilte napa okenn sipor. Larzan ki nou Lasanble ti vote pou met dan Bidze pou ed zot atraver *ASP* pe ganny rasyonnen. Konbyen zot ki'n bezwen vir an ron ler zot al *Ocean Gate House*.

Eski se siporter *US* ki ansarz *ASP*? Lekel ki'n apwent sa *Management* pa Prezidan li menm. E ler Lazans ti dir ki lannen pase ki in depans zis R8 milyon pe apros lafen lannen. Larzan ti pe fer lekonomi lo malere? Naryen zot pa dir lo la.

*What about* sa 40poursan lapovrete ki zot servi koman zot seval batay, nepli annan lapovrete Sesel? Se Prezidan pa koz ditou lo pti lavi, ditou lo lapovrete. Dan en *SONA*.

Semenn pase nou ti selebre Lazournen bann Madanm, eski Prezidan in rode konbyen manman tousel ki pe *struggle* pou fer de bout zwenn,

ki pa'n vwar okenn laport ouver pou zot?

Sa mank konpasyon in osi evidan ler nou pa tann Prezidan koz ditou lo nou bann dimoun aze. Nou fek fer revizyon dan Lalwa Pansyon. Si Sesel i kot i ete ozordi gras a nou bann dimoun aze ki'n travay e sakrifye pou kree kondisyon pou ki nou kapab zwir sa lavi ki nou annan ozordi. Fodre ki Gouvernman i vin fran, adres problem ki nou bann dimoun aze pe fer fas avek. I deplorab pou tande ki dimoun aze pe ganny fristre akoz zot in ganny dir ki Lalwa in pase zot pa kapab ganny Sekirite Sosyal 63an. Sa ki pa konn fer son louvraz ale. Lala kot problem i ete.

**(APPLAUSE)**

**HON SEBASTIEN PILLAY**

E Lalwa pa nou ki ti sanze, *LDS* ki ti sanze.

E la mon dir ek Prezidan komitman ferm ki mon pe donn nou bann dimoun aze, aret trenn ou lipye. Lenflasyon, move servis pe fer ki nou bann vyeyar pe ganny difikilte pou viv en lavi an dinyite. In ler pou donn en logmantasyon dan pansyon retret, sa napa okenn diskisyon lo la. E si zot pa

kapab fer li an 2025 en Gouvernman *US* a fer li.

Se sa problem sa Gouvernman *LDS* ozordi, zot pa kapab pran desizyon. Legzanp tipik resaman zot fer en regilasyon pou bann pti bato, Seselwa i mont lo rezo sosyal i konplent, zot taye zot *repeal* apre *repeal* zot fer *meeting* piblik, apre manman *meeting* *State House* pou deside ki mannyer pou fer. Vwala mannyer zot fer konsiltasyon *a la LDS*.

Ler ou fini *repeal* ou al fer *meeting* pou konsilte, ou pas Lalwa, ou fer pas dan nouvel. Ou kre en pake tapaz apre ou tire ou dir fer *meeting*.

Sa kalite inefikasite e mank e direksyon kler i annan en lenpak direk lo tou sekter nou pei. Ozordi Sekter Prive pe fer fas avek bokou defi zisteman akoz sa mank *leadership* ki egziste. La ou nepli tann diversifikasyon lekonomi, oli bat kannel, oli lavannir ou pa konnen ki pe arive avek.

Dan Sekter Lapes nou kareman fer tou sa ki bann Eropeen i oule. Pourtan nou annan en Minis ki li i ti dir li i pou al negosye avek bann Eropeen. Ozordi koman en Eropeen i dir *jump*, i dir *how high Master?*

**(APPLAUSE)**

**HON SEBASTIEN PILLAY**

Mon *remind* li, doker pe rod li e maren peser pe rod li.

Pli pir ankor ozordi Gouvernman pe antre an konpetisyon direk avek Sekter Prive. La mon tande *PMC* pe *tender* pou aste son prop kanmiyon *sewage*. Sa pou annan en lenpak direk lo bann Sekter Prive ki *provide* sa servis.

Selman Gouvernman *US* ti donn zot en langazman ki li i pa pou fer sa, me sa pa ti ase nou ti anvi sanzman, get kot sanzman in anmenn nou. *STC* in fer farmasi, Gouvernman i oule kontrol tou keksoz. *US* ti les bann servis eksklizivman avek Sekter Prive me i paret sa pa ti bon pou nou. Nou ti anvi sanzman parey mon'n dir.

Partou kot ou pase ozordi Gouvernman i oule antre an konpetisyon direk avek Sekter Prive. Apre ou a rode aköz dimoun i fristre. I difisil pou konpran, lo en lot kote Gouvernman i dir nou Sekter Prive ki moter nou lekonomi. Me selman lo en lot kote i fer konpetisyon ek li.

De zour an zour ou fer li fer fas avek plis birokrasi lenterferans. Bann ki pli pti e depan lo kontra Gouvernman i

travay plis pou mwens, me *still* bezwen pey trezyenm mwan saler, par lao zot ganny peye tar. Bann ki pli gran i fristre aköz zot bezwen pas atraver bokou *red tape*. Bokou ki bezwen travayer *GOP* i vir an ron e Gouvernman pa konnen ki pou fer aköz sistenm en politik *boycott* travayer etranze ki Prezidan ek son parti in anmennen par lepase.

Sa pe fer Gouvernman ezite pou vin ek en Polisi kler. Selman ozordi son Gouvernman pe rod tou *Gurkhas* e etranze pou travay dan Lapolis e kot prizon. Gouvernman i oule anmas plis *tax*, pres R9bilyon, ki mannyer ou pou anmas larzan *tax* si ou pou trangle biznes? Sa kalite politik pou fors bokou biznes retourn kot labank e andet zot lekor.

Lo en lot kote aköz ou pe sey donn egzanpsyon serten biznes e ou sanz Polisi *Tax* 2.5poursan lo 25milyon pou li vin 2.5 lo 100milyon?

Konbyen lakonpanyen ki'n fer sa kalite *turnover*? Aret anbet nou. En bann pou peye, en bann nou pe fer faver pour zot. Parey nou tande oule *write-off tax* ki serten ou bann dalon i dwa. En bann desizyon ki reprezant en mank respe total pou Lasanble ki ti aprouv sa

bann mezir *tax*. Personn pa'n vin devan nou pou dir sa pe sanze. Se sa ki Speaker Lasanble apel travay ansanm.

I kler ki Sesel pe glise. Sa ki pli ris pe vin pli ris, pli gro par gato pe ganny partaze antre dalon. La mon tandè serten *CEO* son garaz menm ki aranz transpor serten lakonpanyen e probableman serten Lotorite pli o dan Sesel.

Antretan sa ki pli mizer i vin pli mizer e byento menm bann ki *US*, *SPPF*, Lepep, ti fer zot grenp leskalye sosyoekonomik, kot zot in devlope, zot pou desann. Sa R9.2bilyon ki Gouvènmàn pe ranmase la pou anmas lo zot ledò. Se sa rezilta sanzman ki zot ti pe rode. I annan nou pa ankò konpran ki pe pase Sesel. *SPPF*, Lepep, *US* ti fer tou pou anmenn bokou Seselwa dan klas mwayenn.

Bokou Seselwa dan klas mwayenn, sa ki'n kapab ganny zot prop biznes, zot prop lakaz, sa ki'n kapab ganny zot prop transpor. E bokou zot in al dan *motorcade* ek sa bann transpor. Fotespere zot satisfè avèk sa sanzman ki zot ti pe rode.

Gouvènmàn pou anmas R9.2bilyon pou peye ki *STC* i a fer desann pri marsandiz an 2024 avan eleksyon. Ou a pey pou ou pri, ou a pey pou fer

desann pri lavi. Se sa politik Gouvènmàn *LDS*. Pran ek sa ki napa donn ek sa ki annan.

Mr Speaker, set alor ki Prezidan i bezwen realize ki se sa kalite sityasyon dan sa pei ki pe kontribye pou fer Seselwa fristre e vin blanm *US*, kantmenm nou pa dan Gouvènmàn pa pou sanz larealite Sesel ozordi.

Prezidan i menm vwar en lot Legzekitiv, i vwar nanm en lot Gouvènmàn ki dapre li pe diriz pei. Be ki mannyer nou kapab konpran sa. Manke sanmenm sa nanm ki i dir nou i sorti dan Kordgard Glacis, ki mon prezimen in mont *State House*. Manke sanmenm ki pe fatig li.

Petet sa i ava eksplik serten *statement* ki'n ganny fer. Par egzanp mon pa kapab ganny en konpran ler ou dir ou pe al fer en nouvo lopital selman ozordi ou pe ganny dir kot lopital vin ek ou prop dra. Latizann nou napa. I annan mankman serye latizann ki pe enpakte sirtou lo nou bann paysan dyabet e tansyon. Zot pe ekout mon la deor.

Mon'n vizit plizyer fanmir a kote Prezidan Parti *US* Dr Patrick Herminie, en vre *leader*. Depi Mont Buxton, Bel Air, Baie Lazare, Takamaka, Au Cap.

**(APPLAUSE)**

**HON SEBASTIEN PILLAY**

Wi sa boug i al partou kantmenm ou maltret li i ale, kantmenm ou lager ek li i fer.

Nou'n rankontre bokou fanmir ki aflize par lafason ki zot pros in ganny trete lopital. Dir mwan pa vre. Zot prop siporter in konplent. I annan *MNA* i tenny telefonn ler sa bann dimoun ti pe *call*. Solisyon Gouvernman se al fer en nouvo lopital *ok*. Be Prezidan dir nou, sa nouvo lopital pa sanmenm ki ti lo *Master Plan Lopital US?*

Prezan regarde ki manner zot napa en vizyon. Pou sa nouvo lopital ganny fer fodre *SBC* i sorti dan Hermitage. Pou *SBC* sorti dan Hermitage fodre i al dan *SBC House*. Pou li al dan *SBC House* fodre i ganny plis larzan pou li sorti.

Lannen pase *CEO SBC* ti vin la i ti konplent Minister Finans pa pe donn li larzan pou sorti. Sa plan lopital la mon krwar in fek ganny deside apre ki zot in vwar dimoun pe konplent. Zot oule mars lo en plan *US* me zot pa konnen ki manner pou enplimante.

E ler zot dir nou ti napa plan, zot vwar nou, nou ti annan plan, fer *SBC House*, bouz *SBC*, bouz

ladministrasyon *and then* fer en lopital.

Antretan latizann a kontinyen manke, dra a kontinyen napa. Eski in demande ki pou travay dan sa nouvo lopital? Kote nou pou ganny sa bann spesyalis si nou bann spesyalis Seselwa ozordi pe kit nou e anvi ale. E la mon pe koz spesyalis Seselwa tre konpetan ki'n kit nou.

Nou bann *nurse*, nou bann dokter ki pe esper en sours direksyon kot menm mon tande i annan serten *MNA* in al dir ki nou Minis pou Lasante i tro vye. Pa mwan ki'n dir, *MNA LDS* ki'n dir sa. Tousala pe ariv anba ou *watch*. Pou pran parol Onorab Henrie. Se zot ki responsab. *Anyway*, dapre ou, ou *Cabinet* antye pe performen.

Problenm anba ou *watch* i bokou Prezidan. I annan en gran malez ki egziste. E dan nou pei ozordi sa pe rapidman anmenn nou pou perdi kontrol en kantite keksoz. Konbyen *video* nou pou vwar sirkile lo rezo sosyal ki pe montre bagar antre bann dimoun dan kominote?

Konbyen dimoun ki'n komet swisid depi ou'n vin o pouvwar. Les mwan rapel ou ki ou prop Minis, Minis Fonseka dan sa Lasanble ti dir ki sa pa en size irzan, kan tou statistik

ti montre ki sa en size serye. I en fe ozordi lakantite krim i paret in ogmante me nou pe kasyet.

La i fer ou trwazyenm *SONA* e en mo ou napa pou dir lo kriminalite? La sityasyon drog dan Sesel in vin pli pir. E lo en kote mon pou blanm ou Gouvernman ek ou politik *LDS*. Akoz ou direkteman e endirekteman par deryer frenm de Lazans ki lit kont drog. *NDEA* e *ANB*.

Ser, frer Lepep Seselwa, stratezi Gouvernman *LDS* sa ki konsern sityasyon drog dan nou pei in *fail*. Lakantite dimoun ki lo bann *hard drugs* in ogmante, la kantite adikt in ogmante. E malgre en pake *statement* Gouvernman i pli *tough* lo en boug ki fim en *joint* mariwana, zot pran sa pov zwer zot met li lopital pou 2an, be apre zot donn pardon bann boug ki'n ganny tyonbo pou trafik drog. Se sa ki apel en Polisi kler.

Ler nou kestyonn Gouvernman lo son lefikasite zis parey sa zafer lor Malgas kot nou pa konnen ki'n arive Gouvernman i refize koz laverite. Prezan i dir nou lasezi drog i laba konbyen dan 3mil met. Be kwa nou pou pran boutey gas pou al gete si drog i dan 3mil met?

I pa ti pou responsab pou anmenn sa drog ater pou nou vwar. Pou montre in tyonbo? E ler i koz ou lo sa lasezi mil ekek tonn drog ki'n koz lo la, mil ekek kilo sa i annan pou fer avek *La Reunion* e Moris. Konmsi? Nou osi nou ekout medya, nou osi nou swiv ki pe pase.

Prezan *ok* drog i dan 3mil met, be oli bann trafiker ki'n ganny tyonbo sa bann dimoun dan sa bato, zot in ganny large oubyen zot osi zot dan 3mil met?

Akoz pa ti negosye lesanz sa bann dimoun avek nou dimoun ki'n swadizan pri laba deor, laba Iran? I enteresan sa pep Seselwa i enportan pou zot konpran sa byen. I annan en letan lo zournal *Le Seychellois* toulezour ti annan portre nou 3 frer ki Lezip, toulezour sa. Nou tyonbo Ezipsyen nou large, Prezidan ti promet pou li al re negosye pou fer nou bann frer retourn Sesel pou vin fer fini zot santans, ziska ozordi naryen. Naryen pa ankor ganny fer. E ler nou dir li i oule ankoler e i a rode akoz nou fristre.

Resaman dan sa program fer par *BBC* kot enn nou frer Seselwa in rakont son parkour nou'n vwar ki mannyer sa problem pe ronz nou sosyete. Nou nepli annan en



program rezidansyel parey sa ki ti ed sa garson. E la mon dezapwente avek ou Prezidan, i pa korek sa ki ou dir. *APDAR* ti'n fini negosye atraver Gouvernman *UAE* pou ganny en vilaz reabilitasyon. Onorab Georges i konn tre byen, nou ti asiste prezantasyon nou. Nou ti lo *Board APDAR* nou tou lede.

Se ou avek ou tim dan Lasanble apre 2015 ki ti fer en problemn personnel ek Dr Herminie. Mon pa konnen ki ou per sa msye. Prezidan *US* ozordi i vin en problemn nasyonal e ou ti *torpedo* sa program.

*UAE* ti'n dakor pou sponsor en vilaz reabilitasyon e tretman. Kan saler si ou ti'n les bann Lazans fer zot travay, aret presyonn Gouvernman, ozordi nou ti ava annan bann program rezidansyel ki'n ed bann adikt parey sa enn ki'n ed sa garson. Konbyen lavi nou ti'n kapab sove?

Sa proze prezan ti sipoze fer *Bonne Espoir* e Gouvernman *US* ti'n fini dakor, Lepep Seselwa ti a kontan konnen ki plan Gouvernman *LDS* avek *Bonne Espoir*. Seselwa in not ankor enn fwa ki ou'n vin koz lo bann *dealers* dan bann distrik. Mon kontan ler zot koz lo bann *dealers* mwan.

I fer dezyenm fwa ou vin fer bann tel *statement*, premye

fwa ou ti dir ki ou konn zot e ou pou koz ek zot. Nou pa'n zanmen ganny rezilta ou bann konversasyon. Selman ou vin dir nou ou konnen ki serten lezot *leaders* i al koze ek droger Corgat Estate.

Be ou vin dir nou ki ou ti koze ek sa bann ki ou'n al koz avek. Ou'n al koz ek *dealers* nou pa konnen ki ou'n dir zot. Sa ki nou konnen selman ou dir nou ou konnen kot bann *dealers* i ete.

E i drol sa. Ler ou nonmen ou konnen kote zot sipoze ete, kestyon ki bokou Seselwa pe demande, be si ou konnen savedir ou annan kek levidans, me si ou annan levidans akoz ou pa pran aksyon? Be si non mon bezwen dir sa *statement* ki ou'n fer i iresponsab.

Akoz si i annan bann *dealer* ki reste dan sa bann landrwa zot in fini konnen la ki zot pe ganny *investigate*. Komite Defans i devret pran en pozisyon serye lo la! Ou pa kapab kontinyen vin fer bann *statement* ki *jeopardize* bann lenvestigasyon nasyonal.

Me si napa levidans e i pa vre ou pe vyol preteks e i en prensip nou Konstitisyon. Sa bann dimoun i inosan *until proven guilty*. E ou pe zis met en target lo zot ledò dan zot

kominote. Koumsa en Prezidan i sipoze akt?

Mon bann frer ek ser, i kler Prezidan Ramkalawan ek son Gouvernman pa pe kapab adres sa bann problem ki pe afekte Leta nou Nasyon ozordi. Gouvernman *LDS* is *intellectually spent* !

**(APPLAUSE)**

### **HON SEBASTIEN PILLAY**

Malerezman. Demaraz ti korvet an 2015 me finisyon i kartye maron an 2020. Se sa ki pe arive.

In pik tro boner, e sa pake vatevyen lo en bann size pe fer li en pake ditor. Zot ki *run border*, mwan mon krwar zot pe *ruin border*, napa okenn linisyativ.

Ler ou vwar en *SONA* pa angaz lazenes ditou, lazenes ki nou fitir, pa angaz zot ditou e sey rod fason pou anmenn zot *onboard* pou *set* en nouvo direksyon pei ki ou ekspekte? Dan nou ladres Prezidan i kritik nou bann zenn, sa bann ki ti pe dans endesan. Be tou zenn Seselwa ti lo *stage* pe dans endesan? Pa tou zenn Seselwa ki ti lo *stage* pe dans endesan.

Ok. Eski ou pou *ban* sa bann *show* prezan Prezidan? Dir nou. Konman *leaders* nou devret konnen ki mannyer pou

reakte avek bann tandans modern. Selman i drol, sa bann danse i endesan selman ou Gouvernman ti oule legaliz *sex toys*. Enteresan sa Seselwa. Doub standar.

Se sa ki fer mwan doute si Gouvernman i konnen kot i pe ale. I annan tro bokou mankman - mankman ki avan Oktob 2020 pa ti egziste. I paret ki *LDS* in bliye ler ou pran bef ou osi pran son korn e ou pran tou sa ki vin avek. Me selman dile ou pa tire avek *park*, ou tir ek sa bef. Ozordi *LDS* pe tir dile ek sa *park*.

Oubyen si ou'n bliye mwan fer ou rapel sa enn. Mon krwar bann Manm ki ti dan sizyenm Lasanble e Lepep Seselwa pou rapel sa enn mannyer ou ti dekrir Mr Faure sa letan oubyen ou ti dekrir bann Gouvernman *US*?

Sa i en zafer *pizza* i ron dan laform en serk, me i vin dan en bwat kare e ou servi li dan proporsyon triyang. Ou prop parol i retournen pou fer sa ki senp e fasil, fasil. Me pli enportan fer tou pou pa konplik lavi bann ki depan lo ou desizyon. Se sa ki sa proverb i vedit.

Bann eleman tre senp ki ler ou pe diriz en pei ki ou bezwen met antet e ler ou fer *SONA* ou bezwen koz lo la. Se sa

ki enportan. Dil ek problemn dan en fason e letan rezonnab.

Ou pa kapab pou *validate* e sertifika kot SQA i pran pres 3, 4 semenn. Ou Gouvernman pa ankor kapab fer naryen par egzanp pou bann fermye ki'n ganny afekte dan movetan lannen pase.

Zot pa ankor met an plas en sistenm sipor pou fermye, mon pa ankor tande. Si lasirans pa pou marse ki zot pou fer? La IDC pe al dan prodiksyon, eski pou annan en lenpak lo zot? Store lagrikiltir napa lagrenn. E menm sa ki annan i pa lo standar ki serten fermye i annan lo son store. Apre ou a dir mwan sa i en SONA? *No wonder* ti napa *standing ovation*.

Pou bann zenn oli ou plan? Pou bann ki'n pran zot letid o serye, la mon'n tande e mon a ganny korize si mon mal, bann zenn Avoka pou bezwen al pey R150mil pou pas zot BAR. Pran en *loan* avek lentera 4poursan, si mon mal dir mwan. Oli plan pou bann *returning graduates*? Kote zot pe vini? konbyen pe retournen? Ki sekter ou pe al met zot? Ki kontribisyon zot pou fer?

Se sa bann keksoz ki ou devret vin koz lo la dan en SONA. Non pa rode konbyen Legzekitiv i annan. Nou tou nou

kapab dir ou i annan zis enn e aret veye ki dimoun i dir lo *Facebook* akoz Seselwa in aprann avek ou e bann aktivis ou parti. Zot in aprann byen ki mannyer pou servi *Facebook* pou denigre e maltret kanmarad.

Annefe apre ou diskour en bon pe in reklanmen ki ou pous tou *US* dan ou Gouvernman. Prezan eski *Compol* pou al get sa bann osi? Akoz se ou ki bezwen dir *Compol* ki pou fer? Sanmenm ki ou dir ou pa enterfer? Tou keksoz i lafot *US*. Ler Prezidan fer fot *US* ki annan tor, ler Minis i fer fot *US* ki annan tor. Nou ledo i larz nou.

Ou vwar sa bann kalite *statement* iresponsab se sa ki fer nou fristre, sanmenm ki fer ki ozordi sa pei pe vin pli divize. Be sa pa devret etonn nou, akoz atraver ou aksyon ou le sel Prezidan Sesel ki'n arive fer paviyon Sesel vin en sours divizyon dan sa pei !

**(APPLAUSE)**

### **HON SEBASTIEN PILLAY**

Par ou aksyon kontinyel ou'n arive fer lafason ki nou onor Lim Nasyonal vin en sours divizyon dan sa pei !

Fodre ou aret kasyet deryer bann zoli parol e dir nou Sesel pour tou son zanfan. En

kantite travayer *US* in ganny pouse, kontra pa ganny renouvle, e bokou in ganny *warning* akoz zot afilyasyon politik.

Sa lannen mon pou annan detrwa *PNQ* pou serten Minis ki'n pous serten travayer zot departman, dir zot espere zot pe vini zot, zot a eksplik mwan akoz serten in ganny let *termination* e serten pa pe gannyen. Parmi sa bann Minis pou annan Minis Ledikasyon e detrwa lezot ankor.

Sa bann *statement* ki Prezidan in fer Vandredi pou zis kontribye pou ki nou bann frer ek ser i ganny viktimize. E si ou pa oule nou desann kot Lorloz pa viktimiz personn. Leta nou Nasyon ozordi i ki menm nou bann Drwa Konstitisyonnèl pa pe ganny respekte.

Zot, lamazorite *DA* pa *US* i fran. Konbyen *PS* ki *US*? Aret blanm nou, aret blanm trenn lipye. Linefikasite i sorti en lot landrwa e si ou pa pare pou adres li sed laplas!

Problenm i avek sa *leadership* ki pa konnen ki manner pou diriz nou pei. E an 2025 Seselwa pou montre son mekontantman par elekte en lot Gouvernman ki kapab travay.

**(APPLAUSE)**

### **HON SEBASTIEN PILLAY**

Annou pa konmans anmenn en nespes *apartheid* politik dan sa pei. E la mon vwar i drol Speaker Lasanble in asize, li ki *Chairman SADC PF* i pe *condone* en *witch hunt* ki pe al ganny fer dan Gouvernman, pou retir tou siporter ki pa siport Gouvernman.

Aret vyol Drwa Konstitisyonnèl sa pep. E la mon bann frer ek ser in komans vin en pratik sa Gouvernman *LDS* ki nou Drwa lekspresyon, nou Drwa lasosyasyon. Sa in vin en problenm pou sa msye anler *State House*. Li ki ti promet pou protez tou nou bann Drwa Konstitisyonnèl. Li i grense ler Seselwa i servi bann menm Drwa ki i ti servi pou eksplik son lekor. Si Seselwa i servi *Facebook* pou kritike, tir zot fristrasyon e dir nenport kwa i gras a politik ki *LDS* in anmenn depi 2015. Mwan mon fatigue ganny maltrete! Prezidan *US* i fatigue ganny maltrete, ou pa tann nou konplent. Nou pa al rod *CID* pou aret dimoun e fer lafouy kot dimoun.

Maltrete ti *ok* ler nou pe rod pouvwar, me pa *ok* ler nou dir kote Gouvernman pe al mal. Sesel ozordi i kontrole par en sel dimoun. Li menm ki a latet Legzekitiv, li menm ki dir

Lasanble ki pou fer e i paret li menm ki dir Zidisyer ki pou fer. Sa se Prezidan Larepiblik !

Lamazorite Lenstitisyon Leta i per pou koze e larealite, vre Leta nou Nasyon i ki nou pe viv en demokrasi siperfisyel. Tou pei i les bann diferan akter politik eksprim zot, Sesel medya sosyal i sibir presyon ler sa i arive. Medya nasyonal i sibir presyon ler sa i arive.

Moris tanzantan i annan *live Press Conference*. Nou isi sa i ganny *ban*. Akoz sa imsyé pa kontan si ou kritike. La get sa byen, zot sey manipul lopinyon piblik lo sa ki pase lo en *case* Ankour. En stasyon televizyon i raport en fason e lot i raport dan en fason.

Be eski i etonn nou dimoun pou al lo *Facebook* prezan? Dan plas rode ki mannyer pou anmenn plis linite nou'n tann en *SONA* ki diviz nou ankor plis, met Seselwa dan de kan. Enteresan sa, met Seselwa dan en de kan.

Vandredi nou'n kareman tann Prezidan dir sa ki ek nou e sa ki pa ek nou. Vreman fer lapenn. Sanmenm sa ki apel manz bannann e apre anvoy ou lapo lo mwan sa. Lalis fristrasyon dan sa pei i tro long e lalis problemn ankor pli long.

*State House* i kontinyen fer desizyon san konsilte dan

lentere *State House*. Ennler zot menm lager antre zot, tousala nou'n konnen, la nou tande en gro lenvestisman pa lwen, pre laba dan *marine park* pe ganny met *on-hold* akoz i paret lanmen drwat pe bat lanmen gos.

Lenformasyon konfidansyel lenvestisman envestiser i ganny *leak*. Sanmenm *foreign direct investment* pe tarde antre, e Prezidan pa koz lo la ditou. Kot in mansyonn sa dan son *SONA*? Akoz lenvestiser pa kapab met konfyans dan en Gouvernman ki sanz son *tune* de zour o landmen.

Mon al en pti pe pli lwen ankor. Sa latitid pa konsistan pe menm fer konsernen bann donater ki souvandfwa ede avek bann program lanvironnman. Zot osi zot konsernen. Dan Sizyenm Lasanble ou ti demann ek Gouvernman pou *ban* tou rado, *ban* tou *fad*. *Ban fad*. Ou vin dan Gouvernman, ou annan pouvwar pou *ban fad* ki ou fer? Ou ale ou vot ek Linyon Eropeen pou anpes en *ban* kont *fad*. Ki nou kapab konpran?

**(APPLAUSE)**

**HON SEBASTIEN PILLAY**

Kontinyen lager antre zot, apre zot a kriy sabotaz. Kontinyen pran faver e blanm trenn lipye.

*Look*, pa *US* ki responsab sa zafer Mr St Ange la en, annou ganny sa byen i enportan pou nou met sa o kler la. Sa zafer Mr St Ange ti vin apre 2015.

*LDS* ti antre dan Gouvernman e i ti oule montre en leson Mr St Ange ki ti'n kit zot. Maligansman ti komanse pou fer ki Gouvernman i retir son sipor pou kandidatir Mr St Ange e sa ti ariv dan sa Lasanble. Nou a rod *verbatim* e sa i ava prouve.

Me selman Prezidan pa dir nou poudir dan lepase osi bann Gouvernman par egzanp ler ti pey pou konpansasyon pou le 3 Oktob, li osi i ti ganny peye. Ennler nou bezwen admet en realite. Tro bokou letan sa pei in sibir en politik negativ e ozordi i tonm lo nou lo sa kote latap pou sey re *set* pandil politik nou pei a ler.

Akoz nou'n ganny met en pake retar, sa manni kraze, pile, *boycott* in komans avek ou Prezidan. Ozordi i *ok* pou ou monte, desann kot Arab, yer ou ti kriye *SPPF*, *Lepep*, *US* pe vann nou ek Arab.

Ozordi ou vini ou koz for lo bann proze ki *UAE*, *Qatar*, *Saudi Arabia* pe *sponsor*. Be ou ki ou pe donner an retour, nou pa konnen. Bonne Espoir manke ou'n donner mon pa

konnen. Proze Marina Grand Police dir nou.

Prezan ler ou dir nou *UAE* pe al donn en *MRI* be oli sa R50milyon ki sa Lasanble ti vote pou en *MRI*? Zot pa rapel sa? Ennler pa dir mon sa osi pe ganny servi pou *travel* avek.

Prezan yer ou ti atak *IDC*, Glenny Savy pa krwar ki ete, zot in maltret sa boug napa ki zot pa'n ganny dir lo sa msye. Be ozordi ki ou'n realize ki sa boug ti konnen ki i pe fer lo nou bann zil. E la ou nepli konnen ki pou dir ou pe menm al fer proze kanmaron lo zil ek Mr Glenny Savy. Ki nou kapab konpran?

Yer ou ti kont tou konblaz, *boycott*. Ozordi selman ou'n ganny konblaz pou donn biznes later e pou fer lakaz.

Ozordi ou nepli koz lo kado anpwazonnen ler ou al rod led avek nou bann pei zanmi pou vin fer ou 3mil lakaz oubyen pou fer sa nouvo lopital ki oule.

Ozordi personn pa dir fouy lo Antonov ler i vini? Ozordi personn pa al gete si napa bann fiy ki debarke dan avyon prive? Zot in arete koz lo la? *Hmm*. Si mon ti annan en lagonm pou sak fwa Prezidan ek son parti ti *boycott* sa ki *US*, *SPPF* ti fer Sesel ti pou pli mizer ozordi e i ti pou napa naryen lo la e ni en riban ti pou napa pou koupe.

Prezidan i bezwen fer fas avek realite, se ki i pou tre difisil pou rekonesans e menm respe dan lespri Seselwa sirtou bann ki'n ganny enfliyanse par li menm. Nou rapel *speech* lo Mrs Twomey, sa ki in dir lo Arab, lo Lasin mon'n deza koz lo la?

Malerezman bokou parol in ganny dir pou fer ditor lezot akoz nou ti laswaf pouvwar. Ozordi nou pe realize ki Prezidan Rene in fer bokou dibyen pou peil! Ozordi se lo konblaz ki Msye Rene in fer ki nou pe al fer lakaz. Yer ou ti kritik Prezidan Michel me ozordi pe promot bann menm stratezi ki li i ti servi.

Ou osi ou pe fer larout Mwayenn Oriyan. Yer ou ti kritik Mr Faure ozordi ou felisit li pou ganny apwente isi laba. Eski ti nesese anmenn sa kantite lanmertim parmi nou pep? Me i paret ou avek parti pa ankor aprann en leson avek lepase akoz ou pe fer menm keksoz ozordi.

Ler ou dir nou ou pou soumet rapor *TRNUC* avek Lasanble. Anr... la nou anvi soumet rapor *TRNUC* ek Lasanble? Pandan 2an nou pa konnen ki pe pase, la oule soumet rapor ek nou? Oubyen oule tir presyon pran desizyon lo ou? An tou leka mwan sa ki mon pe gete, 2025 nou pou

annan en lot *TRNUC* dan sa pei.

Nou remarke de zour an zour Prezidan ek son Gouvernman in antre dan *public relations mode* la. Sa pa devret etonn nou akoz apre sa *SONA* ki in fer, sa katastrof. E apre sa Konferans Madanm *US* ki'n sok li in napa swa. In *call* partou e dir zafer i sal i bezwen konmans bouze.

Yer mon'n vwar li pe donn *wheelchair* bann zanfan avek serten dezabilite, byen. Akoz i pa ti fer depi avan? Tou sa letan akoz in pran pou fer? Menm nou, nou pa krwar sa bann zes i senser. Ou konnen akoz nou pa krwar i senser, akoz i vin apre ki ler dimoun pe reakte.

Mon mesaz pou Lepep Seselwa ozordi i kler, *US* i determinen pou tras en nouvo sapit pou Sesel. Nou vizyon se pou en Sesel pli ini e pli rezilyan. *US* pe propoz avek Seselwa en Sesel kot enn fwa pour tou Gouvernman i fer sa ki i sipoze fer e aret enterfer partou.

Nou bezwen en Sesel kot keksoz ki pli enportan se ki ou travay dir e delivre. Nou bezwen en Sesel ki ganny konstri lo en prensip kre loportinite e kondisyon pou devlopman imen. Nou napa letan pou lezot konsiderasyon apard ki travay

dir e remet sa pei lo en semen progre.

Lepase in donn nou en ledikasyon. La aprezan nou bezwen travay e le fitir se nou ki pou determinen.

Annou ansanm pran en desizyon Lepep Seselwa. Annou pran en desizyon pou anmenn en vre transformasyon Gouvernman an 2025 e tir sa Gouvernman ki la o pouvwar ! Kot nou a met en vre Gouvernman lepep, par lepep e pour lepep e nou ava fini avek sa Gouvernman politisyen, par politisyen, pou politisyen !

An konklizyon Mr Speaker. Mon realize poudir la mon'n kapab donn bann *MNA LDS* en *SONA*. La zot a kapab fer en repons. Mersi Mr Speaker.

**(APPLAUSE)**

### **MR DEPUTY SPEAKER**

Mersi Onorab Pillay. Prosen entervenans se Dirizan Zafer Gouvernman Onorab Georges.

### **HON BERNARD GEORGES**

Mersi Mr Speaker. Mr Speaker avek Dirizan parey nou fek tandé annou pa bezwen esper 2025. Annou vote en sel fwa, vot Prezidan Ramkalawan o pouvwar ankor en kou pou ankor 5an.

**(APPLAUSE)**

### **HON BERNARD GEORGES**

Mr Speaker, Manm Onorab, tou bann dimoun ki pe ekout nou dan lakour, bonzour.

Ozordi, mon pran laparol avek en gran lazwa, en gran lafyerte, me osi avek en gran regre.

Mon fyer Mr Speaker ki mon en Seselwa ki pe viv dan pli zoli pei lemonn. Mon fyer ki mon en Manm Lasanble Nasyonal Sesel. Mon fyer ki zabitan Les Mamelles in swazir mwan pou reprezant zot lentere isi e dan nou distrik. Mon fyer ki mon en Manm *LDS*. Mon fyer ki mon parti pe diriz Sesel, e pe diriz li byen, menm tre byen. Mon fyer ki mon annan en Prezidan ki apel Wavel Ramkalawan, ki pe met Sesel lo map enternasyonal.

**(APPLAUSE)**

### **HON BERNARD GEORGES**

E isi pe devlop nou pei a en vites san presedan.

Mon fyer ler mon ekout Prezidan liste bann akonplisman son Ladministrasyon pandan sa 2an edmi ki in o pouvwar. Mon fyer ki Sesel in atenn sa nivo kot nou premye dan bokou Lendeks Devlopman e la demokrasi.



Mon fyer Mr Speaker, akoz sa lannen i pou fer 30an depi ki nou dan politik ofisyel, e mon fyer pou sa ki nou'n arive akonpli konman en parti pandan sa letan.

Mon fyer ki menm dan Lopoziyon nou ti arive fer sanzman dan sa pei. Akoz nou ti en lopoziyon responsab e konstriktif, ki ti travay dan lentere nou pei, malgre ki nou Speaker Onorab Mancienne, ti al dan prizon e dan kaso. Malgre ki Prezidan e Minis Dezinyen, ler zot ti ankor Manm sa Lasanble ti ganny kas latet par *PMU* e al reponn lapel Lopital Sesel.

Mon fyer Mr Speaker, ki Prezidan Ramkalawan in ganny kouraz Vandredi pase vin dan sa Lasanble e koz kler avek Lepep Seselwa. Kot i pa'n triy son parol e in dir keksoz mannyer keksoz i ete. Mon fyer Mr Speaker, ki mon asiz lo sa kote latab, e non pa dan sa tim ki met niform semiz *Valentine* e kravats lanterman.

**(APPLAUSE)**

**HON BERNARD GEORGES**

Me mon pa zis fyer Mr Speaker, mon osi zwaye ozordi. Mon lazwa i profon pou plizyer rezon. Mon zwaye ki nou pei, malgre son bann defi ki Prezidan in koz

lo la, i stab, pezib e in atenn en bon nivo devlopman.

Ki letan e ki Leta nou Nasyon i bon. Mon zwaye ki malgre nou diferans, nou pep i ini e napa divizyon lo baz kouler, larelizyon, oryantasyon seksyèl e pozisyon dan lasosyete. Mon zwaye ki nou Lasanble i kapab *welcome* en nouvo ansyen Manm parmi nou. E mon kontan ki Onorab Pillay bomaten in montre ki parol Prezidan lo fristrasyon ti vre. E ki sa diskour in montre vre fristrasyon dan zot kan. Tasyon Onorab ki glob i pete!

Mon rezouir ki Speaker Mancienne, Speaker pli pti Parlman dan rezyon Sid Lafrik, in ganny elekte koman Prezidan *SADC PF*. Setadir Speaker en Parlman rezyonal pou groupman *SADC*, e ki la ozordi dan sa kapasite i pe asiste renyon *International Parliamentary Union* ki pe fer *Bahrain*.

E mon rezouir pli spesyalman, Mr Speaker, ki ozordi nou Prezidan i selebre son laniverser. Lo lapar nou *Caucus* isi dan Lasanble, "*Happy Birthday Mr President!*"

**(APPLAUSE)**

**HON BERNARD GEORGES**

Ki Bondye i protez ou ozordi e pou touzour. Ki i donn ou pasyans Zob, lasazes Salomon e kouraz e rezilyans Moise.

Mon swe ozordi, se ki ou kontinyen amenn nou pei dan sa bon semen ki ou'n anbark lo la. Pou ki ler ou letan i ava fini, nou ava kapab dir "sa ti en zonn, sa ti en Prezidan !".

Me dan tou sa lazwa ek sa lafyerte Mr Speaker, i annan en nyaz nwanr, en nyaz regre. E sa se pa lot ki bann defi ki ankor devan nou konman en pep.

Si laparans siperfisyel i ki nou viv dan en paradi, e nou viv dan en paradi, serpan pa lwen. Serpan i la parmi nou. E sa serpan i pran plizyer laform. I pran laform labi lo madanm e labi lo zanfan. I pran laform labi lalkol. I pran laform en kiltir depandans ki pa ankor efase dan nou dimoun. En kiltir anpar lanmen, pares dan travay, sabotaz pou lavantaz politik, vole. E pli pir ki tou, drog.

Tou bann zoli keksoz dan nou pei, tou nou bann akonplisman konman en pep, tou nou lenfrastriktir de kalite, tousala i kapab disparet en sel kou si nou pa adres sa bann fenomenn malsen dan nou sosyete e pran en bon ka avek zot.

Me, se pa zis deor ki nou war sa bann negativite ki pe retard nou pei e ki anmar en boul avek progre ki nou pe fer. Sa fenomenn i prezan isi osi dan sa zoli Lasanble la kot nou pe asize, e se sa Mr Speaker ki fer mwan dir ki mon annan en gran regre ozordi.

Lasanble Nasyonal i en vitrin pou nou pei e pou nou Nasyon. Nou la pou donn legzanp lo fason fer, lo fason viv. Wi, nou politisyen e nou pou fer sa dan en fason politik. Sa i normal.

Wi, zot, zot dan Lopoziyon e zot pou opoze. Me i annan en fason fer tousala Mr Speaker. I annan en moman kot nou bezwen vin ansanm konman en sel Lasanble. Lo sa kote latab nou parmi sa bann sitwayen ki lev boner, ki travay dir e ki fer monte nou paviyon.

Lo lot kote i tris pou dir, zot ankor pe ankouraz sa group dimoun dan travay ki pe trenn lipye, ki pe pez fren, ki pe ogmant fristrasyon nou pep, ki oule larzan e lasistans ler zot pa oule travay. Se sa mon bann zanmi dan Lopoziyon ki zot pe reprezante ozordi.

E la ki Lasanble in reorganiz fason asize pou montre linite Lasanble an antye, ki zot fer? Zot boycott premye *Sitting* e swazir pou abiy

dan en fason ki promot diferans olye promot linite.

Olye sezi sa lokazyon pou montre ki malgre nou diferans nou ini konman en sel pep, en sel Sesel, en sel Lasanble, zot plifere mars tousel. Sa se en sours regre, akoz ansanm “ini dan nou diversite,” nou kapab akonpli plis ki sa ki sakenn nou, nou kapab fer nou tousel.

Alor Mr Speaker, nou pe viv dan en pei ki annan sa de kote. Kot Leta nou Nasyon i fantastik dan en sans, e i dan danze lo en lot kote. A la fwa nou en pei ki pe devlop vit anba *leadership* remarkab en Prezidan ki *focus* lo sa ki i pe fer. E ki avek son lekip pe transform en latitud lesefer dan enn kot nou pe devlop pli vit ki nou’n zanmen devlope.

Me osi nou en pei kot i annan sa ki pa enterese avek sa transformasyon. Ki ankor anvi viv dan lepase anba en sistenm ki’n diskredite, e kot bann nouvo lanperer pe viv atraver biznes drog lo soufrans bann ki pli feb. E fer ki nou zenn pe tonm dan en depi e kot problemm sosyal pe prolifere.

Prezidan in demann nou fer en swa. Eski nou oule viv dan lalimyer devlopman kot nou tou nou fer nou bout e nou fer avanse nou pei? Ouswa eski nou anvi retourn dan lepase kot

pei ti napa okenn direksyon, sa ki’n permet sa bann fleo sosyal prolifere?

Se sa nou swa konman en Nasyon ozordi. Deor dan pei e isi menm dan nou Lasanble. Sa ki nou’n tande Vandredi pase se pa mwan ki dir Mr Speaker. Me se bokou dimoun ki nou’n koz avek, ouswa ki’n anvoy mesaz, ou met pos lo rezo sosyal ki’n dir.

Sa ki nou’n tande Vandredi pase se en SONA diferan. Pa en diskour ki selman retras lakonplisman ek defi e fer en seri promes pou lavenir. Se pa sa, sa diskour ki Prezidan Ramkalawan in vin fer. Sa se pa stil Wavel Ramkalawan. E nou, nou konn sa tre byen.

Prezidan in vin devan Lasanble e in koz avek Lepep Seselwa dan en Kreol kler, san kas kontour, san flate, san pas dimyel lo lalev. E se sa kalite diskour ki nou pei ti bezwen la kot nou’n arive. Kot nou dan milye en term 5an. Kot lakonplisman in annan. Kot defi i ankor reste e kot sak Seselwa i ganny apele pou pran son desten dan son lanmen, pou regard devan, pou fer son bout.

Se en diskour ki *focus* pa senpleman lo lakonplisman sa Ladministrasyon, me ki osi pa

kasyet bann problem ki ankor egziste dan nou sosyete. Ki swa bann ki'n la depi bann Ladministrasyon avan e bann ki ankor egziste ozordi. Par en mank lavolonte lo lapar serten pou ed sa proses devlopman e pir, par en politik Lopozisyon ki anvi retard sa devlopman, met bar dan larou, opoze e ogmant fristrasyon pou rezon politik.

Prezidan Mr Speaker, in koz kler lo sa fenomenn. E i neser pou li fer li, i ti neser pou li fer li e pou fer li la a sa moman kot nou dan milye sa term sa Ladministrasyon. Kot tranzisyon in fini e kot nou bezwen ranforsi zefor pou amenn nou pei pli lwen e pli o ankor. E se sa ki nou pep i anvi. Se pou sa rezon ki zot in reponn sa lapel "Sesel pour tou son zanfan" dan dernyen eleksyon. Seselwa i anvi ki nou travay, san regard kouler politik pou fer avanse nou pei seri.

Si mon pe diriz 25 Manm isi dan sa Lasanble, se akoz Lepep Seselwa in ganny enspire par sa moto. Lepep ti'n fatige avek divizyon e ti anvi ki nou rekonnet nou lekor konman en sel Nasyon. Ki nou ganny rekonnet konman zanfan en sel Sesel.

Me parey Prezidan in dir, pa tou zanfan Sesel ki'n tann sa mesaz ouswa ki anvi azir

konman bon zanfan Sesel. I annan zanfan Sesel ki pa anvi ki Sesel i devlope. Les mwan fer zot rapel, parey Prezidan in fer zot rapel. Ki moto se 'Sesel pour tou son zanfan', e non pa 'Sesel pour tou son zanfan toultan, menm si zot pares, malelve, enkonpetan e fer sabotaz'. Se pa sa moto, e si sa bann zanfan i kontinyen dan sa laliny, swa dan pa delivre dan servis sivil, swa par amenn drog dan nou pei, swa pou en lot rezon, Pa kriye ler zot perdi loportinite ouswa zot ganny pini parey bann move zanfan i bezwen ganny pini.

Lo sa not Mr Speaker, permet mwan adres Manm Lopozisyon isi dan Lasanble e deor dan pei. Nou kontan zot, nou kontan zot koman nou frer ek nou ser. Zot Seselwa zot osi. Zot osi zot zanfan Sesel. Sa pei i pou zot osi. Sa Lasanble i zot lakaz osi. Me zot pa dan Gouvernman, zot dan Lopozisyon. Konpran sa byen.

**(APPLAUSE)**

### **HON BERNARD GEORGES**

Lepep Seselwa in elekte LDS pou al dan Gouvernman. Zot, Parti US zot in ariv dan Lopozisyon akoz Lepep Seselwa pa ti anvi zot. I ti'n fatige avek zot.

Zot napa okenn leson pou zot donn nou ozordi.

**(APPLAUSE)**

**HON BERNARD GEORGES**

Ni lo ki mannyer pou diriz en pei, ni lo ki kalite diskour SONA ki zot anvi tande.

Alor silvouple, konpran sa, aksepte li e sanz zot fason fer. Mon per pou zot, Mr Speaker. E la mon kapab dir mon menm tre per pou zot. Mon per ki si zot kontinyen isi dan sa Lasanble avek zot taktik *boycott* e opoz tou keksoz. Konplent lo ou ek Speaker Mancienne, siport bann ki pa anvi debrouye pou nou pei, mon per ki an 2025 si zot pa sanze nou pou vwar sa Lasanble plen zis avek Manm LDS.

**(APPLAUSE)**

**HON BERNARD GEORGES**

Alor Mr Speaker, nou annan en swa devan nou e Prezidan in met sa swa kler. Annou travay ansanm pou fer avanse nou pei, konman zanf an sel Sesel, pou ogmant larises, pou koste zepol dan lalit kont bann fleo sosyal ek bann defi ki ankor devan nou.

Annou reste diferan dan nou linite. Me annou servi nou

pep dan en fason responsab e konsyansye. Annou rezoui ansanm ler nou pei i ganny rekonnnet pou son lakonplisman. Ler nou *Chamber* i ganny renouvle. E annou redouble nou zefor pou elimin drog.

Isi dan nou Lasanble, annou viv nou diversite dan linite e aret sa bann pratik bloke, opoze e rod lager avek dirizan Lasanble. Nou lo sa kote, nou konn konport nou e nou konn travay pou nou pei. Lasanble LDS pou azir e pou apiy son Gouvernman.

Nou apel zot pou zwenn avek nou dan sa demars. Me, nou pa pou flat okenn dimoun ki pe rod latansyon parey en pti zanf an.

**(APPLAUSE)**

**HON BERNARD GEORGES**

Parey parol deor i dir Mr Speaker, nou pa pou les detrwa lagrenn reglis vin met okenn dezord dan nou bitasyon.

**(APPLAUSE)**

**HON BERNARD GEORGES**

O kontrer, nou pou sezi sa lokazyon, sa loportinite, sa laroul ki Prezidan in donn Sesel dan son diskour. E fer ki nou

amenn nou Gouvernman e nou pei pli lwen posib.

La ki nou dan milye sa term 5an ki Gouvernman e nou bann Manm Lasanble nou'n ganny elekte pou deservi Lepep Seselwa, i enportan pou nou fer en lodit lakonplisman Gouvernman Ramkalawan. I annan de fason pou regard sa ki pozitiv dan nou pei. Enn, se lo son kote devlopman striktirel, lot lo son kote sosyoekonomik.

Devlopman i bezwen pran tou lede an kont. Pa vo lapenn fer en lekol ouswa en lopital nef, si napa par egzanp ansenyan ouswa travayer lasante ki pou fer sa lekol ouswa sa lopital marse.

Lo kote devlopman fizik dan nou pei in annan en lelan enorm. Pou fini bann proze ki ti'n konmanse e ki'n ganny kit dan semen, e pou konmans sa ki pa ti'n konmanse, ouswa ki sa Gouvernman *US* pa ti'n menm mazine pou fer.

Avan ki mon al pli lwen les mwan dir Mr Speaker, ki sa parol ki Gouvernman *LDS* pe koup riban proze Gouvernman *US* i pa toutafe vre. Wi, serten proze ti'n konmanse anba Ladministrasyon presedan e i bezwen ganny fini anba sa enn. Me i annan bokou ki ti ganny promet e ki pa'n zanmen ganny akonpli, malgre Gouvernman

*US* ti annan sifizaman letan pou fer li.

Annou pa al kot Lopital La Digue ouswa kot Por Baie Ste Anne. Les mwan donn en legzanp dan mon prop distrik. Proze Prezidan Faure 24 lakaz dan 24 distrik dan 24 mwan pa'n apoz Les Mamelles sa proze. Nou'n ganny zis 8 lakaz dan sa 24. I mank nou 16, e nou pou vin rode nou 16 lakaz. Me nou konnen si nou pou esper en Gouvernman *US* vin o pouvwar pou fini nou 16 lakaz, nou pou ganny letan mor e resisite.

Alor, aret koz koup riban proze *US* silvouple. Zot ti ava fer pli byen. Servi parol ki sorti dan zot Kongre Madanm Sanmdi pase e vin devan laport zabitan Les Mamelles pou demann zot pardon pou sa bann fo promes zot Prezidan.

**(APPLAUSE)**

### **HON BERNARD GEORGES**

Par kont, dan sa 2an edmi ki Ladministrasyon Ramkalawan in o pouvwar, 6 lakaz tranzit in fini konstri e travay pe al konmanse lo renovasyon bann lakaz Dan Laplenn. E nou *day care*, plan i kot *Planning*. Konstriksyon sa fasilite pe al konmanse byento lo en morso later ki zot Parti *US* ler zot ti

ankor apel Parti Lepep ti'n *conquer*;- pa pou fer nanryen pou Les Mamelles, me pou zot prop bezwen politik. Sanmenm sa Mr Speaker, politik lagrenn reglis. Anvai bitasyon ou prosen pou ou prop benefis.

Mon pa oule fer en lalis devlopman sa dernyen 2an, Mr Speaker. Prezidan in fer sa tre byen. Mon pa bezwen mansyonn *National Library* ki pe ganny renove, ouswa batiman *Carnegie* ki li osi pe ganny repare. Pa les mwan koz lo Lenstiti Kreol ouswa Lekol Belonie ouswa *Palais de Sport* ki tousala in trennen tou sa bann lannen.

Terminal Ero e Bazar Baie Ste Anne in fini ganny mansyonnen par Prezidan alor mon pa bezwen repete. Por La Digue, Lopital La Digue e Kordgard La Digue osi mon pa bezwen koz lo la. Ni batiman *NIHSS*, ni Kordgard Baie Lazare.

Sa gro batiman ki *STC* pe fer pou *cold storage* Bois de Rose annou osi pa mansyonnen. Annou pa dir ki enn bann keksoz ki bann Ladministrasyon *US* pa'n zanmen arive fer, se fasilite stokaz pou lavyann pou ki ler en fermye i anvi vann son poul ouswa son koson, i kapab vann li e sa lavyann i ava ganny met

dan *cold store*. Olye parey fermye dan mon distrik ti bezwen fer oparavan, esper bouse pare, kontinyen donn manze zot zannimo e perdi sa pti profi ki zot ti pe espere.

Lezot proze ki mon pa pou mansyonnen osi se sant *IECD*, *desilting* bann larivyer kot ti annan *flood* oparavan. E proze lakaz dan tou kwen distrik. E sirtou pa les mwan koz lo bann proze ki ankor lo *drawing board* me ki pou ganny fer parey *Sports Arena* Anse Royale e Lopital Sesel modern. Lalis lakonplisman sa Gouvernman dan domenn lenfrastriktir Mr Speaker, i tro long.

Me annou pa koz lo tousala ozordi. Annou plito konsantre lo lezot lakonplisman. Bann ki enportan me ki pa osi evidan. Bann ki pe form sa nouvo zenerasyon ki demen pou ganny apele pou travay dan sa bann edifis ki pe ganny konstri. Mon adonn zot en legzanp. En keksoz nouvo ki sa Ladministrasyon in entrodwi se *breakfast* pou tou bann zanfan primer dan lekol Leta.

Ki mannyer ki sa ki ti la pandan 43an pa'n realize ki sa sete en lespas ki ti bezwen ganny ranpli? Ki pa tou zanfan ki ti ariv lekol avek en vant plen bomaten. Ki sa ki pa ti'n ganny

en *breakfast* konvenab pa ti kapab konsantre dan letid avek rezilta pa par son lafot. Ki zot pa ti pa ti devlop akademikman parey zot ti devre.

Ki mannyer ki sa bann ki kontan kriye ki zot met” zonn o sant devlopman” in bliye ki zanfann osi i bezwen ganny met o sant devlopman? Sa Gouvernman LDS in vwar sa e in pran en ka imedyatman, avek rezilta ki nou’n vwar. Zanfann i *happy*. I annan menm ki’n aret pran *breakfast* kot zot lakour pou zot al manz avek zot zanmi lekol. Laprantisaz in amelyore e pli enportan ankor ansenyan ki ti pe esper en tel linisyativ depi lontan, in soulaze.

E la les mwan donn zot en pti nouvel mon bann zanmi dan Lopozisyon. En ansenyan ki pa ti siport LDS dan le pase in konfyè avek mwan ki sa sel pti reform in fer li mazine ki i kapab sanz son direksyon politik an 2025. Se sa osi, Mr Speaker, bann *success story* Ladministrasyon Ramkalawan. E nou pou vwar plis.

Avek en NIHSS modern nou kapab espere ki bann travayer lasante pou kapab ganny en formasyon onivo pou ed bann ki dan servis ozordi. Si i annan bon *feedback* par serten pasyan ki’n pas atraver

Lopital Sesel lo kalite servis ki zot in resevwar, nou bezwen osi rekonnèt ki parmi bann travayer ki’n koz avek mwan, i annan fristrasyon lo kondisyon travay.

Avek sa restriktirasyon ki pou arive byento dan *Scheme* e logmantasyon saler an Avril, deza en soulazman pou ariv kot tou travayer Gouvernman. E apre tou sa tapaz ‘donn travayer zot trezyenn mwan’ lannen pase, tou travayer in pran zot larzan trankilman e nou nepli tann zot.

Avek nouvo NIHSS, SITE e lezot lenstitisyon segonder, san kont UNISEY ek bann etidyan lo labours aletranze, nou kapab espere ki nou pou annan dimoun kalifye pou pran labar dan tou sa bann zoli batiman ki pe ganny konstri. Me, e wi, i annan en me, parey Prezidan in fer resorti dan son mesaz, pa tou travayer dan nou pei ki parey sa bann ki mon’n site.

Si nou konman MNA, e mwan koman *Leader* Zafer Gouvernman, nou pa toultan ganny sa *feedback* ki nou bezwen pou deservi nou *constituents*, ki mannyer ki sa dimoun ordiner pou espere ganny en rezilta pou son problem li?

Sa se en landrwa kot i annan ankor bokou pou fer.



Taler nou a koz lo drog ek fleo sosyal. Sa se bann defi ki difisil pou rezourd. La annou koz lo sa ki pli fasil pou fer. I ti'n plis ki ler Mr Speaker, pou Prezidan koz lo sa size.

Si nou pei in ariv la kot nou'n arive, sa i pa'n ariv par laverti okenn tabatyer. In ariv atraver en kalandriye presi ek en seri lobzektif kler. Prezidan Ramkalawan par son partisipasyon dan bann foronm enternasyonal, in arive fer nou pei ganny rekonnèt konman en pei ki koz kler e ki annan prensip drwat. I pa zis kay lo sa size "nou en sanpyon lanvironnman" e koz lo "sanzman klima."

Prezidan i al pli lwen. I pran sarz sa dosye e i aste sa lager. I rod solisyon. I dir bann pei devlope ki zot responsabilite anver sa ki pe soufer atraver konsekans zot devlopman. I pa dir sa en fwa, me i repete ziska ler in vin sanpyon sa lide annan en Lendeks Vilnerabilite e non pa selman en Lendeks Devlopman. Dan sa fason, Sesel i kapab ekspekte benefis ki nou pou resevwar ou ki nou pa ti pou resevwar otreman.

Atraver bann reform demokratik ki'n annan depi sa tranzisyon dan lape an 2020 e bann Polisi entern, nou pei in reste dan stabilite politik e

nou'n kapab monte lo tou bann lendeks demokratik e pran premye plas dan nou rezyon.

E se sa lavenir Sesel, Mr Speaker. Kot i annan kontinite ler en Gouvernman i ranplas en lot e kot Servis Piblik i servi sa Ladministrasyon ki la dan en fason profesyonnel.

Diferans pou annan. Diferans fodre i annan. Me kontinite e stabilite i bezwen reste a tou moman. Prezidan Ramkalawan in dir ki rekonsilyasyon nasyonal i reste enn son priyorite. Mon pou *stand strong* avek li lo sa size. Nou *Caucus* dan sa Lasanble pou *stand strong* avek li dan sa demars.

**(APPLAUSE)**

### **HON BERNARD GEORGES**

Se pour sa rezon ki i tris Mr Speaker pou vwar ki sa lide si senp pa pe ganny konpran par tou dimoun.

Ler ou antre dan en biro Gouvernman e ou ganny resevwar par en sourir, ou konnen ki ou dan bon lanmen. Ler sa figir i eg, ou konnen ki ou pe al anmas en bal problem. Se sa latitid ki pe retard nou pei. Se latitid "refri pa'n ekout mwan, alor mon pou kit mon tim an deor laplenn" ki pe retard nou pei.

E la mon felisit parol Prezidan ; “Si ou pa pare pou travay pou ou lapey dan ou sa plas kot ou ete, pa kriye demenler en lot i vin ranplas ou”. Sesel i pou tou son zanfan, wi. Me zanfan Sesel i osi bezwen pou Sesel. Lasanble i pou tou son Manm wi, me tou son Manm i osi bezwen pou Lasanble.

Prezidan in dir Vandredi’ ‘nou’n fer sa pei respire” e i annan rezon. *LDS* in vreman fer sa pei respire. Me Prezidan in osi dir “mon konsernen pou lavenir nou pei”. Pa zis li, Mr Speaker, ki devret konsernen. Nou tou, sakenn parmi nou dan sa pei i devret konsernen pou lavenir nou pei.

Mon ti dir o konmansman mon repons ki nou Lasanble i en vitrin e en mirwar nou pei. Tel parey nou Lasanble i en zoli batiman e la nou *Chamber* in met son pli zoli rob posib, nou pei osi i enn pli zoli ki Bondye in kree lo sa plannet later. Avek bann lenfrastriktir de kalite, ki swa lakaz lo bann kolin, batiman 5 zetwal, loto nef, *Air Seychelles* e bato *top part*.

Me tel parey isi dan sa Lasanble i annan sa ki bon e sa ki mwen bon. Sa ki travay konsyansyezman dan lentere nou nasyon e sa ki pa, deor dan nou pei i parey.

Tel parey isi dan sa Lasanble i annan ki donn bon legzanp e bann ki refize pou fer li, deor dan pei osi i annan sa ki travay byen e onnet, e bann ki trenn lipye ki pa desarz zot fonksyon e ki zis en pasaze lo sa plannet.

Tou zot bon se anpar lanmen, rod lasistans, ouswa pran drog ouswa konsonm lalkol. Epi ler zot vwar en dimoun pase, zot premye parol se “fer keksoz”, “get marmay”.

Si alor, lo en kote nou aplodi bann lavans dan plizyer domenn ki nou pei in ariv lo la, nou pa kapab inyor bann defi ki ankor fer Prezidan e nou tou konsernen pou lavenir Sesel.

Sanmdi nou ti aprann ki en zennonm ti’n ganny trouve prezimen pann. Dan sa detrwa dernyen semenn nou ti swiv en *case* Ankour, kot en zennonm e en zenn madanm 18an in ganny trouve koupab pou pran lavi en lot zenn madanm inosan.

Dan mon distrik Lapolis pe rod en zonm ki’n koup son madanm avek kouto epi taye e kasyet. Semenn avan, en zonm ti antre dan mon lakour e vin kot mon lakaz gran lizour avek en kouto, apre ki i ti’n pas kot 2 lezot lakaz e menas dimoun. Kot nou pe ale Mr Speaker?

I annan tro problemm sosyal dan nou pei, sa nou bezwen dir. In toultan annan, me sa in vin tro grav, prensipalman akoz pa ase in ganny fer pou adres sa bann problemm dan lefase. Bann Ladministrasyon presedan pa'n donn ase latansyon a sa bann problemm, sa ki fer ki ozordi zot in pet an fler e se Prezidan Ramkalawan ki bezwen vin o sekour. E pli gro problemm sosyal ki konfront nou se sa problemm drog ek lalkol.

Annou fer en refleksyon Mr Speaker. E mon demann zot fer sa refleksyon ansanm avek mwan. Dan sa program ki *BBC* in fer lo eroin Sesel, eski zot in remarke ki mannyer bokou dimoun ki'n koze i entelizan e fer bon refleksyon? Regard sa de manman, tou lede se de madanm for, onnet e entelizan dan zot refleksyon. Akoz alor ki zot zanfan in ariv koumsa? Kote nou pou met blanm? Ki mannyer ki bann Gouvernman avan in les nou ariv en pei avek 10mil adikt eroin?

Pou bokou nou dan bann distrik *front line* kot sa problemm in anzandre, nou fer fas avek sa bann dil toulezour. Ziska ler nou'n nepli remark zot telman ki zot o kler. Rezilta se ki anmezir ki nou bann

zennonm e zenn madanm i dan laliny *methadone*, nou bezwen enport mendev etranze pou fer marse pei. E olye bann saler mont Les Mamelles, Rochon ek Anse Aux Pins, larzan pe nourri fanmir *Bangladesh, Madagascar e Maurice.*

Antretan sa bann zenn om Seselwa pe pas dan lakour dimoun avek kouto, pe bat zot madanm, pe kas mang e koko ki pa pou zot, pe *kick* dan grannrout, ouswa pe pike dan peron bann flat.

Drog, Mr Speaker, an partikilye Eroin, e la *crack* ek *cocaine*, pe antre e detri nou pei. Malgre sa lalit asarnen ki nou Lafors Lapolis ek *Coast Guard* pe anmennen, malgre bann santans 10an, 20an, 30an, lavi prizon, ki Lakour i enpoze, drog i ankor antre.

I tris pou dir Mr Speaker, ki nou tou nou konn tou sa bann ki fer trafik dan sa bann sibstans, ki pe retard nou pei e ki pe fer nou bann zenn vin lesklav sibstans. Zis pou zot fer gro, gro lakaz, mars dan gro, gro loto, annan bato e *jet ski, girlfriend* partou kote. Pou zot kapab viv *comme* lanperer, zot pare pou detri en pei e met son pep dan lesklavaz.

Me se pa zis bann gro trafiker ki dan sa *game*. Zot annan zot osi en larme zenn ki

fer sa biznes sal, dan zot loto *i10* e lo zot pti *scooter*. E les mwan dir, akoz mon'n vwar dan mon prop lizye dan bokou ka, zot ganny soutire par zot prop manman, par zot prop zanmi. E wi, par politisyen ki pe vin rod en vot pou retourn o pouvwar.

Malgre sa, Ladministrasyon Ramkalawan in annan gran sikse lo redwir lakantite drog ki antre Sesel. Prezidan ti dir nou "sa Gouvernman pa dormi" e i annan rezon. Zanmen dan nou listwar otan drog in ganny detekte, otan in ganny sezi, otan in ganny detri. E sa travay i bezwen kontinyen.

Lo sa kote latap nou pa pou les tou lakonplisman sa dernyen 2an edmi ganny detri par bann *dealer* pou zot prop benefis. Tel parey nou pa pou aksepte ki en minorite dan pei pou esey domin mazorite. Non Mr Speaker, pa koumsa ki keksoz i marse. Se pa pou sa ki Lepep Seselwa in anvoy nou isi dan en gran mazorite.

Lepep Seselwa i ekspekte, e i egzize ki nou travay pou elimin sa bann fleo. Ki nou pa les en sel moman pase ki nou pa *l'eau qui vive* pou fer dibyen. Ki nou Gouvernman i atantiv a bezwen sa ki pli vilnerab, sa ki tonbe, sa ki bezwen led. Sa Gouvernman ki mon reprezante

isi dan Lasanble pa pou dormi Mr Speaker. I pou la 24 lo 24, 7 lo 7, pou detri bann move pratik parey lenportasyon drog, pou retir bann move lenfliyans dan lasosyete, pou dekouraz bann move pratik dan Servis Piblik, pou siport bann ki bezwen, pou koz kler avek Lepep Seselwa e pou anmenn nou pei Sesel a pli o nivo pli vit ki posib.

Lo sa size, mon fyer Mr Speaker, ki mon ti parmi bann Manm ki ti vot an faver lamannman Konstitisyon pou otoriz Lafors Militer ed Lafors Lapolis dan sa lager kont drog. Sesel in fatige avek drog. Les Mamelles in fatige avek drog. Mwan, mon'n fatige avek sa problem drog. Nou'n ganny ase avek sereng, avek *methadone*, avek sigaret e papye *foil*. Avek lanm razwar e pti morso vit dan kes karton, avek tir malad, avek zenn vyeyar dan nou sosyete.

In ler pou nou pran en bon ka avek tou sa bann vilen manni dan nou zoli pei. In ler pou nou aret - an menm tan en limero enn dan Lendeks Devlopman, e osi limero enn dan konsonmasyon eroïn dan lemonn.

E dan son demars kont sa fleo drog, sa kote Lasanble i deryer nou Prezidan e nou Gouvernman. Menm zafer pou

sa bann ki pa oule aksepte ki sa Gouvernman pa pou fonn akoz zot pe esey blok li. O kontrè, zot ki pou bezwen sed laplas avek bann ki oule travay pou ed nou pei avanse. Dan sa demars osi, sa kote Lasanble i deryer nou Prezidan ek nou Gouvernman.

Mon ti konmans par rakont mon lafyerte e mon termin par en regre ki nou ankor annan defi pou sirmonte. Sa se larealite lavi, Mr Speaker. Pa tou dimoun ki vwar keksoz parey. Pa tou ki annan zot pei a ker. I annan ki egois, ki mazin zis zot gannyen, ki pa pare pou travay pou byennet pei. Sa se la demokrasi Mr Speaker. Sakenn i annan son lespas lib. Ler ou fer en pep respire, i annan ki pou respir move loder. Ler ou donn laliberte lekspresyon, i annan ki pou abiz sa drwa e pou ensilte ou. Ler ou dir ki Sesel i pou tou son zanfan non selman i annan zanfan ki pa enterese, me i annan ki pou esey detri.

Me sa pa devret anpes nou kontinyen travay pou byennet nou pei. Mon fyer Mr Speaker, ki mon dan tim Wavel Ramkalawan. Akoz mon annan en kaptenn tim ki pa les sa ki negativ detourn li. O kontrè pli keksoz i difisil, pli determinen i ete pou sirmont problem. Mon

fyer ki nou Gouvernman i enn ki rod solisyon, ki pa kay lo problem. Mon fyer pou sa ki nou Gouvernman in akonpli dan sa 2an edmi ki in o pouvwar.

Me lafyerte Mr Speaker pa ase. Nou bezwen lager antoure pou sirmont sa bann defi. Nou bezwen trouv solisyon pou retir lakoz fristrasyon ki amenn bokou nou sitwayen, enkli en bann ki ti tik anler pou konplent. Nou bezwen amenn bann ki soutir drog pou aret fer sa e pou denons sa pratik, menm ler sa pou afekte sa ki bann ki nou pre avek. Akoz nou pe fer sa pou zot prop byen. Nou bezwen servi tou zouti a nou dispozisyon, enkli sezi byen malaki bann trafiker drog pou netway bann move fleo dan nou sosyete.

**(APPLAUSE)**

### **HON BERNARD GEORGES**

E la Mr Speaker permet mwan pou fer dimoun rapel ki nou lo sa kote dan sa Lasanble, nou annan en mazorite plis ki 2 tyer. Par respe pou nou demokrasi e pou nou oponan nou pa'n zanmen servi sa mazorite.

Me, les mwan dir kler ozordi ki si nou bezwen servi nou mazorite pou met en fren

avek drog e move pratik dan nou pei, nou pou servi nou mazorite ...

**(APPLAUSE)**

**HON BERNARD GEORGES**

Nou pou servi nou mazorite e nou pou fer li san regre.

Sa ki nou Gouvernman in arive fer dan sa pti lespas letan i senpleman enkrwayab. Sa ki pou koz apre mwan pou repas lo tou sa ki nou'n fer Mr Speaker. Leta nou Nasyon i bon, i menm tre bon. Pa zis batiman ek lenfrastruktir ki'n ganny fer. Me kekfw pli enportan, nou Gouvernman in donn Sesel en nouvo direksyon, en nouvo souf, en nouvo lespwar, en nouvo fason viv.

Swa i devan nou. Sa ki pa pare pou anbarke, *too bad*. Nou lo sa kote e la mazorite Seselwa an deor, nou pare pou kontinyen dan sa semen progre e prosperite, kot pti Sesel i ozordi lo lalev lemonn antye.

Vandredi pase Prezidan ti ofer nou en vizyon pou nou pei Sesel. Ozordi, le 15 Mars 2023, permet mwan Mr Speaker lo lapar *LDS* dan sa Lasanble, an retour e a lokazyon son laniverser, ofer Prezidan Wavel John Charles Ramkalawan nou sipor, nou travay, nou lasyer, nou kapasite, nou letan ek nou

langazman pou realiz sa vizyon e reasir li ki dan sa demars nou osi nou pa pou zanmen les Sesel tonbe !

Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Georges. Donk in ariv ler aprezan pou nou pran *break*. E nou ava retournen 11er 10 pou kontinyasyon bann repons lo mesaz Prezidan lo Leta Lanasyon. Mersi.

**(BREAK)**

**MR DEPUTY SPEAKER**

*Welcome back* tou Manm Onorab, e ankor enn fwa bonzour tou bann dimoun ki pe swiv travay Lasanble Nasyonal pou sa Merkredi, kot prensipalman nou pe swiv deba lo ki larepons bann Manm lo mesaz Prezidan lo Leta Lanasyon. E prosen enterven an lo lo lalis, se Manm Elekte pou distrik Anse Aux Pins Onorab Clifford Andre.

**HON CLIFFORD ANDRE**

Mersi Mr Speaker. Bonzour tou Manm Onorab, bonzour tou dimoun ki a lekout. Bonzour spesyal pou bann zabitan Anse Aux Pins.

Mr Speaker, Sesel i en bizou dan Losean Endyen. E koman en bizou, si en dimoun i annan en bizou ou toultan bezwen pe netway li, pe fer sir ki ou kit li an bonn kondisyon. Pou ki letan ou met li lo ou i reflekte sa ki ou, ou anvi i reflekte.

Mr Speaker, Leta nou Nasyon ki'n ganny delivre par Prezidan Larepublik Vandredi, i enn ki dir e koz pou li menm. I reflekte bann sityasyon ki nou pei pe vreman fer fas avek. I reflekte bann defi ki nou Pei i bezwen adrese.

Mr Speaker, dan son diskour Prezidan in koz lo son fristrasyon an referans avek lafason ki keksoz i ganny delivre dan nou pei. Fristrasyon Mr Speaker i en keksoz ki *être* si Prezidan i santi sa fristrasyon, alors i montre nou ki bokou keksoz i bezwen ganny fer pou amelyor sityasyon. Pou ki pep Seselwa, bann zabitan zot menm zot ava retir sa fristrasyon e fer sir ki keksoz i mars parey i devret marse.

Mr Speaker, mwan koman Manm Elekte pou Anse Aux Pins, mwan osi mon santi sa fristrasyon. *LGB* bomaten letan in fer son diskour in dir ki si nou, nou pa ganny en repons lo en keksoz ki nou'n met devan i normal pou nou santi fristre.

E alors sa dimoun dan sa Minister, oubyen dan sa departman, i bezwen fer sir ki li i fer son travay pou ki nou, nou ava kapab anmenn en repons kot sa dimoun ki pe met bann konsern devan nou e ki zot oule zot konsern i ganny adrese.

Alors fristrasyon i en keksoz ki normal, fristrasyon i en keksoz ki bezwen ganny adrese. E letan nou idantifye fristrasyon i enportan ki nou rode ki mannyer nou pou adres sa. E sa Mr Speaker in ganny souleve par Prezidan dan son diskour, kot in fer sir ki in eksplike bann ki pe fer dimoun fristre, ki bann konsekans zot pou sibir.

Mr Speaker, dan son diskour Prezidan in osi koz lo *rule of law*. Sa i en eleman ki mwan personnelman, mon santi mwan atase avek koman en Avoka, koman en Manm Lasanble. Akoz Lalwa i bezwen ganny respekte.

Mr Speaker, dan sa kad mon konpran letan i annan bann diferan responsabilite i ganny mete lo bann diferan antite. Me i osi enportan dan sa konteks *rule of law*, ki nou koman en Lasanble nou kontinyelman rod fason pou nou *empower* Lapolis.

Mon dir sa Mr Speaker akoz mon santi i annan bann

defi dan Lapolis ki bezwen ganny adrese. Nou bezwen rod mwayen, zot bezwen sa bann mwayen finansyel, resours imen e osi kalite ki ganny *recruited* dan Lapolis.

Mon dir sa Mr Speaker akoz mon santi ki zot performans i bezwen ganny eleve alaoter ki zot osi, letan zot pe delivre oubyen zot ganny demande pou delivre lo sa laspe *rule of law*, ki zot osi letan zot pe perform zot travay zot pa pe kas Lalwa.

Akoz par ler Mr Speaker, Onorab Georges in koz lo sa ka ki fek fini Ankour. I annan bann defi e mon konpran mwan, akoz Lapolis i fer fas avek bann defi. Se sa ki mon met sa bann defi devan, se pa akoz mon kont Lapolis, non. Se akoz mon oule ki Lapolis i fer sa travay alaoter, e ki letan i pe deservi piblik konplent ki piblik i ava mete kont Lapolis i ava minim. E ki zot ava fer sir ki zot ki sipoze sofgard bann Lalwa. Zot pe fer li dan *toute* fransiz, e dan *toute* transparans kot dimoun i kapab gete e fer sir ki nou kapab *entrust* zot avek nou sekirite.

Mr Speaker, in ganny fer resorti tou dernyerman ki i annan - oubyen *Leader* Lopozisyon in fer resorti sa ki annan bann dezagreman, dan

parti. Mr Speaker, me se sa ki fer en parti ek en pei evolye. I fer li bouz devan.

Mwan i annan bokou keksoz ki mon pa tonm dakor avek, me pa akoz mon pa dakor ki mon pa en Manm mon parti, non. Mon met mon pwen devan dan en fason fran, onnet, ouver e lezot Manm dan konteks nou *Caucus, LGB, Chief Whip* nou koze nou diskite. Nou tonm dakor e lenportans dan sa se *agree to disagree*.

E se sa ki enportan, pa neseserman ki mon agree avek tou keksoz. Pa neseserman dan en parti ki tou sa ki ou dirizan i dir, ki ou agrer avek. Si ou tonm dakor ki pou dir nou met sa bann pwen devan, dan en fason onnet, ouver avek respe selman, alors i ava ganny pran an konsiderasyon i ava ganny gete e i ava ganny adrese.

E dan sa konteks Mr Speaker, mon pou dir avek pep Seselwa, nou'n koz lo *Facebook*, nou'n dir kritik i vini lo *Facebook*, wi, i en *platform* kot en dimoun i asize kot li i met son pwennvi. Nou bezwen aksepte sa.

Mwan mon aksepte mon letan dimoun i kritik mwan. Zot annan drwa, i zot drwa. Selman ki zot bezwen aksepte, Mr Speaker ki mwan osi mon annan en drwa, mon osi mon



annan en drwa pou mwan pa aksepte sa kritik. Mon aksepte ou annan drwa kritik mwan, me pa neseriman ki mon dakor avek sa kritik.

So, sa ki nou bezwen ganny li kler ki poudir sa drwa ki ou annan pou ou fer en keksoz. Mwan osi mon annan en drwa pou mwan refize aksepte sa ki ou pe fer. Me selman mon konpran ki ou bezwen .... Akoz la demokrasi - la demokrasi Mr Speaker i vedir ki ou ganny drwa kritike. Ou ganny drwa met ou pwen devan.

Me pa akoz nou apel li la demokrasi ki ou pwennvi ki ou met devan, mwan mon bezwen aksepte. I apel la demokrasi ki mwan mon annan drwa pou mwan pa aksepte ou pwennvi. Alors nou kontinyen koze, nou bezwen kontinyen met nou bann pwen devan. Mwan mon pou dir avek pep Seselwa, kontinyen anmenn bann pwen devan nou. Kontinyen fer nou konpran, kontinyen fer nou vwar kote zot pa satisfè akoz se sa fason ki nou pou kapab amelyore.

Nou annan zis 2an edmi dan Gouvernman. Wi, nou ti demande, Onorab... - *I mean* Prezidan Larepublik ti met son kandidatur pou li ganny elekte. Ozordi se sa fason ki nou

bezwen ziz li, gete si sa ki i pe fer i an konformite avek sa ki nou, nou krwar i devret pe fer. Oubyen sa ki i pe fer i parey i ti dir i pou fer.

Alors nou bezwen kontinyen met nou pwennvi devan e mwan mon pou ankouraz dimoun pou kontinyen fer sa. E se dan sa konteks Mr Speaker ki nou, detrwa nou dan Lasanble, letan nou ti vwar *S.I 4*. Nou ti pran li anba nou lezel pou nou fer sir nou annan konsiltasyon avek sa bann dimoun ki pe ganny afekte.

E rezilta, mon le dir avek sa bann dimoun. Rezilta ki nou'n gannyen se nou, nou'n ganny enplike dan sa *meeting* avek lakonpanyen lasirans ki ti fer *State House*. Kot nou'n met zot bann konsern devan e la prezan, Lotorite i ava organize en zour kot nou pou annan en *meeting* avek zot bann ki enplike.

Definitivman avek Minister Transpor, bann lasirans i ava vini, i ava eksplik zot dan ki konteks keksoz pe ganny fer. Akoz nou, nou pa bann eksper, me selman nou la pou nou kontinyelman ekout zot, zot ki'n elekte nou. Zot ki santi letan bann sityasyon i ganny mete devan zot.

Zot ki bann *stakeholders* lo bann Lalwa e bann Regilasyon ki ganny mete an plas. Alors kontinyen fer nou konnen, kontinyen fer nou o kouran e mwan mon pou dir mon ankouraz konsiltasyon. Mon ankouraz konsiltasyon dan son totalite. Me selman annou pa ankouraz lensilt.

Wi, lensilt i form par nou sosyete me selman annou letan nou pe diskrit en keksoz ki konsern nou pei, pou nou fer dan en fason ki tou kote i ava kapab ekoute pou vwar ki mannyer keksoz i kapab ganny fer.

Mr Speaker, Prezidan in koz lo bann lenstans Konstitisyonnèl. Mon krwar sa i bann bon keksoz ki nou bezwen *empower* zot, pou zot kapab fer zot travay pou ki pep Seselwa i a kontinyen al kot sa bann lenstans e met zot bann konsern devan.

Fer sir ki sa bann lenstans i kontinyelman fer keksoz marse. Akoz si nou pou annan nou en lenstans Konstitisyonnèl, ki pa pe fer son travay oubyen i pa pe ganny travay pou li fer, savedir nou Konstitisyon pa pe viv son letap ki i sipoze viv.

Mr Speaker, mon'n annan enteraksyon avan Leta Lanasyon. E apre Leta

Lanasyon, avek serten zenn. Bann zenn Seselwa i annan bokou, ki annan bann lide lo ki mannyer pou fer keksoz mars en pti pe pli byen. Oubyen ki sekter ki kekfw nou bezwen osi get ladan.

I annan en zenn fiy Mr Speaker, ki'n apros mwan e in dir mwan ki i santi ki dan Sekter *Autism*, Lotorite i bezwen gete akoz bann paran, ki annan bann zanfan avek sa kondisyon, i bann paran ki vremen travay dir e vremen zot kontan zot zanfan. Akoz sa bann zanfan i bann zanfan ki pa neserman annan komunikasyon direk, pou li dir ou i pa kontan sa oubyen i pa kontan sa, oubyen i ti a kontan sa. Zot plito fer bann aksyon fizik avek bann keksoz oubyen pou ou kapab donn zot sa latansyon.

Me i napa sa *setting* kot Gouvernman i ed sa bann dimoun, sa bann paran pou zot kapab ganny en pti souf, akoz zot osi zot toultan avek zot zanfan. E kekfw i bezwen annan bann, bann *care center* si nou le;- oubyen bann *day care center*, oubyen bann *night care center* nou kapab dir oubyen en *center* ki kapab posibleman pran swen avek sa bann marmay pou kapab

permet zot paran al en pti kou e respire.

Alors mon ti a kontan kekfwa ki nou annan en lenstans kot bann zenn, sa i zis en sekter me i annan bokou zenn ki annan lide pou anmenn devan. E zot bezwen, zot bezwen dimoun pou gid zot lo sa lide oubyen lotorite pou ed zot pou enplimant sa lide.

Alors kekfwa i ti a bon ki nou koman en Gouvernman, nou gete ki mannyer nou kapab etablir en sant. Oubyen donn enn sa bann paran loportinite pou zot etablir en sant e fer sir ki sa bann keksoz i ganny pran an konsiderasyon.

Mr Speaker, Prezidan dan son diskour in dir ki moto ki nou ti servi pou nou al dan eleksyon “Sesel i pou tou son zanfan”. Ozordi sa fristrasyon ki mon’n koz lo la, i fer ki par ler i annan nou prop dimoun ki’n vot *LDS*, ki’n vot pou mwan, sa fristrasyon i fer zot demann zot lekor, “Eski sa moto i reel?” Akoz zot santi ki par ler letan zot pe al kot en biro Gouvernman zot pa pe ganny sa servis. E zot rode ki bor, kote zot *fit* dan sa moto “Sesel i pou tou son zanfan”.

Alors i enportan ki sa ki Prezidan in dir, sa bann dimoun ki pe met sa bann baryer dan rod solisyon pou sa

bann dimoun, zot fer sir ki zot arete e zot permet tou dimoun. Enkli sa dimoun ki sipoze *provide* sa servis, fer sir ki tou dimoun i vin e i viv sa moto “Sesel pour tou son zanfan”.

Mr Speaker, i enportan pou note ki ozordi dan Sesel Leta nou Nasyon i evidan pou nou kapab vwar sa kantite devlopman ki pe arive. Sa kantite devlopman ki’n ganny etale dan nou sosyete. Pou nou kapab vwar sa kantite demars ki nou Gouvernman in fer pou fer sir ki nou annan Lopital, annan lekol, annan lakaz. E dan sa konteks la Mr Speaker, mon ti a kontan dir avek zabitan Anse Aux Pins, nou annan nou bazar ki byento pe al ouver, pe al konplete e dan sa konteks nou pou annan bann devlopman lakaz ki pou ganny fer anler Caryole.

Dan Bidze nou ti ganny sa konfirmasyon e mon oule fer resorti, ki zot annan konplent, zot annan konsern me nou, nou ape travay. I annan bokou ki dir i pa vwar mwan, me mon a pe travay.

Mon krwar dan sa konteks Mr Speaker, i enportan ki nou edik nou pep lo responsabilite e devwar en Manm Lasanble. Nou apel en Manm Lasanble Nasyonal, nou louvraz i ganny definir e pli gran parti nou

louvraz plito i ganny definir isi dan sa Lasanble. Alors zot bezwen konpran ki pou dir nou, nou a pe travay e nou pa travay endividyel. Nou travay koman en lekip.

So, koman en lekip i annan bokou keksoz ki nou fer, ki nou met devan pou benefisye nou pei. Wi, nou annan en responsabilite dan nou distrik pou nou fer. Me selman letan nou pe redefinir bann responsabilite Mr Speaker, i enportan pou nou fer nou dimoun konnen e konpran, ki poudir distrik i ganny administre par Ladministrater Distrik.

Letan zot anmenn en konsern devan nou, nou i nou devwar pou nou met sa devan Ladministrater Distrik. Si zot pa ganny nou zot touzour Mr Speaker, kapab al kot Administrater Distrik, akoz sa i form parti son travay, pou li fer sir ki ladministrasyon en distrik i ganny fer an konformite avek lareg, akoz i annan en Bidze pou li travay lo sa bann zafer.

Mr Speaker, mon ti anvi dir sa akoz parey mon'n dir nou pou annan lakaz ki pe ganny fer. Nou pou annan *resurface* semen ki pe ganny fer. Me pa akoz enn oubyen de oubyen trwa oubyen en dizenn i decide pou li anvoy lensilt lo mwan.

E parey mon'n dir sa zafer lensilt mon krwar i pa byen. Akoz si mon pase dan mon loto, ou vwar mwan kot bazar. Onorab Georges in dir ki i annan ki dir, "fer keksoz" oubyen i dir "get marmay." Me fodre pa nou oubliye, i annan ki dir ou ozordi son laniverser san realize pou dir yer ti ou laniverser. E napa personn ki'n donn ou naryen.

So, nou bezwen kapab konn *textualize* keksoz. E letan en dimoun, akoz in dir ou fer keksoz, oubyen get marmay, oubyen i son laniverser ozordi e ou'n dir li "be *Chief* be ou konnen mon osi mon pe debourye dan lavi" E letan ou pase *next time* oubyen menm zour koman ou pe ale, i zour ou, sa fodre nou tire sa dan nou pep sa.

Akoz letan ou zour mwan, i pa anmenn okenn benefis. Alors, Leta nou Nasyon i bezwen osi pran konsiderasyon respe ki nou bezwen annan pou enn a lot. Ki fer ki demen, nou pei, mon krwar i pou bezwen annan en lendeks lo respe osi. Akoz Onorab Georges letan in koze in dir non i annan, nou premye lo lendeks epi nou premye osi lo eroin.

So, nou pa kapab premye lo ensilte kanmarad. Nou bezwen kapab annan sa respe,

latolerans. E mon kontan dan Lasanble letan nou pe koze, i paret nou annan en pti pe plis tolerans pou kanmarad e sa i devret al deor kot nou bann zabitan pou fer sir ki demen Prezidan i kapab pe koz lo en keksoz. Mwan mon kapab pe koz lo en keksoz. Ou koman Speaker ki dan *Chair*, ou kapab pe met en pwen devan. Ou pa bezwen zour mwan lo *Facebook*.

O Kontrer ou kapab anvoy mwan en mesaz, dir mwan “Clifford Andre, mon krwar ki sa ki ou’n dir lo tel pozisyon mon pa dakor avek, akoz a, b,c,d.” e se sa, koumsa ki nou annan kominikasyon. Koumsa ki dimoun i bezwen viv. E mwan mon ti a kontan vwar nou pei i devlop dan sa model.

E parey mon’n dir zot, pa neserman tou keksoz ki ganny fer ki mwan mon dakor avek. Pa neserman tou Lalwa ki ganny anmennen ki mwan mon dakor avek. Me selman, mon met mon pwen devan avek respe e mon met mon konsern pou ki nou kapab, nou kapab fer sir ki keksoz i marse.

Prezidan dan son diskour in dir “*horizon is the limit*” pou bann zenn. Wi, zot annan zot en pei ozordi kot zot kapab eksprim zot lekor. Kot zot kapab fer keksoz, pa ezite avans devan avek tou zot lide e tou zot

konsern e tou zot komanter. Me fer li parey mon’n dir avek respe.

Mr Speaker, mon’n dir ki i annan bokou keksoz pe ganny fer. Lopital i annan, mon sir i ankor lezot Manm pou koz lo la. *Palais de Sport* ki en landrwa kot nou tou, enn fwa ou enn lot nou’n frekante. Zwe Des Iles in fer laba nou reste ziska tar aswar, nou’n *enjoy* nou lekor pou nou get *sport*. *Sport* i reste enn bann eleman ki nou zenn mwayen naz, menm dimoun ki aze i anvi fer. Alors letan nou pe gete, dan lepase *Palais de Sport* ti annan bann kondisyon ki pa ti akseptab. Ozordi Ladministrasyon *LDS* anba direksyon Prezidan Ramkalawan pe fer sir ki pe remet lord e fer sir ki kondisyon ki *Palais de Sport* i ladan. I ganny met a zour e ki fer sir ki bann atlet i kapab pratik zot *sport* e fer sir ki zot reste an bonn sante. Akoz sa i enportan pou Lasante nou pep.

Mr Speaker, avantyer letan nou’n fini Leta Lanasyon ki’n pas Vandredi e letan mon pe monte dan bann 8er edmi diswar, apre fini travay, mon ganny en *call* avek enn mon aktivis, ki ti pe al ganny baba lopital.

Wi, i annan bann defi lopital Mr Speaker fodre nou

admet. Fodre nou admet, me sa bann defi bezwen ganny rektifye. E in dir mwan mon pou bezwen dir, akoz in dir mwan. I dir mwan “Clifford, mon lopital depi bomaten e dan sa *unit* kot mon pe al ganny baba, napa dra.” Mon ti pran sa mesaz mon ti *forward*, pou fer sir ki i annan en rektifikasyon. Me in ganny rektifye apre. I enportan ki letan i annan en problem, nou met devan, pou fer sir ki i annan en rektifikasyon.

Me mwan mon pou demann en keston dan sa konteks. Akoz sa sityasyon in arive? Eski in annan dimoun dan lepase, ki'n pran tou tapi ki ti annan lopital? Eski i annan dimoun dan lepase ki'n fer sir ki letan dimoun ti annan kondisyon lasante, zot ti dan lotorite, zot in manipil sa bann dimoun pou fer sir ki sa bann dimoun i anmenn bann komodite pou zot dan pei letan i sorti trete aletranze?

Mon konnen i annan lezot ki pou tous lo la a fon, alors mon ava les sa. Me selman ki mon pe sey dir Mr Speaker, ki i pa zis dan Sekter Lasante ki nou annan sa bann konsern, ki dimoun i annan sa bann konsern. I dan lezot sekter osi kot nou bezwen vwar akoz nou'n ariv dan sa kondisyon. E mon pa pe koz lalang, mon pe

dir sa ki en dimoun i laba in dir mwan.

Mon pa'n vwar mwan menm, akoz mon pa ti laba. Ser edmi letan mon pe monte, ki mon'n ganny sa mesaz. Annefe ki mon'n dir li, anvoy mwan sa mesaz an ekrir, pou mwan kapab *forward*. Akoz letan ou pe dir mwan pa neseserman mon dir tou sa ki ou'n dir verbalman avek mwan.

Mr Speaker, bann devlopman ki annan dan nou pei. Leta nou Nasyon se ki ozordi nou annan en *NHSS*, ki'n ganny *renovate*. Ankor enn fwa avek sa renovasyon, i fer ki nou pou ganny nou bann ners ki ganny *train* dan en sityasyon, oubyen dan en kondisyon ki ideal pou zot demen al delivre sa servis lasante ki pli profesyonnel e pli alaoter.

Mr Speaker, mon konnen ou'n dir mwan ki mon annan 3 minit. Mon ti a kontan tous lo 2, 2 laspe avan mon terminen. Mon ti a kontan dir avek bann zabitan anba bor lanmer. Lo plato ki wi nou'n annan rektifikasyon, Prezidan in koz lo sa rektifikasyon linondasyon ki arive Anse Aux Pins. Nou'n rektifye sa kot bann Pillay.

Me nou pe ale pou nou rektifye kot bann Uranie, mon ti a kontan zot ekout mwan, zot pa dir ki mon'n kit zot deryer,

non. Nou pe pran tou nou zabitan a ker e oule fer sir ki zot osi zot vwar en solisyon pou sa sityasyon delo, ki monte letan lapli i tonbe. Alors nou pe met zefors ansanm pou nou fer sir ki nou annan menm solisyon avek bann ki parey nou'n fer kot bann Pillay anba bor lanmer.

Mon ti a kontan osi dir avek bann zabitan Dan Kreson, anler kot bann Payet, poudir sa semen ki nou'n demande pou 7an, nou pe diskite, nou pe vwar ki mannyer nou kapab anmenn solisyon pou zot.

Alors, mwan mon pe lager pou ki nou annan en *meeting* avek Minister Transpor, Minister Later, pou nou kapab fer sir ki nou senkroniz bann sityasyon, ek bann dimoun dimoun prive ki annan later anler laba. Pou nou fer sir ki nou senkroniz bann lide ek bann demann, pou fer sir ki tou dimoun i ava benefisye. E letan nou fini fer sa proze si sa proze i ganny materyalize, akoz zot in dir mwan poudir pou annan en kou en pe enorm. Alor si sa proze i ganny materyalize i ava dan benefis tou dimoun.

Mr Speaker, avek sa detrwa mo mon ti a kontan swet Prezidan Larepublik parey Onorab Georges in fer, en zwaye laniverser. E mon ti a kontan

dir avek pep Seselwa ki mon langazman i reste touzour pou mon parti, me, me mwan mon en dimoun ki letan mon annan en lopinyon ki diferan mon pou *voice li out*. Zot kapab kontan, zot kapab pa kontan, zot kapab ensilte mwan, me selman mon pou reste touzour *LDS* e mon pou fer sir ki mon pa zanmen les tonbe. *LDS* Sesel! Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Andre. Prosen entervenans lo lalis i Manm Elekte pou distrik Roche Caiman. Onorab Audrey Vidot.

**HON AUDREY VIDOT**

Mr Speaker, tou Manm Onorab. Zabitan Roche Caiman e tou manm piblik ki a lekout, bonzour. Mr Speaker, mersi pou donn mwan laparol.

Mr Speaker, pou en trwazyenm lannen konsekitiv nou'n atann en diskour Leta nou Nasyon kot Prezidan Larepublik ankor enn fwa pa'n ni menm enterese pou vin anmenn bann propozisyon ek solisyon konkret, ki ti ava dan lentere nou pep pou amelyor nou standar e sityasyon lavi.

Nivo problem dan plizyer sektor ek Minister pe

kontinyelman ogmante e pou plis ki 90 minit Seselwa in pret zorey nou Lasanble Nasyonal pou ekout sa ladres par Prezidan Larepublik avek en lekspektasyon resevwar serten sipor ek parol rekonfor, pou fer fas avek sa presyon lavi ki'n anmer e difisil ozordi Sesel.

Malerezman ankor enn fwa, Seselwa i tre dezapwente. Sa divan sanzman ki swadizan in pous sa gro nyaz nwanr Oktob 2020 i sa menm divan ki'n trenn en pli gro nyaz nwanr, enn byen tre epe kontrerman ek sa nouvo souf ki Seselwa ti ganny promet. Ankor, i ti zis en fantezi.

Mr Speaker, in pran Prezidan Larepublik plis ki 2an pou kapab vin fran e ilistre klerman devan pep Seselwa Vandredi pase, ki in aksepte ki li menm li i pa konpetan pou diriz pei. Letan i pa kapab dirize, i fer ki i rann son Gouvernman osi pa vin efikas. Me sa ki dezapwentan, se ki tou blanm inefikasite sa Gouvernman in ganny lar lo ledoto pou travayer Servis Piblik a leksepsyon li Prezidan Larepublik ek son bann koleg Minis. Akoz lendikasyon se ki Prezidan ek son bann Minis zot pe fer sakrifis e zot pe byen travay ozordi dan Gouvernman.

Mr Speaker, i pa profesyonnel pou en Dirizan pran lapros lipokrizi, ensilte dimoun, senm lafreyer parmi travayer Seselwa ki leve toulezour pou li al debourye, e pou li kontinyen fer enn bann deklarasyon ki pa ni menm fonde, zis pou sey anbet latet dimoun.

Me avan Prezidan Larepublik komans servi sa mo sabotaz, les mwan liste enn de pwen. Lekel ki ti koze dan sizyenm Lasanble ki tou lenformasyon ti dan son *file* ble? Lekel ki ti kriye ki li i pou annan en pli meyer plan pou adres problem lo *landfill* pou evite ki bann ka dife i arive parey resaman?

Lekel ki ti dir lo medya sosyal ki li i konnen lekel bann trafiker drog e ki in menm annan konversasyon. Lekel ki ti asire ek pep Seselwa ki li dan 100 zour i pou rezourd problem drog e bann ki lo program pou ganny anvoy lo zil?

Mr Speaker, diran 30an LDS in pres en litani problem ki zot ti pou vin adrese pli byen ki Gouvernman US. Me apre ki nou'n vwar, zot pa kapab pratik sa ki zot prese. Erezman nou pep Seselwa i entelizan pou vwar e konpran ki pase dan nou



pti pei ozordi anba en Ladministrasyon medyokrite.

Zis parey sa msye 64an dan mon distrik Roche Caiman, kot i dir avek mwan. “Madanm Vidot, LDS, sa LDS i parey bann fo profet. Kot zot zis promet e rekonpans nou avek en servis ki pa alaoter. Mwan mon regret mon’n donn zot mon vot Oktob 2020.”

En mon pa bliy parol sa group zenn ki sorti Eden Village, Roche Caiman ki dir mwan, “Mis Audrey, sa enn wi nou’n rode. Sanzman nou’n gannyen, me i tro bokou. In ler pou 2025 arive pou tir li. Nou leker i fermal ler nou vwar nou paran pe trimouse toulezour pou fer de bout zwenn ler li Prezidan i kontinyelman monte desann lo larzan *tax payers money* pou pei.”

Nou swete ki ler 2025 i arive nou pa tann dir sabotaz. Me ki Prezidan i gard son parol ki i pou respekte lavolonte pep Seselwa e ki ariv son moman kot lepep in fatigue avek li, i pou sorti volonterman.

Mr Speaker, ler nou vwar en Dirizan koz lo linite e i kontinyen e i bliye kantite lagrenn laenn, vyolans ki’n ganny senmen depi son legzistans. I napa rezon pou li fristre avek son rekolt. Prezidan i koz lo *rule of law* e ki

Lasanble i pas bann bon Lalwa. Lekel ki ti dir i pou defann Konstitisyon Sesel me apre deklare ki meyer desizyon ki in pran se met Larme lo semen. Selman ozordi nou annan Seselwa ki pe dir nou ki i pe dormi avek lafreyer.

Lekel ki’n pas son letan dan sizyenm Lasanble kritik *fake profile Facebook* kot pe ganny servi pour maltret politisyen. Selman sa menm dimoun ki li menm li in deza admet devan Lakour ki i annan son *fake profile*. Sa lapros vin senm lafreyer avek pep Seselwa, avek Lalwa ki aplik zis pou serten aköz Gouvernman LDS ki pe *rule border*. Seselwa pe note e 2025 zot pou *pack and go!* Seselwa i konnen ki Nouvo *United Seychelles* i sel opsyon pour Sesel!

**(APPLAUSE)**

### **HON AUDREY VIDOT**

Mr Speaker, Seselwa i en Nasyon ki entelizan e kapab konpar Leta nou Nasyon avan Oktob 2020 e ki mannyer i pe deperir dan sa dernyen 3an anba Ladministrasyon LDS. Mon fer en pti konversasyon avek en group madanm Sanmdi pase lo sa diskour, 3 dan sa bann madanm i dir mwan dan milye diskour zot in tenny zot

televizyon pou al fer zot lezot tripo lakour, akoz koze mirak pa lafresisan pou zot. Ek sa lanmor voler zot bezwen okip zot lasante pou 2025 pou tir li. Konmela partou kot ou pase setou ki ou tandé. Setou ki ou tann koze. Fodre tir li 2025.

Mr Speaker, konman en Manm Elekte, i mon devwar e responsabilite pou montre Prezidan Larepublik, son bann koleg Minis ek son bann Manm Lasanble Nasyonal LDS vre leta nou Nasyon, akoz i paret ki zot menm zot, zot pa konnen ki pe pase o tour zot.

Mon pou komans par Minister Lasante. Sa Minister ozordi ki pe fonksyon lo son zenou e bokou travayer en si ki bann pasyan pe vwar zot dan bann sironstans vreman delika e sa pe rann zot fristre.

Travayer i fer resorti defayans e met konsern devan me problem i antre dan en kote zorey i sorti dan lot kote. US in anmenn plizyer kekyon pou Minister Lasante pandan sa dernyen 2an avek bi vwar amelyorasyon e bon servis nou swen lasante. Dan sa prose, nou'n ganny pa mal rezistans par Minis e menm par nou Lasanble pou nou ganny bann lenformasyon ki korek e kredib.

Gouvernman in toultan penn en portre ki tou keksoz i

ok, kontrerman avek larealite. Dan plas vin reasir sa pep ki zot pe al adres sa bann defi, Prezidan Larepublik i vin devan nou Lasanble e vin dir avek Lepep Seselwa ki nou pa konn servi sistenm lasante e menm ki nou pa konn distenksyon ant ka dirzans e enn ki pa irzan. Nou pe ganny dir en nouvo lopital pe al ganny konstrir.

Me Mr Speaker, dan limesya atraver Bidze ki'n ganny vote, kwa ki pe ganny fer pour soulaz kondisyon bann travayer e pasyan dan nou lopital? Eski Prezidan Larepublik pe dir avek Lepep Seselwa, ki ler zot malad pa vin servi *casualty*? Si wi Mr Speaker, kote eski bann ki malad pou ale apre ler si i pe al rod plis pou son swen lasante?

I enportan fer resorti ki mazorite bann klinik rezyonal i fermen apartir 4er apre midi, a leksepsyon Anse Boileau ek Klink Anse Royale ki fonksyonn 24 lo 7, e klinik Larivyer Anglais ki ouver ziska 8er diswar. Pour met a latansyon Prezidan Larepublik dan rezyon nor, santral, an desandan sorti distrik Au Cap tou dilon, lamazorite i sipoze desann pou zot servi swen lasante Lopital Sesel.

Ki alternative ki eski Gouvernman LDS pe sizere

anver Lepep Seselwa an vi ki nou pe ganny dir endirekteman pou pa raport kot *casualty* ler nou tonm malad, si i pa en ka dirzans? Eski Prezidan ek son bann Minis, pe mazin ouver en lot brans kot Lopital Sesel ouswa dan rezyon santral pou deservi sa bann group dimoun dan nou pei?

Mr Speaker, dan rezyon nor e santral i annan de klinik prensipal ki kapab ofer sa servis. E sa se klinik La Rivière Anglaise ek klinik Beau Vallon. Nou rekonnet ki i annan en mankman travayer me mwan plis ki sir ki si vreman Gouvernman ti responsab e ti anvi ede pou soulaz pep, zot ti pour esey rod en fason efektif pour fer marse enn, si non sa de klinik.

Malgre tou lesey pandan sa dernyen 2an e atraver nou bann kestyon dan Lasanble pour Minis, sitasyon aktyel Lopital Sesel i kontinyen agrave e ozordi plis ki zanmen leta nou lopital in vin pli deplorab.

Mr Speaker, mon pa pou kapab kontiny mon lentervansyon san ki mon fer travayer Minister Lasante fer sa refleksyon. Dan bann lannen presedan anba Ladministrasyon *United Seychelles*, bokou nou nou'n antann bann travayer pe rod zot

drwa atraver lamars ou menm lezot mwayen e konman en Gouvernman responsab, Gouvernman *United Seychelles* ti toultan pran an kont zot bann problem e konsern. Me ozordi, konsern bann travayer lasante pa pe ganny ekoute, sa ki ti sipoze lager pou zot pe ozordi zwe sourd, akoz li i dan konfor.

Mr Speaker, dernyen fwa ki ners e lezot travayer ek swen medikal ti ganny zot, zot bon *set uniform* pou zot travay ladan, ti anba ansyen Ladministrasyon *United Seychelles*. Ozordi, bann travayer Minister Lasante pe bezwen al travay dan diferan kouler lenz e menm i annan ki lenz i regretab ki annan desire avek.

Pasyan pe rod *psychological counselling*, paysan pe soufer avek lenfeksyon dan lopital. Pasyan kanser ki pe ganny dir ki napa tretman, pour zot kapab fer zot kimoterapi e latizann pour bann maladi kronik dan farmasi napa. Pasyan pe ganny demande pour al aste latizann prive e pli pir Mr Speaker, bann pasyan ki reste lopital pe ganny demande pou anmenn pa zis zot tapi. Zot prop zorye, zot dra e tetdorye pou zot ki pe servi akoz lopital napa ase.

La zot pe sey fer nou krwar poudir i annan in vole. Non,

non, non, non. Seselwa pa krwar sa Mr Speaker. E bokou sa bann pasyan i ganny asize en lazournen, espere pou li kapab ganny en *set* dra ek tetdorye, avan ler pou li kapab ganny son bann lezot swen nesoser dan ward lopital.

De lot kote, bann pasyan ki kot lakour pe ganny dir Dokter ek ners pa pe kapab vin kot zot pou pans ouswa pou fer zot revi aköz napa ase travayer dan klinik. E si i annan, napa transpor pou al dan distrik.

Mr Speaker, alors kestyon pou Prezidan Larepublik ek son Minis, ki Minister Lasante pe fer avek sa Bidze ki nou Lasanble in aprouve pou zot? Eski larzan osi pe ganny servi zis pou ganny voyaze? Si sa bann vwayaz i enportan, Prezidan i dir ki i al lapes e i anmenn keksoz, be dan sa bann vwayaz pa kapab lapes en pe sa bann keksoz ki lopital i manke, tel koman latizann, zorye, dra e tapi? Dan plas esey redres nou servis lasante, nou ganny dir pour pasyante e atann nouvo lopital. Antretan nou bann pasyan i kontinyen malad, zot a kontinyen pa ganny zot latizann e nou bann travayer a kontinyen fer depans dan zot pos pou aste resours e liniform travay.

Sa ki kler se ki Gouvernman LDS pa pe vwar vre leta nou Nasyon e pou zot bann dirizan, nou lasante pa en priyorite aköz zot, zot ganny tou *allowance* ledan, zot kapab okip zot prop lasante.

La servis *lift* pou bann travayer e pasyan maternite e ICU e lezot *ward* pa bon. Nou'n ganny dir ki lopital in ganny kado *lift*, me ziska ozordi *lift* pa ankor kapab mete. Kwa ki pe anpese pou kapab met sa bann *lift*?

Mr Speaker, mon konnen ki si mon asiz lo size Minister Lasante ek son Lopital Sesel, mon repons lo sa diskour pa pou fer zistis sa Minister e ou lezot departman. Me mon bezwen fer zistis lezot departman aköz problem i kontinyelman vin an ta. Alors mon pou bouz lo Lazenés, Spor e Lafanmir.

Lannen ale, lannen vini nou ganny dir ki Minister pe travay lo plan, zot manifesto i enn ki pli bon program pour lazénés e ki zot annan lentansyon ofer lazénés en pli meyer fitir. Ler ki zot pe fer sa, lazénés pe swiv zot tre pros. Nou kontinyen ganny dir ki "Sesel pour tou son zanfan."

Kestyon ki lazénés pe demande, ki mannyer eski Gouvernman LDS i kategoriz

Sesel pour tou son zanfan? Eski Sesel i pour tou son zanfan ler zot swazir pour eksklir serten zenn aköz son lakonplisman, aköz son afilyasyon politik? Eski zot senser dan zot parol ler zot pe eksklir serten zenn dan seremoni remersiman pour zot bann performans tel parey dan bann zwe enternasyonal, aköz zot paran pa siport Gouvernman?

Mr Speaker, lazenes pe get zot e zot anvi konnen ki kriter Gouvernman *LDS* pe servi pour kategoriz zanfan Sesel. Nou'n ganny dir ki Konsey Nasyonal Lazenes pe nepli organiz aktivite o nivo distrik, apre en ansyen zofisyè avan son depar i anonse ki zot pe al reget ladan, apre nou ganny dir ki Konsey pa pou organize aktivite, me nou tandè ki zot pe vin avek en pli gro aktivite o nivo nasyonal. I kler ki sa Minister napa en direksyon.

Lazenes Seselwa, i kontinyelman ganny kit deryer e ozordi spor dan Sesel i kontinyen desann e nivo i afeblir. Bann ki anvi fer sa diferans pou nou lazenes pa pe ganny sa siport neser. Bann ki dan pozisyon dirize e gide zot fer konmsi zot pa tann nanryen.

Mr Speaker, en keksoz ki enteresan ki Prezidan in fer resorti se ki tre byento i pou re

konmans donn lasistans sosyal en pe plis fanmir ki pli dan bezwen, e Prezidan in sey fer sa lanons dan en fason tre diplomatik kot in dir avek lepep ki li in met lord e prezan lazans pou kapab al get bann dimoun pou asiste zot.

En lanons ki ankor enn fwa demontre mankman direksyon sa Gouvernman. Nou'n fatigue tann li dir ki isi dan sa Lasanble, pe kritik Gouvernman *United Seychelles* ki nou servi larzan pandan letan avan eleksyon pour pey dimoun. Prezidan, vin kler ase zwe kouk kasyet avek Lepep Seselwa. Pa pou bat latet sa pep ankor. Sa lanons i enn ki montre pep Seselwa klerman ki direksyon bann lannen presedans ki pe vini avan eleksyon.

Mr Speaker, napa letan ki fini e Seselwa pa en Nasyon ki blyi vitman. Nou'n antann Minis responsab pou Lazans proteksyon sosyal vin dir a plizyer repriz ki zot Gouvernman sipoze responsab pa pou soutir Seselwa asiz lo *welfare* me pe plito *empower* e ankouraz Seselwa pour travay.

Pandan sa dernyen 2an kot bann Manm lo nou kote latab in sipliy avek Gouvernman pou get dan lentere bann fanmir ki dan

bezwen, *LDS* in kontinyen sant leloz ki Seselwa i pares e pa oule travay e ki Seselwa i bezwen leve al travay. Me kwa ki'n sanze Mr Speaker?

En sel kou *welfare* i bon pour Seselwa? Zot in ase pini pep e pe rod en lot manda alors konmans ouver tiyo, fer mwan mazin parol koleg Onorab Wavel Woodcock dan en son deba, atraver ou Mr Speaker.

Wi Mr Speaker, Seselwa pa oubliye e napa letan ki pa fini. Ler Prezidan i dir i pour kontinyen ekout Lepep Seselwa, sa paran, manman e papa tousel Roche Caiman ki dan en lanplwa, mon repete - ki dan en lanplwa e ki monte desann pou rod led i ganny dir i pa kalifye. Kote zorey Prezidan avek son Minis ti ete ler *US* ti demann Gouvernman pour get dan *welfare* nou bann dimoun ki pe travay ki bezwen led.

Sa manman ou sa papa tousel ki pe pey son *Home Saving Scheme* e ki demann *part rental* pa pe gannyen. Zot in les sa paran tousel soufer diran sa 3an. Apre zot a vin dir zot pe vin revwar. Mon dir gran mersi i annan *United Seychelles* ki kontinyelman lager pour ki ozordi Gouvernman *LDS* pe resanz zot pozisyon lo la e deside pou donn plis sipor nou bann dimoun ki pli dan bezwen.

San bliy sa goute ki annan ti demann ek mwan kote pou ganny larzan ler mon ti demande pou nou bann zanfan lekol.

E parey bann Madanm *United Seychelles* Sanmdi le 11 Mars 2023 dan zot konferans kot zot ti pran en rezolisyon, pour ki nou kontinyen siport bann aksyon ki nou parti i lager pli for pour ki sa Gouvernman i ekout nou. Akoz nou ki annan bon rikord ki mannyer pou diriz sa pei.

**(APPLAUSE)**

**HON AUDREY VIDOT**

Mr Speaker, Prezidan in dir ki letan i donn en parol, i gard son parol koman en parol sakre. An 2019 dan sizyenm Lasanble Nasyonal, Dirizan Lopozisyon ki sa letan e ozordi li menm li ki pe diriz pei ti kritik ansyen Ladministrasyon *US comme quoi* i pa fer konsiltasyon. Ozordi anba son Ladministrasyon, kot i sipoze pe fer pli byen e fer plis konsiltasyon napa. Konsiltasyon i ganny fer lo nivo *Cabinet*, sa ki pou vin enplimante pa kapab vini pou vin eksplik kominote kwa ki pou ganny fer, ki desizyon ki zot in pran, san pran an kont lopinyon zabitan. Zis parey pe

arrive dan mon distrik Roche Caiman.

I montre ou ki mannyer sa Gouvernman pa enterese pou ganny lopinyon piblik, lopinyon zabitan. Zot annan sa latitud diktater kot zot zis enpoz keksoz lo dimoun. Apre vin fer krwar ki zot parol i senser.

Mr Speaker, pour konklir Seselwa in senpleman ganny ase avek lafason ki pei pe ganny dirize, Seselwa i le vwar valer son sakrifis. Seselwa i senpleman anvi en meyer lavi. I malere ki anba Gouvernman *LDS* zis en pti group zanfan Sesel ki pe viv ere. Zabitan Roche Caiman koman zot Manm Elekte, toulezour mon konpran zot soufrans. Letan mon zwenn zot nou ganny sans koz lo zot bann difikilte. Parey nou'n tonm dakor, sel opsyon ki reste pour Sesel se pour vot pou *United Seychelles 2025*.

Nou tou nou konnen ki *US* i pli byen plase pour diriz nou pei e dan en meyer semen. Annou pa tonm dan pyez sa bann zoli parol ki Prezidan i vin dir dan sa Lasanble. Mazinen, mazin byen ki dan Labib Satan ti tant Zezi ler i ti dir li" sot anba i ava ganny tou sa ki la." Annou reste solid e konnen ki nou anvi. Pa zis pou nou mon bann frer ek ser zabitan Roche

Caiman, me pou nou bann zanfan.

Mon dir en gran mersi zabitan Roche Caiman pou zot bon lakey kot zot lakour. Wi mon pou kontinyelman fer li mon devwar ankor sa trwazyenm lannen, pou mwan pas kot zot lakour e fer letan pou zot akoz eleksyon, mon bann fer ek ser se atraver zot sipor devan zot lakour kot mon ti vini, ki mon pou kontinyelman tournen pou ziska ler nou kontiny sa lamars ankor pou 2025.

Mersi zot tou pou zot bann pwen konsern e sizesyon ki zot in avanse pour ede sey amelyor devlopman nou distrik e nou pei. Mon oule osi dir mersi bann manm piblik ki monn zwenn e ki'n avans plizyer pwen. I regretab dan 30 minit tro bokou pou nou kapab site. Me mon demann Bondye lafors ek lagras pou ki mwan avek mon koleg Onorab *MNA United Seychelles*, nou kontinyelman tenir for e kontinyen debout akote Lepep Seselwa ki ti lager pou met nou la pou koz pou zot. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Vidot. Prosen entervenans se Manm Elekte

pou distrik English River.  
Onorab Andy Labonte.

**MR DEPUTY SPEAKER**

Mersi Onorab Vidot. Prosen entervenans se Manm Elekte pou distrik English River. Onorab Andy Labonte.

**HON ANDY LABONTE**

Mersi Mr Speaker. Mr Speaker, tou koleg Onorab, Sekretarya e *staff* Lasanble Nasyonal, zabitan La Rivière Anglaise e pep Seselwa, bonn apre midi. Mon tourn ver Bondye Papa nou kreater. Kreater lesyel ek later, liniver vizib e envizib. E mon dir li mersi pou tou son benediksyon, gidans, lasazes ek lentelizans, ki i kontinyen akord nou dan en fason en kondisyonnel. Me mon osi remersye li pou kontinyen protez mwan kont tou kalamite.

Mr Speaker, i avek bokou imilite e respe ki mon swet bonn retour Onorab Wilbert Herminie ki en ansyen zanmi e koleg lekol. Mon anvi dir li ki mon pou kont bokou lo son sipor dan lentere nou zoli distrik, e pare pou atrap son lanmen, ki ansanm nou ava kapab akonpli bokou. Enkli tou sa ki pa ti ganny letan, ou loportinite, akonpli dan son dernyen manda an 2016.

**(APPLAUSE)**

**HON ANDY LABONTE**

Mr Speaker, la ki nou pe koz lo Leta nou Nasyon, e mazorite nou popilasyon i bann krwayan, swa kretyen, swa mizilman, swa boudis, swa endou, e lezot ankor. Mon panse ki en bon loportinite pou koman en pep fer refleksyon e en evalyasyon lo kote nou sorti, kote nou ete, e ki nou swe e laspirasyon ver lavenir.

Bann ki dan Karenm, moman sakre, ou Ramadan, annou resours nou larm. Pirifye nou leker ki nou vin pli pre avek nou kreater e les li gid nou. Annou koman en nasyon rekonnèt e aksepte nou responsabilite isi ba lo sa later. Premye liv dan nouvo Testaman, Levanzil St. Mathieu, Sapit 5, Vers 13 a 16, i rapel nou, ki se nou disel later e lalimyer lemonn. E sa Levanzil i apropiye pou nou koman bann dirizan, akoz se nou ki la e merit fer sa ki byen pou nou pep par edik zot, diriz zot, pran bann bon desizyon ki donn sa bon gou zot lavi e met zot dan laklerte.

I osi enportan pou met nou azour avek responsabilite ki devan nou e realite aktyel pei dan son totalite. Nou pa devret zanmen pran desizyon baze lo



mansonz e rimer. Parey Prezidan in dir dan son diskour, mon site “Annou regard byen dan ki direksyon ki nou pe ale, annou les lalimyer diriz nou. Annou pa zis les mansonz politik anmenn nou dan tou direksyon”. Retir sitasyon.

Mr Speaker, Vandredi le 10 Mars 2023, Prezidan ti dan sa Lasanble e fer son ladres Leta Lanasyon. Mon ti ekout li tre atantivman avek bokou limour. Apre, mon'n fer li mon devwar e responsabilite pou ganny lopinyon e reaksyon bokou Seselwa. Sa i enkli zabitan La Rivière Anglaise, zanfan koman adilt, ki posed menm drwa e responsabilite anba nou Konstitisyon.

Bokou in ganny dir par Prezidan e bokou reaksyon par Seselwa. Me mazorite Seselwa in dekrir sa diskour dan sa fason. Prezidan in fran, direk e onnet. Dan sa 30 minit, mon pou fer resorti mye posibilite mazorite sa bann lopinyon e konsern. Speaker Mancienne in dir nou ki deliberasyon i merit alaoter. Mon pou reste pozitiv. Mon pou meprize akiz ou blanm okenn endividi ouswa okenn lenstitisyon. Me plito, dir sa ki laverite, sa ki vre e parey i ete.

Premyerman i en regar zeneral. Mon rekonnet e felisit tou Gouvernman, presedan e

aktyel pou tou sa ki byen e pozitiv ki'n arive dan sa pei. Nou'n toultan dir ki kot i byen nou ava aplodi, amelyore e fer pli byen. Me kot i mal, nou ava korize e bouz de lavan. Nou pa kapab zis kritike, akize e blanmen.

Mon dakor ler Prezidan in dir, annou rod solisyon. Akoz pep Seselwa in ase matir e fatige avek negativite. Seselwa i anvi vwar solisyon e bouz pli devan. Seselwa i anvi en lavi afordab e pli meyer. Me pli enportan, Seselwa i anvi vwar plis aksyon ki koze. Nou'n toultan kontinyen antann bokou kritik. Wi, kritik i enportan. Me i devret ganny fer dan en fason konstruktiv.

I osi enportan, ki nenport ki Gouvernman ki ganny elekte, i aksepte kritik. Ankor, Prezidan in dir. Nou bezwen ekoute, analize, fer refleksyon e donn lopinyon. Me mon pou al pli lwen pou dir, annou reste pozitiv, aksepte kritik, analize, fer konsiltasyon, idantifye bann defayans. E pli enportan, pran bann desizyon swivi par bann aksyon konpreansiv ki apropiye, modern dapre lanvironnman pei, e laspirasyon sa pep. Malgre ki nou pe viv dan en lemonn global.

Mon konsey nou pep, ki ler konsiltasyon i ganny fer annou osi azir koman bann zabitan ki responsab. Vin devan e partisipe. I pa ankourazan ler konsiltasyon i ganny organize me tre minorite ki vin devan pou partisipe. Apre, sa bann menm endividi ki pa partisipe i sot anler pou kritike.

Mazorite nou pep, i anvi ki nou vin pli progresiv avek bann Lalwa modern ki morde e fasilite bann prosedir kot lord ek lape i reste touzour priyorite. Menm ki parfwa, Seselwa i santi ki tro bokou Lalwa pe anmar zot lanmen, me zot rekonnet ki pou plizyer lannen in annan bokou dezord, lesefer e labi dan sa pei an zeneral.

Mr Speaker, permet mwan bouz lo dezyenm gran laliny. Sa i nou pei e pep Seselwa. Nou tann koz bokou lo fristrasyon ki dan tou kous nou popilasyon. Ki dan Gouvernman, Parastatal, oubyen prive. Prezidan in nonm serten kategori fristrasyon. Me mon pou al pli an detay.

Annou pa konfiz fristrasyon avek negativite e rebel par bann ki'n privilezye pou plizyer lannen isi dan sa pei Sesel. Zot zis pa apresye okenn desizyon ki Gouvernman aktyel i pran. Bon ou move. Zot vwar ki sa bann desizyon i pa dan zot

faver personnel. Sirtou, aköz zot in abitye fer keksoz dan en fason ki fer zot plezir. Alors, zot santi ki zot *zone* konfor pe ganny deranze.

I osi annan bann endividi e bann gro lakonpanyen lokal koman etranze dan mazorite sekte. Zot pa oule pey travayer dapre i merite. Me anvi kontinyen fer bann gro profi e abiz kouraz nou bann travayer Seselwa sirtou. Zot refize pran Seselwa e prefere pran etranze, kot zot kapab fer sa ki zot oule avek sa bann etranze. Apre nou tande ki drwa sa bann etranze pe ganny vyole.

Par kont, i annan bann etranze ki dan bann gro pozisyon. Sirtou dan Lendistri Touris. Zot refize promot Seselwa, e nou kontinyen vwar etranze ganny promosyon isi lo later Sesel.

Prezidan in konfirman ki li menm li i fristre. Me si nou Prezidan Larepublik li menm li i fristre, ki mwan e lezot zabitan pe santi? Sa i vreman, e vreman grav. Nou Gouvernman e okenn Gouvernman pa merit aksepté okenn mannigans ki pe ede pou anmenn fristrasyon dan sa pei Sesel.

Parey Prezidan in dir, serten bann fristrasyon i deroul otour bann move konportman travayer. I annan en pti

minorite travayer enkonpetan ou travayer ki annan bann azanda personnel, ki pa pe delivre. Swa pe pini sa pep, swa pou met kritik lo Gouvernman, swa parese in anzandre e in fini vin en kiltir e fason fer.

Mr Speaker, bokou Seselwa, pe nenport ki parti politik zot sorti, pa'n vreman konpran valer sa tenm "Sesel pour tou son zanfana". Me mwan, personelman, mon pou touzour krwar ladan e mon pou kontinyen defann avek konviksyon. Sa i en rezon akoz ki mwan mon ti debat pou sanzman an 2020.

Sesel, i merit reste touzour pou tou son zanfana. Pe nenport, oryantasyon seksyel, krwayans politik ki ou annan. Ou endike ou non endike, sivilize ou non sivilize, blan ou nwanr, ris ou pov, kretyen ou en payen, menm si ou en kriminel. Lenportans se si ou en Seselwa. Me note ki tou kriminel i merit ganny met deryer baro osito ki i ganny vwar koupab par en Lakour.

I annan fristrasyon ki pe arive par sabotaz. I pe ganny fer dan en fason tre modern, byen kalkile e profesyonnel. Apre si aksyon i ganny pran, zot sot anler e kriy viktimizasyon. Bokou travayer ki la dan

Gouvernman pe zis zwe rol pou met retar sa pei.

Mr Speaker, fodre rekonnnet ki mazorite nou bann travayer i bann profesyonnel e pe fer zot travay a ker. Zot pe delivre alaoter, e donn tou, e zot agree ki si en endividi pa delivre, pe kontinyen denigre e met retar en departman. E sirtou dan Gouvernman ki pe ganny peye par lazan piblik, i merit ganny met a la port, akoz si non, sa travayer ki devoue pou kontinyen dekouraze.

E la sa kliyan, ki vreman dezespere pe rod en servis oubyen atann en repons, ouswa en desizyon, pe kontinyen fristre. An plis, sa pe met retar e kout sa pei vreman ser. I osi danzere pou lavenir e fitir nou pei. Swe e lespwar se ki enplimantasyon *result-based management* i anmenn en amelyorasyon remarkab dan Gouvernman, Servis Piblik e Parastatal.

Prezidan in osi rekonnnet ki mazorite travayer pe fer en travay vreman alaoter. E mon pou nonm enn de legzanp. Parey Ms Maria Payet ek Mr Zialor kot *PUC*, Ms Linda Bristol, Mr Mighty Marie-Therese, Ms Anne-Marie Gendron ek Mrs Sharon Lesperance kot *PMC*. Mr Marthy Vidot ek Ms Betty-May Bibi kot

Lasante. Mrs Wendy Pierre, Ms Marise Aglae ek Mr Alain Sopa kot Rezistrar. Mr St Ange, Mr Donald Zialor kot Departman Prizon, Manmzel Lena Annacoura kot Lapolis, Mr Nel Rene kot Lotorite Por e bokou lezot ankor dan bann Departman Gouvernmental e Parastatal.

Mr Speaker, i osi annan birokrasi ki ankor pe anmenn bokou fristrasyon. En legzanp i kot Ladwann ki met retar sirtou bann ki dan biznes. En lot landrwa se dan Sekter Later Endistriyel ki annan en gran demann. Nou bezwen aksepte ki later endistriyel i vreman limite. Me bokou zabitan pe demande ki pe arive avek sa bann endividi ki'n ganny *allocate* avek enn ou plizyer morso later endistriyel pou plizyer lannen. E kantite, e pa pe devlope.

Mr Speaker pri lavi; I annan bokou faktor ki fer pri lavi kontinyen reste o. Nou rekonnèt e felisit Mrs Siana Bistoquet, *CEO STC*, avek son lekip, ki pe kontinyen pou anmenn bann komodite de kalite a en pri abordab. Nou vwar ki lentrodiksyon *RRP* in fer son lefe. E ler *MRP* in vin an fors, sa in plizoumwèn stabiliz pri bann komodite ki *STC* i enporte, aköz mazorite marsan

in respekte sa. Nou osi aplodir konstriksyon sa nouvo *cold storage* fasilite pou stokaz komodite *STC*.

Mr Speaker, permet mwan donn en pti legzanp kote Sekter Prive i osi kapab ede pou fer kou lavi pli abordab. Denozour, preski tou endividi i aste en bwat *take away* pou dezennen. Mon pou felisit e tir mon sapo avek Mr Philip Moncherry kot *Bourgeois Take-away* ki sitye dan *Barrel Trading Building* pour plizyer lannen. Malgre tou sa ogmantasyon dan pri komodite, i sel *take-away* ki son bwat manze i reste R35 en *half* e R50 en *full*. Se pourtan Mr Moncherry i aste son komodite dan laboutik isi Sesel. Me i zis ki aköz Mr Philip Moncherry i annan en leker konpasyon anver son bann kliyantel.

Mr Speaker, mazorite pep Seselwa i dir ki rezon zot ti vot pou en sanzman an Oktob 2020, i aköz zot ti'n fatigue avek en sistenm diktater ki pa ti pe fer nou Nasyon dibyen. E zot vreman anvi vwar sanzman dan la fason fer. Mon siport sa, aköz mwan, mon fanmir e zabitan La Rivière Anglaise, nou ti form parti sa group Seselwa ki ti vot pou en sanzman.

Mazorite dimoun ki mon'n koz avek, zot dir mwan ki zot

rekonforte ler Prezidan dan son ladres ti dir. Mon site “Me selman, la mon krwar poudir ki tranzisyon in fini, tranzisyon in fini e dezormen, nou bezwen delivre”. Retir sitasyon.

Mr Speaker, i kler ki mazorite Seselwa i konnen ki ti anv i an Oktob 2020 ler zot ti vot pou sa sanzman. Zot in vreman konekte avek ladres ki Prezidan in fer e prezan zot pe esper zis aksyon. Mazorite Seselwa i konnen ki lorgey, zalouzi, rankin, vanzans ek negativite pa bann bon valer pou promote koman en Nasyon. Me plito bann bon valer parey pozitivite, lape, imilite, linite e pli enportan, lanmour. Akoz se sa ki Bondye nou kreater i anv i vwar renye dan lemonn.

Levanzil St. Mathieu, sapit 5, vers 38 a 48 i koz pardonn ou lennmi. E nou koman en imen avek nou limitasyon i pa en keksoz sitan fasil. Me nou listwar koman en nasyon i reste touzour douloure. Sirtou nou bann frer ek ser ki’n sibir sitan bokou lenzistis ek viktimizasyon dan lepase. I annan ki’n menm perdi enn ou plizyer son pros.

Mr Speaker, nou pa kapab oubliy sa travay sitan enportan ki *TRNUC* in fer dan nou pei. E mon felisit sa Komisyon Laverite Rekonsilyasyon ek

Linite Nasyonal, pou sa bon travay.

Prezidan in dir e mon site. “E la mon anv i dir avek ou Mr Speaker, ki le 28 Mars sa mwan, sa Komisyon pour prezant avek mwan zot rapor final. E deswit apre sa, parey Lalwa i demande, mon pou prezant sa rapor avek Lasanble Nasyonal. E i pou vin en dokiman piblik, pour ki tou dimoun i ava konnen kwa ki dan sa rapor, kwa ki zot pe rekomande. E atraver sa Lasanble Nasyonal i ava ed Legzekitiv pour konnen dan ki direksyon nou pou ale”. Retir sitasyon.

Mr Speaker, apre ki plizyer ka in pas devan sa Komisyon, nou'n vwar kot drwa e dinyite plizyer nou bann frer ek ser Seselwa in ganny vyole e zot propriyete in ganny pran a malapropo. Nou tou nou’n vwar gravite e konnen ki serten viktim pe ekspekte konpansasyon e anv i zot propriyete i ganny retournen, ki i parfetman normal. Nou osi rekonnnet ki Gouvernman in deza pronons son lekor lo sa desizyon pou retourn bann later ki pa ankor ganny devlope.

Me kestyon i reste se, ki pou arive avek sa bann ki zot later in fini ganny devlope e revann? I annan bokou

lensertitid la deor. I annan bann zot ki zil ti ganny konfiske e *maintenant* i anba IDC. Sa bann ki zot biznes in ganny pran, e ki ti oblize kit Sesel al egzile, oubyen ki'n perdi enn zot fanmir. Napa en kou ki kapab ganny atase avek sa.

Me i enportan ki zot ganny en gerizon, akoz i pou zis parey en boubou ki pa zanmen geri, oubyen en dife ki pe kontinyen brile, in ganny kouver anba later, me ler i pou flanbe pa pou kapab bare. Sa bann viktim i krwar ki zot lavwa e lopinyon i merit ganny tande e pran an konsiderasyon.

Mr Speaker, trwazyenm gran laliny i lo mon distrik La Rivière Anglaise. Mon pou dir ankor, mon fyer pou sa privez ki zabitan La Rivière Anglaise in fer mon sa konfyans pou reprezant zot isi dan sa Lasanble. Mon pou kontinyen fer tande zot lavwa. Malgre ki bokou pa kontan e parfwa vwar mon koman en lennmi. Mon pou reste touzour motive parey sa dikton i dir "delo sal pa zanmen anpes en plant grandir", alor parol negativ pa pou zanmen anpes mwan progrese.

Mr Speaker, mon osi rekonnèt e felisit tou Seselwa, zenn koman vye e tou endividi dan Sesel, sirtou bann ki sorti

dan distrik La Rivière Anglaise, ki dan en fason ou en lot pe fer keksoz pozitiv. E la mon mazin sa bann zenn parey Gracy Esparon, ki fek ganny elekte koman Manm Lasanble Lazenés pou lekol La Rivière Anglaise. Thyrisa Hortere, Gia Barbe, Hezron Louise, Jean-Yves Philoe, Rahim Desnousse, Yoni Farabeau, Adrian Cesar, Josip Ravignia, Michel Emile, Solana Athanase, Dylan Labrosse, Steven Freminot, Kiren Bijoux, e bokou lezot ankor ki pe kontinyen fer sa ki byen pou nou kominote.

Mon osi fyer pou dir ki bokou nou bann etidyan sorti dan distrik La Rivière Anglaise pe fer ekstrememan byen dan bann legzanmen nasyonal ensi byen ki enternasyonal. Parey Ms Kelly Laporte, 17an, ki'n *score* 10 A dan *IGCSE* legzanmen. Gervais Navin Teroomooljee, ki'n kalifye pou en labours aletranze. Plis ki 75poursan bann etidyan lekol segonder La Rivière Anglaise in pas zot legzanmen *IGCSE*. Bann etidyan parey Hope KiSiong, Roysha Mougale, Nathan Uranie, Emma Alcindor, Melissa Choisy ek Thea Alissop, ki pe kontinyen briye.

E la mon pou zwenn ansanm avek Mrs Linda Philoe, ki enn sa paran, e bann lezot

paran La Rivière Anglaise, ki rekonnèt e felisit, ankouraz e annan gratitud anver Sir Steve Hoareau, Sir Ted Arrisol, Ms Marie-Anne Payet, Ms Brenda Confait, e tou lekip lekol La Rivière Anglaise, pou sa travay ekstraordiner ki zot pe fer pou anmenn rezilta remarkab.

Mon pou osi rekonnèt ki mazorite bann paran sorti dan distrik La Rivière Anglaise, pe pran zot rol paran o serye.

Mon fyer pou dir, ki *management* lekol La Rivière Anglaise in pran sa loportinite e servi lotonomi ki Minister Ledikasyon in donn zot, pou fer sa Laklas Ekselan, ki'n vin en sikse e sa i en legzanp pou lezot lekol segonder.

Mr Speaker, nou bann etidyan pe osi fer byen dan lezot sekter parey lar. Dan Byennal 2022, 3 nou etidyan in sorti venker. Sa se Angel Constance, Renane Marie-Jeanne e ankore enn fwa, Thea Alissop in briye. Kominote i bezwen kontinyen pouse pou ankouraz e fer sa bann tel sikse travay dir e devosyon bann zanfan ganny rekonnèt.

Malgre sa, bann tel sikse nou distrik i annan bokou pou amelyore dan domenn sportif. Parey dan atletik, dan konpetisyon enter skoler ki'n pase dernyerman, lekol La

Rivière Anglaise ti ranport 4 meday lor, e 9 bronz, e alors mon pou felisit sa bann etidyan ki'n partisipe e ankouraz lezot pou fer pli byen ankore.

Nou swe se ki plis langazman bann biznes dan lavi lekol e kominoter. La mon anvi dir mersi bann ki kontinyen ede, enkli Klib Trwazyenm Az La Rivière Anglaise, Mrs Dianette ek Mrs Ernesta kot Komite Dezabilite. *Caritas* Sesel Victoria, *Lions Club Seychelles*, Mr Bhavesh, Mr Huges ek Mrs Avril Hoareau, Mr Alderic Benoiton, Mr Ronny Dufrene ek son madanm. Mr Toulon kot *Marine Maintenance*, Mr Prakash e lezot ankore. Nou vwar ki *SLTA* per fer en zoli travay dan distrik, e toultan la pare pou siporte, parey met bann *crash barrier*, lalimyèr e met koltar.

Lo kote proze. Distrik La Rivière Anglaise, in reisi konplet premye faz proze drenaz La Rosière kot la fanmir Valentin, Sifflore/Gerry, pou plizyer lannen, ti pe soufer ek problem delo ler lapli i tonbe. La i reste dezyenm faz kot pou rektifye kote kot la fanmir Pillay. Proze drenaz dan komansman semen Union Vale in konplete, ki fer li pli agreab pou bann pyeton letan lapli. La i reste *pavement* e pou rektifye

problenm anba kot Vilaz Lespwar o bor *flat*.

Proze *road diversion* Ma Joie lo plato, dezyenm faz drenaz kot Mrs Fondamiere, Quincy, konstriksyon semen Pti Pate, semen Thompson Lane pou al Grenis, *cross drainage* anba pye kopai, Ma Joie, ki pe afekte lafanmir Savy, Zarine ek Colle. Koneksyon ek *main sewage system* bann vilaz Union Vale e bann lezot lakaz ankor i touzour lo program.

Nou bann peser pe esper konstriksyon bazar ki sipoze konmanse tre byento. Tousala se bann proze ki reste nou bann priorite pou distrik. Atraver konsiltasyon avek Mr Joel Valmont ek son lekip kot *PUC*, mon rekonnèt sa zefor e travay entans ki'n konmanse tou dilon semen *Castor Road*, pou adres problenm presyon e koupaz delo Union Vale. Espesyalman kot *Condominium*, ki pou plizyer lannen in kontinyen, e nou bann profesyonnel ti'n ganny oubliye e neglize.

I vre ki Gouvernman pe fer en travay entansif pou elimin drog lo later sesel. Me itilizasyon bann *hard drugs* ek lalkol i reste touzour en gro fleo ki anmenn en lenpak lo lasante piblik ek *workforce* lo nou pei. Me bann diskisyon lo bann topik parey itilizasyon Kanabis

lo baz medisinal ou rekreasyonnel, i reste touzour en konsern pou nou popilasyon.

Prezidan in anonse ki tre byento en nouvo sant reabilitasyon pou bann adikt pou ganny konstri. Sa i montre ki nou Gouvernman pa zis determinen pou elimin *hard drugs*, me pou rod fason pou reabilit e donn lespwar nou bann adikt. Sa i ava donn zot en sans pou refer zot lavi e fer sa bann kliyan *DSAPTR* vin responsab e prodiktiv.

Pou ede adres sa sityasyon drog ek lalkol e konportman anti-sosyal dan rezyon *Ex-Krishna Mart Building*, mwan personnelman, mon'n zwenn avek Mr Rajah Pillay, ki propriyeter *The Avenue Project* pou en devlopman dan sa rezyon. E si tou keksoz i mars dapre plan, sa landrwa pou ganny en nouvo fasad pli tar sa lannen.

Lasante ; Tou Seselwa in vwar re louvertir lekòl *NIHSS*. La Digue byento son nouvo lopital pou ganny inogire. Nouvo *oxygen plant* ki'n ganny kree. I annan serten paysan ek travayer ki servi servis lasante piblik, i kontinyen vwar bokou defayans e fristre.

Sa i enkli, servis *casualty* Mont Fleuri. Me note, ki



*casualty* pa pe ganny servi apropriye. I ti sipoze akeyir selman bann ka irzan e kritik, me nou vwar li pe fonksyonn parey en klinik normal, kot zabitan pa pe respekte. Sa pe met bokou presyon lo sa servis.

Sant Lasante La Rivière Anglaise ki enn bann pli gran sant lasante dan Sesel, e deservi bokou zabitan. La zabitan koman travayer, pe ekspekte en amelyorasyon. Sa i enkli lenfrastruktir, parey kreasyon en *changing room* pou *staff*, e nouvo kous lapentir, *fungus* lo miray, lezot pti renovasyon.

Mon pran sa loportinite pou felisit Ms Marie-Helen Nirole ek son lekip, ki malgre tou defi pe kontinyen sey son mye pou donn en servis ki alaoter avek en pep ki lekspektasyon i vreman o.

Lakaz ek later i reste touzour en defi. Me mon zwaye ki tre byento, 16 fanmir pou benefisye avek en nouvo lakaz dan sa dezyenm faz Proze Union Vale *Chateau Vallon*. Mon konsey pou bann zabitan, se pran swen avek e konn viv koman en kominote. Pa les drog, lalkol, lanmizik e lezot fleo sosyal anzandre. *PMC* osi, fodre pran responsabilite e fer ki bann *tenant* i respekte zot kontra.

Mr Speaker, ler mon pe al ver konklizyon, permet mwan fer en pti refleksyon. Bokou i kapab dakor e bokou pa pou dakor. Sesel i vreman en labote avek bann zoli zabitan. Nou annan en tradisyon e kiltir ki ris. Me koman en pep, nou bezwen gerizon. Lasante, legzistans nou kiltir e tradisyon i an dout. Si mantalman, fizikman e pli enportan spirityelman lekor en imen i pa an bonn sante, i pa pou fonksyonn dan son totalite. Annou aprann valoriz nou kiltir e tradisyon. Labaz e fondasyon en sosyete, se la fanmir, e nou touzour dir ki i pran en sosyete pou elve e fer grandi en zanfand.

Nou kapab depans tou sa larzan, investir dan ledikasyon entelektyel, me si la baz pa solid nou fouti. Si fondasyon en batiman i solid, sa batiman pou solid e dirab. I pa fasil, me naryen i enposib avek Bondye Papa.

Pou terminen, mon enform tou zabitan, ki mon pou kontinyen *visit* zot. Mon biro i touzour sitye dan batiman Ladministrasyon Distrik La Rivière Anglaise. Mon lofis i ouver Lendi a Vandredi, 8er a 4er, e mon *Clerk* i Ms Katheline Charles, ki osi en zabitan La Rivière Anglaise.

Mon vwar piblik tou le Zedi. Me si okenn endividi i bezwen mon irzan, telefonn mwan ou anvoy mon en mesaz. Mon nimero telefonn i reste touzour parey 2514821. Me fodre note, ki *DA* i osi la pou deservi distrik e resevwar tou zabitan. E limero Ladministrasyon Distrik i 4321630. Mon pou dir mersi, e ki Bondye tre o i kontinyen beni sa later e gard son regar e lagras, lo lemonn an antye. Mersi Mr Speaker.

**(APPLAUSE)**

**MR DEPUTY SPEAKER**

Mersi, Onorab Labonte in anmenn nou zis ler pou nou pran en *break*. Nou pou rebran 2er pou lezot larepons lo mesaz Prezidan lo Leta Lanasyon. Mersi.

**(BREAK)**

**MR DEPUTY SPEAKER**

Bonn apre midi tou Manm Onorab. E ankor enn fwa bonn apre midi tou bann dimoun ki pe swiv, travay Lasanble Nasyonal pour sa Merkrede. Nou kontinyen avek repons bann Manm lo mesaz Prezidan lo Leta Lanasyon. Prosen entervenans lo lalis, se Manm

Elekte pour distrik Au Cap Onorab Kelly Samynadin.

**HON KELLY SAMYNADIN**

Mersi Mr Speaker. Mr Speaker tou mon bann koleg Onorab, *staff* Lasanble Nasyonal, tou dimoun a lekout espesyalman tou zabitan dan nou zoli distrik Au Cap, bonn apre midi.

Avan mon konmans mon lentervansyon mon oule eksprim mon lafyerte, pour ki mwan koman en zenn madanm, mon form parti konman en Manm Elekte sa setyenm Lasanble Nasyonal Sesel. Letan ki i pou selebre son 30enm lanniverser depi ki premye Lasanble ti ouver son laport, le 30 Zilyet 1993.

En remersiman spesyal i al pour zabitan distrik Au Cap ki'n met zot konfyans dan mwan, pour debat e koz pour zot byennet e lentere. Mon osi anvoy mon senser remersiman anver mon bann koleg Manm Onorab, *staff* Lasanble Nasyonal, ensi ki Mr Speaker li menm pour zot devouman e travay dir, ensi ki pour zot sipor e soutyen.

Ki nou a kontinyelman travay ansanm, pe enport nou diferans parey Tenm Nasyonal a lokazyon Lafet bann Madanm sa lannen i afirman, ki koegziste dan lape e larmoni kot malgre

diferans dan ideoloji ek lentere, nou kapab viv e travay ansanm.

Mon ti a voudre eksprim mon senser lapresyasyon pou nou Prezidan Larepublik Mr Wavel John Charles Ramkalawan, ki'n dan son Diskour lo Leta Lanasyon, reafirm son langazman e komikman pou kontinyen sofgard laliberte sak sitwayen lo later Sesel.

Nenport ki landrwa kot i ete e ki i pou kontinyen fer flote nou paviyon pli o ki posib. Mon oule osi profite pour swet ou, Msye Prezidan, en zwaye lanniverser e ki Bondye i kontinyen beni ou avek plis lasante ek lasazes.

Mr Speaker, nou Prezidan in osi met bokou lanfaz lo sa lespri travay dir, kot in demann sak Seselwa, anba nou moto "Sesel i pour tou son zanfan" pour kontinyen travay dir e donn zot tou. E ki zot demontre sa atraver lanmour ki zot annan pour nou pei *bien aimée*. Ki fer mon mazin parol ansyen Prezidan *Barrack Obama* ki ti dir e mon sit li "*In the face of impossible odds, people who love their country can change it.*"

An tout priyorite, mon oule senserman eksprim mon lapresyasyon pou tou travayer Seselwa ki pe travay sanses pour ede fer Sesel bouze. Bann

ki pe mazin prosperite nou pei avan tou, me non pa trenn lipye pour fer avanse azanda politik en serten parti minoriter. Se sa vre lespri patriyotizm, kot sak sitwayen responsab i demontre sa sans lanmour, devosyon e sans lapartenans pour son pei. Kot nou met tou nou diferans dekote e nou aksepte ki konman en Nasyon se nou langaz, nou laspe etnik, kiltirel, politik e istorik ki defini nou konman en Nasyon. Me non pa diskriminasyon, viktimizasyon oubyen vyolans.

Mon asire ki lamazorite nou, nou oule vwar en pei kot sak Seselwa i kapab epanouir dan son prop fason. San ki i sibir okenn baryer, okenn form diskriminasyon ou lenterferans politik, oubyen i pa ganny penalize pour sa ki i ete, ou reprezante.

Malerezman Mr Speaker, i kontinyelman annan en serten group dimoun ki la zis pour met retar sa pei e son pep. Ki sabotaz, diskriminasyon e viktimizasyon i zot sinyatir. Nou konn zot tre byen Mr Speaker. Bann ki pa ti kanpany anba slogan 'Sesel i pour tou son zanfan', akoz pour zot, Sesel i zis pour en serten group dimoun. In plis ki ler pour zot leve dan sa rev ki zot ladan, akoz si zot kontinyen

dormi, sa pei e sa pep pa pour esper zot.

Sa ki zot bezwen konpran se ki Seselwa in fini vire sa paz ek nou pa ek nou. Nou'n *'level up'* comme dir Angle, e nou pe demann zot pour zot osi fer parey. En serten *Leader* lo lot kote latab li Mr Speaker, i oule vin donn nou Prezidan e son Gouvernman leson. Be Mr Speaker, zot in bliye ki boul ti dan zot kare? Pa zot ki ti dan laklas? Malerezman, zanfan Sesel in fatige avek zot bann leson bat latet. Zot napa leson pour vin donn sa pep, akoz si vremen zot ti kapab travay, parey *Leader* Lopozisyon in dir, zot pa ti pour trouv zot ozordi, apre 43an o pouvwar dan en minorite dan sa Lasanble Nasyonal.

Nou pe koz fristrasyon Mr Speaker? Be akoz ki Seselwa ti met Gouvernman *SPPF*, Parti Lepep, *US* a laport an Oktob 2020? Set akoz sa pep ti fristre avek zot. Se zot ki'n met pandil politik nou pei an retar, non pa *LDS*.

**(APPLAUSE)**

**HON KELLY SAMYNADIN**

Pandan ki mon pe koz lo diskriminasyon Mr Speaker. I annan bokou endividi ki pas zot letan, ki swa bann *fake profilers*

oubyen bann ki pli ardyese anba zot vre idantite, zot pas zot letan abes, diskrimin oubyen *bully* lezot. E sa i pour plizyer rezon. Politik i enn parmi, kot dimoun i servi bann diferan platform medya sosyal pou mal enform e konfiz sa pep.

Mon apresye ki *Cybercrimes and other Crimes Act* in finalman ganny met an *full* fors. E bann ki krwar zot pour pas zot letan pour verbalman agres e ensilte lezot, pou finalman kapab ganny anmenn devan lazistis.

Lartik 22(1) nou Konstitisyon, i sertifye ki sak dimoun i annan drwa pour laliberte lekspresyon e pour rezon sa lartik, sa drwa i enkli laliberte pour annan lopinyon e pour rode, resevwar e pour kontribye nide ek lenformasyon san okenn lenterferans.

Me par kont, Lartik 22(2)(b) i presize klerman ki sa drwa anba *clause* 1 i kapab ganny restrikte parey in ganny preskri dan en Lalwa e nesese dan en sosyete demokratik pour protez repitasyon, drwa e laliberte oubyen lavi prive bann dimoun.

Mr Speaker, nou tou nou bezwen rekonnet ki laliberte lekspresyon i enn ki sakre. Akoz ki nou bezwen abes nou frer ou

ser Seselwa avek bi pour ganny popilarite atraver *loves* ek *likes*?

Parey mon ti'n deza mansyonnen pli boner Mr Speaker, nou pei Sesel, osi ptipti ki i ete, i pa bezwen vyolans. Me mon vreman enkyet pour obzerv lakantite ka kot Seselwa pe atak son frer ou son ser avek zouti, kot bokou sa bann ka in prodwi fatalite. Oli nou lanmour e konpasyon anver kanmarad? Akoz ki nou bezwen rankinen ou anmenn laenn anver kanmarad? Oli nou sans fraternite? I annan plizyer mekanizm an term striktir e lenfrastriktir an plas. Si nou santi nou drwa konman en sitwayen pe ganny abize e kot nou kapab ganny rekonfor oubyen sipor.

Annou aret akimil statistik dan prizon ek fatalite. Nou pa mazin nou fanmir? Nou pa mazin nou zanfan? Lekel ki pour fer zot grandi e donn zot gidans lo zot semen lavi si nou konman paran nou pa prezan? Ki kalite legzanp ki nou pe donn nou bann fitir zenerasyon? Mr Speaker, sa i enn mon bann pwen refleksyon letan mon analiz Leta nou Nasyon ozordi.

Lakantite ka vol dan nou bann kominote, i kontinyelman ogmante, Mr Speaker. E nou zoli distrik Au Cap i enn ki pe sibir bokou, zis akoz en serten

group dimoun i bezwen satisfere zot adiksyon. E la mon mazin nou bann dimoun ki zot lakaz, oubyen letablisman touristik i kontinyelman ganny kase e vole. Sa i sirtou dan rezyon *Sawa Sawa Farm*, D'Offay Estate, Turtle Bay osi byen ki dan Au Cap santral.

I pa fasil pour fer de bout zwenn. Nou bann dimoun i fer bokou sakrifis pour kapab ganny sa ki zot annan. Bann operater *guest house* e pti lotel Au Cap i kontinyelman ganny afekte. Mon mazin sa manman tousel ki annan son bann zanfan ek son lakour pou okipe, ki pe zer en biznes *guest house* lo li menm, e ki voler pe konstaman kas son letablisman e vol son bann kliyan.

Malerezman, apre ki son bann kliyan in ganny vole, li i sibir bann move *online reviews* e in menm annan sirkonstans tou resaman kot plizyer son bann *bookings* in ganny kennsel akoz sa bann tel lensidan.

A sa pwen la, mon oule remersye *Regional Commander ASP Jane Barbe*, Lenspekter Dean Decommarmond ki ansarz Stasyon Lapolis Anse Aux Pins, Ms Beryl Pillay, en zabitan Au Cap e ki travay kot Departman *Tourism*, Mr Paul Lebon e madanm Philomena

Hollanda osi kot Departman *Tourism*, pour sipor ki zot pe donn nou distrik dan sa demars pour redwir e elimin lakantite ka vol ki pe ganny arive.

Mon oule osi eksprim mon senser lapresyasyon pour tou manm Au Cap *Neighbourhood Watch*, bann zabitan ki'n komet zot lekor lo en baz volonter avek bi pour ed Lapolis enplimant *community policing*. Mon rekonnnet ki mendev dan Lapolis i enn bann gran kontrent. Me ansanm Lotorite Distrik, ensi ki zabitan nou'n pare pour ede sovgard nou zoli distrik dan sa batay pour asire ki sekirite nou kominote i ava kontinyelman ganny ranforsi.

Mon osi rekonnnet Mr Speaker, ki fodre nou kontinyen entansifye sa batay kont drog. Pli spesifikman bann *hard drugs* - Msye Eroid, Msye Kokain avek Manmzel *Ecstasy*, ki pe kontinyelman ronz nou sosyete e ki fer mon konsernen anver lavenir nou pei. Si nou pa kas sa lasenn modi, ki pe anpay nou bann zenn e enpakte nou bann fanmir ekonomikman, ensi ki sosyal.

Laplipar voler, se bann adikt e akoz zot vole? Pour zot al tir zot malad. Tan ki nou pa elimin sa fleo, nou lalit pour elimin krim dan nou bann kominote pour enn ki anven.

Mon konnen i pa fasil, me mon rekonnnet sipor e zefor ki Gouvernman, Lafors Defans Sesel, ensi ki Lafors Naval Franse, enn nou partner kle pe anmennen dan sa lalit kont drog. E mon soke par lakantite drog ki pe ganny sezi swivan bann patrol ki zot pe fer konstaman dan nou lespas maritim pour deter sa bann ki oule anpwazonn nou pep san en pozman. *Comme dir Father*, "nou konnen lekel zot" e parey Dikton i dir, "100an *pour le voleur* en zour pour son met." I enportan pour gard sa antet.

Letan nou pe koz lo sa menm lespri volontarya, mon oule komann travay ki *Seychelles Powerboats Association* pe fer. E sa i retourn anver laspe lasarite kot plizyer kous nou popilasyon, ki trouv zot dan en sityasyon vilnerab, i kapab ganny en soutyen ki swa dan form finansyel, oubyen dan en lot form. Mon rekonnnet zefor ki Mark Woodcock mye koni konman "Solo" tou dimoun i konn li Au Cap, ek son lekip pe fer. E mon pe profite pour remersye zot senserman pour reponn lapel Lotorite Distrik Au Cap pour ed nou dan demars pour siport detrwa dimoun ki dan bezwen medikal dan nou distrik.

En gran mersi i osi al pour nou Au Cap *Events Club* ki donn bokou zot letan pou ed Lotorite Distrik pour organiz bann levennman pour nou bann fanmir dan distrik. Mersi osi pour tou nou bann partener, ensi ki bann santer ki'n aksepte pour vin sant pour lasarite dan nou distrik dan nou Au Cap *Beach Festival*, ki pour fer Dimans le 26 Mars. Sirpriz pa pou manke. Nou a zwenn zot laba.

Mr Speaker, an sa ki konsern lakaz, demann i enn ki reste touzour primordial. Mon rekonnèt zefor nou Gouvernman pour konsider redwir groser bann *units* lakaz ki ganny konstrir, avek bi pour kapab permet konstriksyon plis lakaz pour menm pri. E sa i anba nouvo Polisi Lakaz.

Par konsekan, sa i ava permet Gouvernman konstrir 342 lakaz an plis ki'n ganny prozekte anba sa menm Bidze. Mon remersi *Minister Rangasamy* e son Minister pour konsider Distrik Au Cap pour sa proze pilot, 8 apartman ki dan faz enplimantasyon. E tre byento nou pou koup riban pour akeyir 8 nouvo fanmir, ki pour antre dan zot nouvo lakaz.

Mon swete ki sa proze i enn ki rantab e soutenab pou nou popilasyon, e ki sa i ava

permet konstriksyon plis lakaz, anvi ki i kontinyelman annan logmantasyon dan laplikasyon pou lakaz dan distrik.

Mr Speaker, en lot proze ki nou pou koup riban tre byento dan distrik Au Cap, se nou fame Lenstiti Kreol ki tre byento pe al pas atraver en faz renovasyon mazer. Mersi nou Gouvernman pou pa les nou Moniman Nasyonal, berso lalang Kreol tonm an rin total.

I sagrin mwan ki a sak fwa ki mon pas dan nou zoli distrik e mon get degenn ki sa batiman mazestyè in arrive. Bondye pitye, petet tre byento, nou pour tann leokri an sanson, bann pasyonnen Bal Bobes fer zot retour lo planse nou lenstiti, ziska kok sante pandan selebrasyon nou Festival Kreol.

Nou pou osi koup riban lo nou nouvo fasilite asize kot nou laplenn futbol pli tar sa lannen, la ki sa proze i dan faz *tender*. Byento, nou pour kapab organiz bann aktivite futbol ek *mass sport* lo en nivo pli eleve, avek bi pour anmenn zabitan ansanm pour sosyalize.

Mr Speaker, Prezidan Nelson Mandela ti dir e mon site "*Education is the most powerful tool which you can use to change the world*". Me letan mon get performans akademik nou bann etidyan dan bann

Lekol Leta, sirtou lo nivo segonder, mon en pe enkyet. Dan en serten lekol lo Mahe, mazorite bann etidyan ki'n al *S4* sa lannen in trouv zot dan grad *General Pathway* e sa i depi *set 3* ki normalman i tonm dan *setting* akademik. Performans e rezilta pa bon, ki fer mon kestyonn ladmisyon bann etidyan dan bann sant pos-segonder akademik ankor dan 2an.

Mon sizere ki Minister Ledikasyon i fer le neser pour revwar kwa ki kapab ganny fer pour relev nivo nou bann etidyan. Par kont Mr Speaker, letan mon get rezilta lo nivo primer, mon ase soulaze. Lo kote lekol Au Cap, 3 etidyan in sorti avek rezilta ekselan swivan legzanmen nasyonal nivo P6. E sa i notaman Jesse Meme ki'n ganny en *A\**, 4 *A's* avek en *B*. Tyler Barbe ki li in ganny 2 *A's* avek 4 *B* e finalman Naomie Onezime ki'n ganny 4 *B* avek 3 *C*.

Felisitasyon pour zot e mon swete ki zot pe kontinyelman travay dir dan zot nouvo parkour, nivo segonder. Mon rekonnèt ki i annan ankor bokou pour amelyor performans. E sa i byensir an term lansennyman laprantisaz, osi byen ki sipor ki paran i

anmennen anver letid zot zanfan.

Malgre sa Mr Speaker, nou bann zanfan e ansennyman Lekol Au Cap pe fer fas avek en sityasyon kot akse avek elektrisite i reste touzour en kontrent. E sa pe kontinyelman afekte lansennyman, laprantisaz dan sa lenstityon e pe elev konsern bokou paran. Mon swete ki tre byento sa sityasyon ava kapab ganny rektifye e nou lekol ava retourn dan en latmosfer agreab pour etidyan avek *staff*.

Boner lannen pase, Gouvernman ti deside entrodwi lasistans *breakfast* pour tou zanfan dan Lekol Leta. Sa in ede pour soulaz kou depans lo bokou paran e popilasyon in vremen apresye sa zes. Malgre plizyer lesey pou sabotaz sa, nou bann zanfan pe vremen benefisyè avek sa servis.

Bann operater *tuck shop*, parey Ms Annie Payet kot Lekol Au Cap, i ganny asiste pour ofer sa servis e bann ansennyman i kapab zwir en laklas pli atantif anvi ki sak zanfan pe kapab manz repa pli enportan lazournen. Akoz set a sa lenstans ki zot gannyan, ki zot ganny sans pour *refuel* zot lekor ki par konsekan, amelyor konsantrasyon.



Felisitasyon Minister Ledikasyon e nou Gouvernman pour reste konsistan anver sa lasistans pour nou bann zanfan. Mr Speaker, mon salye zefor Gouvernman pour travay ki zot pe fer pour rezourd bann sityasyon linondasyon dan plizyer distrik atraver Mahe, e Au Cap pa en leksepsyon.

Mon rekonforte ki alafendefen zabitan Turtle Bay pour aret sibir lenpak delo monte dan zot lakaz osi byen ki dan semen. Mon swete osi ki travay ki Departman Lanvironnman an partenarya avek CAMS, pour *desilt* lanmar rezyon Green Estate ava asire ki tre byento madanm Loizeau e lafanmir Balette ava kapab dormi anpe.

Mr Speaker, pandan ki manda *SLTA* i pour zer Lenfrastriktir Transport lo Later dan en fason efikas, fyab e soutenab par enplimant plan transportasyon lo later nasyonal, avek bi pour zwenn demann lasosyete Seselwa, mon oule komann travay ki sa lazans pe fer dan sak kwen nou pei. Laplipar distrik, enkli Au Cap in trouv en amelyorasyon dan bann lenfrastriktir ki'n ganny met an plas, ki enkli sityasyon semen li menm, *lalimyer, traffic mirrors, crash barriers* eksetera.

Mr Speaker, lakonplisman bann zenn dan sport i inevitab pour koz lo la. Tou resaman, nou'n temwanny an direk kot lekip *ARSU* ti sorti vis-sanpyon Losean Endyen, apre ki zot ti kalifye final, me malerezman perdi kont lekip Morisyen *Quatre Bornes* 3 set lo 2. I enportan pour note ki malgre sa, Sesel ti sorti avek trwa pri venker. Marielle Bonne konman *best outside hitter*, Marie-Helene Rose konman *best server* e Jerina Bonne, kaptenn lekip ti sorti konman *best middle-blocker*. Bann vre pionye *volleyball* fanm Sesel.

Nou priye ki zot a reste en lenspirasyon pour tou bann zenn fiy ki enterese dan sport e felisitasyon pour zot lakonplisman. Kontinyen lev nou paviyon tre o.

Nou osi annan nou tim Foutbol Fanm Nasyonal ki'n reisi kapab etabli en pozisyonnman lo klasman *FIFA* e sa i 160enm mondyal. Mon profite pour felisit Ms Alisha Matatiken, enn mon ansyen etidyan avek son lekip tou le meyer dan zot parkour e ki dan lefitir nou a vwar bann fitir *championnes* foutbol dan Losean Endyen.

Mon osi oule salye Perry Nourrice, en zabitan Au Cap, en zenn profesyonnel ki an se

moman i *manager* Lekip Au Cap FC e ankor enn mon ansyen etidyan. Malgre bokou defi ki i rankontre an term sipor pour lekip, Perry in demontre ki i en zenn tre dinamik e en dirizan tre rezilyan ki pare pour fer fas avek nenport defi.

Mon oule ou konnen ki distrik i la pour apiy ou, e donn ou tou sipor pour ki ou a kontinyen vin en model disipliner pour nou bann foutboler dan lekip. E bravo pour tou nou bann zwer lekip pour zot motivasyon e lentere dan tim. *Premier League, watch out* sezon prosen! Au Cap FC pe vini!

Nou osi annan lezot domenn kot bann zenn pe fer ekstrememan byen, dan en kad profesyonnel. Me en ka an partikilye se mon bon zanmi, *Cadet* Sylvie Tamboo ki'n fer listwar tou resaman par vin premye fanm Seselwa pour anmenn en avyon *Seychelles Air Force*. Felisitasyon *Cadet* Tamboo, pour sa lakonplisman e mon konvenki ki ou lobzektif pour vin en *Commissioned Military Pilot* pou vin en realite. *Keep aiming for the sky!*

Mr Speaker, nou osi annan nou bann zenn antreprenner ki pe fer en travay ekstraordiner pour permet e ankouraz nou sitwayen bouz

nimerik dan en fason pli efikas e soutenab.

En legzanp tipik se *Linkup*, dirize par Mr Trevor Cupidon, ki ofer e promot servis *taxi* a en to pli abordab. Annou osi pa bliy Salim Mathieu e Daria Nitishevski, ki'n resaman ranport pri venker pour zot kreasyon en lazans vwayaz nimerik *Seybooking* dan konpetisyon *business pitching* organize par Sant Enternasyonal Nasyon-z-Ini pour Komers ek Divizyon Lasyans Teknolozi ek Inovasyon. Felisitasyon nou bann zenn antreprenner, ensi ki tou lezot zenn ki pe debourye dan zot bann pti biznes ki zot in etabli.

Bann ki dan demars pour kree enn, mwan swet zot tou le meyer e ki zot ava konn sikse dan zot bann demars.

Mr Speaker, lalis i long. Si mon kontinyen koz lo lakonplisman bann zenn dan nou pei, fernwanr pour fer. Me i enportan pour nou rekonnnet e ankouraz nou bann zenn, aköz se zot lavenir nou Nasyon *bien aimée*.

Letan nou pe koz lo biznes, mon ti a kontan salye tou bann biznesmenn dan distrik Au Cap ki malgre plizyer defi ki zot osi zot rankontre, zot

kontinyelman anmenn sipor anver zot distrik *bien aimée*.

Mon pa pou kapab nonm non zot tou akoz i annan tro bokou zot Mr Speaker. Me zot konnen lekel zot. Mersi pour sa sipor ki zot anmennen anver nou distrik e mon priye ki sa relasyon korporel i kontinyen. San zot nou distrik pa pour bouze.

Mr Speaker, *sports* i en domenn dan Gouvernman ki ti'n ganny plizoumwen mal ganny antretenir pandan plizyer lannen, kot nou'n vwar Gouvernman aktyel pe antreprann bann travay reparasyon mazer lo serten nou bann lenfrastruktir sportif nasyonal ki enkli *Palais de Sport*.

Mon profite pour felisit Mr Marc Arissol, en zenn profesyonnel tre prominan e mon swet li tou le meyer dan son parkour konman nouvo Sef Egzekitif Nasyonal pour *Sport*. E mon konvenki ki anba son direksyon, sa Konsey ensi ki *sports* an zeneral pour bouz pli an avan.

Tou resaman Mr Speaker, mwan ansanm avek Onorab Adelaide, nou ti ganny sans pou al obzerv prosesis eleksyon bann nouvo Manm Lasanble Nasyonal Lazes kot Lekol segonder Anse Royale. Nou ti

asiste prosedir an antye, kot bann etidyan ti ganny sa loportinite dan en fason zis e kler, pou vot pour sa kandida ki zot santi i le meyer pour reprezant e vin lavwa zot lenstitisyon.

Fodre dir ki pour premye fwa ki sa levennman i ganny organize dan sa fason, bann etidyan ti demontre bokou lentere pour pas atraver sa prosedir. Akoz zot ti pe ganny sans zot osi eksperyans ki mannyer prosedir eleksyon nasyonal i ganny fer pour zot menm. E menm bann kandida ti eksite pour konnen lekel ki pour sorti venker.

A lafen, sete Jefferson Isaac ki ti ranport eleksyon avek 113 vot, swivi par Ms Shania Jean sorti Au Cap avek 53 vot. Nou swet Jefferson tou le meyer dan son nouvo manda e mon swete ki ou rev pour vin fitir Manm Lasanble Nasyonal elekte pour distrik Baie Lazare i en zour realize anba gidans Onorab Adelaide.

En senser remersiman i al pou Konsey Nasyonal pour bann Zenn SNYC, anba direksyon zot zenn Sef Egzekitif Mr Albert Duncan, pou organiz eleksyon e ankadre tou bann kandida pour asire ki sa prosesis i deroul byen dan sak lekol.

Mersi osi pour bann etidyan. *Headteacher* lekol, Mis Berguitta, Mis Vivette, Mis Nathasha, Mis Francisca enkli lezot ansennyan ki'n donn en koudmen e nou rekonnet zot lapresyasyon e fason ki zot in akeyir nou dan zot lekol.

Mr Speaker, bann travayer lasante i zwe en rol esansyel an sa ki konsern promouvwar lasante nou pep. Mon salye zefor Gouvernman dan zot demars pour kapab konstrir en nouvo Lopital Sesel, avek bi pour elev nivo swen e servis ki bann pasyan i resevwar. Ensi ki garanti en meyer kondisyon travay pour nou bann ners, Dokter ek lezot travayer lasante.

Me par kont Mr Speaker, fodre pa ki nou bliy nou bann sant lasante rezyonal ki i annan ki nesesit travay renovasyon. Parey klinik Anse Aux Pins, ki deservi en kous popilasyon Au Cap, ensi ki lezot distrik, tel ki Anse Aux Pins li menm, Pointe Larue e menm en parti distrik Cascade.

Mon salye devouman bann travayer, ki malgre bann defi ki zot rankontre zot travay san ses pour donn bann pasyan en servis de kalite e alaoter. Mr Speaker, mon pa pour kapab termin mon repons lo diskour Leta Lanasyon, san mansyonn

e remersye sa tim fanm solid a leksepsyon nou sel zonn ki **nou handyman**, Yannick kot Biro Ladministrasyon Distrik Au Cap. E sa i konpri nou *DA*, Ms Sabrina Assary, nou *office assistant* Ms Sabrina Simeon, nou *office manager*, Ms Inese Sinon. Ms Pascalina Joseph, Ms Lindy Bristol, Ms Natasha Mathiot e Ms Nadine Magloire.

En remersiman pli spesyal i al pour mon *constituency clerk*, Mr Darius Petrouse, mon lanmen drwat ki travay tre dir, pour asire ki travay ant lofis *MNA* avek Ladministrater Distrik ensi ki bann lezot lazans konsernen i deroul dan en fason koeran.

Mon rekonnet sa zefor kolaborativ ki nou tou nou pe mete pour nou reisi ansanm zwenn nou target dan fason pli efektif. E sa se progre e lepanouisman nou distrik *bien aimée*. Mon priye ki lannen 2023, i en lannen avek bokou sikse e ki ansanm nou ava akonplir e aprann plis ansanm dan lape e larmoni.

Finalman, mon oule remersye Bondye Tou Pwisan ki'n enspir mwan pour prezant mon deliberasyon dan sa Lasanble ozordi. Mersi pour ranpli mwan avek ou lasazes akoz san ou gidans, mon pa ti pour kapab delivre dan mon

travay e mon priye ki ou kontinyen vers ou benediksyon lo sak zabitan dan nou zoli distrik Au Cap. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Samynadin. Prosen entervenans lo lalis se Manm Elekte pou distrik Baie Ste Anne Praslin, sa se Onorab Churchill Gill.

**HON CHURCHILL GILL**

Mersi Mr Speaker. Bonn apre midi tou Manm Onorab, bonn apre midi tou dimoun ki pe swiv sesyon Lasanble. Bonn apre midi tou zabitan Baie Ste Anne.

Mr Speaker ozordi Manm nou Lasanble pe entervenir pou donn reaksyon lo diskour Leta Lanasyon Seselwa. Sa legzersis pe pas dan en moman kot lemonn, plizyer pei dan lemonn modern byen avanse dan domenn syantifik e teknik kote kapasite ti devret ganny epwize o maksimonm, pou kre en lanvironnman tre favorab pou sak sosyete. Kot legzistans sak zonn, fanm, zanfan koman adilt i ganny valorize son totalite.

Me non pa sa ki pe pase, dan plizyer kwen lemonn, lager, destriksyon, malis, revanz,

dezas, katastrof pe ravaz trankilite plizyer fanmir. Zonn, fanm, zanfan koman adilt, bokou ganny promote par personnaz ki apel zot lekor bann *Leaders*. Pou fer Sesel vin touzour pli meyer ki yer o sans, sezi la, pa perdi lespwar.

Zabitan Baie Ste Anne pa les brouyar bann ki pe kanmoufle zot lekor anba bann gro tapi, fer zot perdi vre sans lazistis. Zot determinasyon, konfyans dan sa zonn ki zot in elekte pou anvoy koman zot reprezantan, zot lavwa dan Lasanble Nasyonan mwan ki pe adres zot.

**(APPLAUSE)**

**HON CHURCHILL GILL**

La ozordi mon swe senser, touzour senser se en Praslin pli meyer ki yer. En Praslin ini. En Praslin devlope dan tou son potansyel. Kot sak nou bann zanfan ki ne, grandi i ganny sa vre loportinite pou devlop tou son potansyel. E vreman apresye ki wi, mon vwar mwan dan tou mon dimansyon. E mon limite, pardon. E mon limit se mwan ki pe determinen pa person. Alor mon bezwen pran lavi serye, reste ferm evit bann move tantasyon ki kre risk e ki kapab fer ou perdi direksyon.

Wi, se nou prop determinasyon, nou prop desizyon pou reste fokalize lo sakenn dan nou misyon. Ki definir ki nou pou vini demen.

Mr Speaker, sakenn dan nou bann fanmir ti annan en lekspektasyon e zot kontinyen annan sa bann lekspektasyon. Alor mon envit ou sakenn mon bann ser, frer Seselwa pou komans angaz ou dan en refleksyon serye. Demann ou menm, eski mon lekspektasyon pe ganny akonpli? Eski mon vwar mwan pe progrese oubyen rekile dan sa parkour lavi? Ki desizyon mon bezwen pran la konmela e dan lavenir pou fer Sesel mon lavi ek mon fanmir bokou pli meyer?

Mr Speaker, dan son ladres Leta Lanasyon, Prezidan Larepublik in dir nou ki tre byento son Ladministrasyon pou ganny preski 3an dan gouvrenans pei. Nou'n ganny dir ki Seselwa i fristre e menm Prezidan li menm i dir i fristre. In eksplik nou aköz Seselwa i fristre, se par bann pti, pti keksoz. In nonm en *call* ki pa ganny reponn, en larepons ki ganny promet me pa ganny donnen. Pasyan pa ganny lenformasyon ki zot bezwen. Laplikasyon pou en travay pa ganny larepons. Solisyon senp i

pran 6 mwan. Lesplikasyon senp pa ganny donnen.

Mr Speaker, eski tou sa bann dimoun ki swadizan pe fer sa bann keksoz, zot napa en Siperyer zot? Sa Siperyer, pa li osi i annan en Siperyer?

**(APPLAUSE)**

**HON CHURCHILL**

Kwa ki pe anpes sa bann siperyer rezourd sa bann pti, pti problem? Sel zistifikasyon mon mazine, se ki i annan en nivo lenkonpetans tre serye.

**(APPLAUSE)**

**HON CHURCHILL**

E si sa i le ka, sa bann problem pa pou zanmen ale, e fristrasyon pou kontinyen annan. Mr Speaker, mon pa krwar ki fristrasyon ki sa pep i annan se sa bann pti, pti keksoz.

Seselwa in elekte en dirizan, in apwent son Ladministrasyon pou adres tou sa bann pti, pti keksoz e zot ekspekte i ganny adrese.

Mr Speaker, mwan mon krwar ki vre fristrasyon sa pep se promes ki'n ganny fer ki pa ankor delivre.

**(APPLAUSE)**

**HON CHURCHILL GILL**

Mon koz avek bokou dimoun, e zot fer mwan konpran ki zot lekspektasyon ki zot ti annan i dan sonm. E zot pe demann kestyon toulezour, kan ki zot pou vwar en soulazman dan zot pers ek zot portfey?

Mr Speaker, vre fristrasyon sa pep se difikilte pou Seselwa fer 2 bout zwenn, pri lavi i tro ser Sesel. Difikilte pou ganny serten lasistans, espesyalman bann ki vreman merite. Mr Speaker, i annan fanmir la deor ki vreman dan gro problem, e apre preski 3an Prezidan in anonse ki ASP ek Minis Finans in fer en travay ekstraordiner. E tre byento, mon repete tre byento zot pou kapab prezan donn Seselwa ki dan pli bezwen bann lasistans. E zot pou ganny en logmantasyon dan bokou bann lasistans. Mr Speaker e sa nou'n ganny dir tre byento, anmezir ki ASP i senplifye bann prosedir.

Be Mr Speaker, tre byento avek an mezir pa soulaz soufrans bann dimoun ki dan bezwen. Seselwa i anvi konnen espesyalman zabitan Baie Ste Anne, zot in dir mwan demande kan silvouple. Akoz i annan preski 3an ki zot in ganny arase sa bann sipor. Mr Speaker, dan lespri kontinite ant

Ladministrasyon e Gouvernman dan en pei i normal pou erite parey in ganny dir in ganny fer sorti dan SONA. Espesyalman lo bann proze dan distrik Baie Ste Anne. Par egzantp Gouvernman ozordi in erit proze lo Zil Eve nouvo lasose pasaze. Mr Speaker a sa pwen permet mwan remersye Ladministrasyon Prezidan Rene, ki ti annan en vizyon pou kre sa morso teren ki apel Zil Eve.

**(APPLAUSE)**

**HON CHURCHILL GILL**

Ti ganny konble an 2001, en grander 25 ektar, in kout R28 milyon an 2021 pou fer sa travay. Dokiman ti ganny prepare an 1998 konteni dan en plan devlopman 25an.

Ozordi dan lannen 2023 i fer egzakteman 25an. Se sa rezon ki ozordi diferan dimoun Praslin pe benefisyse atraver *tender*, pou zot lans dan zot prop biznes e sa mon tre kontan akoz sete sa rezondet sa konblaz.

**(APPLAUSE)**

**HON CHURCHILL GILL**

Lo Zil Eve i osi annan plizyer lenfrastruktir ki ofer plizyer servis, tel parey stasyon *Fire*

*Brigade*, lekol primer, basen naze, plizyer garaz, plizyer landrwa ki fer travay *fiber glass*. Plizyer lezot biznes ki'n fini etabli, *School Meal*, nouvo lasose *cargo*, laplenn foutbol, *SEYPEC*, *STC*, e lezot ankor. Tou sa bann lenfrastruktir biznes in posib gras a nouvo teren, linisyativ ki ti vre ki en vre vizyoner ti'n prevwar byen lontan 25an pase. I osi annan sa morso later kot sa nouvo lasose pasaze in ganny konstrir.

Zour son louvertir sa levennman ti ganny tre politize, me pa pou bann bon rezon. Mr Speaker, mon ava eksplike akoz. Baze lo santiman zabitan Baie Ste Anne lo sa size, sa terminal pasaze pou servi Zil Praslin an antye. Me pa en distrik e la mon le met lo rikord ki mon napa okenn problemm avek lafanmir Grandcourt. Me ler sa non in ganny devwale, in reflekte plis koman en senbol divizyon ant sa 2 distrik. I parey en lagrenn divizyon ki'n ganny plante dan nou zil. E si nou pa fer atansyon nou pou vwar nou ki viv lo Praslin pe toultan tiray kanmarad.

Kestyon alor ki nou fer ek lagrenn divizyon? Zabitan fodre nou ouver nou lizye pou konpran kwa ki pe ganny mannevre lo nou zoli zil. Mwan

koman Manm Elekte pou distrik Baie Ste Anne, mon vwar e konpran tre byen sa bann mannev. E mon oule donn zot mon lasirans ki toultan ki zot elekte mwan koman zot reprezantan dan Lasanble, sa bann mannev pou ganny demaske.

E la nou'n ganny dir ki pou annan proze Kato Nwar konpri *marina*, *multi-story car park*, batiman komersyal. An pasan mon oule enform zabitan Baie Ste Anne ki i annan en Komite ki'n ganny met ansanm par Prezidan Larepublik. Me mwan koman zot Manm Elekte mon pa'n ganny enkli lo sa komite.

Ankor enn fwa tel proze pou posib gras a sa vizyon kler ki ti'n fini fer sa fondasyon nesaser, pou distrik Baie Ste Anne kapab annan devlopman pou plizyer lannen.

Mr Speaker, avan sa proze nouvo por pasaze ti ganny fer nou ti pe servi en lasose ki ti'n tre konzeste e tro pti. Sa se rezilta oubyen konsekans pozitiv bokou devlopman ki'n ganny fer lo Praslin dan lepase.

Me in toudmenm deservi Praslin ek son zabitan pou bokou lannen. Alors Mr Speaker, mon oule met lo rikord, sezi sa loportinite pou remersye sa bann dimoun



swivan. Zot tou in reste e grandi dan distrik Baie Ste Anne. Zot in travay dir pou fer sa ansyen lasose. Se Mr Alois Rose e son garson Gerald Rose dan son bato Ste Anne ki ti anmenn siman e lezot materyo, enkli bann transpor sorti Mahe ki ti ganny servi pou anmenn bann materyo. Mr Ravil Lesperance, Mr Joyce Adrienne dan bato Louis Alfred ki ti anmenn siman e lezot materyo. Mr Francois Pool ki ti travay lo Louis Alfred ek bokou lezot koleg. Mr Marc Samuel Gappy ki ti en *foreman* pou fer sa travay. Mersi, mersi, mersi bokou pou zot bon travay.

**(APPLAUSE)**

**HON CHURCHILL GILL**

Mr Speaker, ti neser ki sa bann dimoun i ganny remersye pou zot travay ki'n ed sa zil pou ariv kot i ete ozordi. An *testimony* pou zot bon travay ozordi menm *Coast Guard* in ganny en landrwa pou zot baz zot bato lo Praslin.

Mr Speaker, menm si sa nouvo lasose ti en neser, me vi ki son plan orizinal ti ganny revwar e sanze, in koz serten defayans. I pa akseptab pou en zil parey Praslin napa en biro lenformasyon pou viziter. Mon pe demann Minister konsernen

pou regard dan sa sityasyon pou en solisyon imedyat.

Mr Speaker, koman Manm Elekte pou distrik Baie Ste Anne e pou benefis tou zabitan Baie Ste Anne, mon le met lo rikord ki sa bann proze swivan ti'n fini desid lo la avan nouvo Ladministrasyon i ganny elekte an 2020. E sa se nouvo por pasaze, nouvo kord gard, nouvo bazar, nouvo por lapas e *gear store* semen Laplenn Olandez. Tou sa bann proze, mwan personnelman mon'n touzour pe pouse e mon'n form par dan diskisyon avek bann Minister konsernen ek zot tim teknik.

**(APPLAUSE)**

**HON CHURCHILL GILL**

Mr Speaker, nou'n ganny dir ki sa Ladministrasyon pou rekonpans Seselwa. Mon oule lans en lapel spesyal avek sa Ladministrasyon, konsernan zabitan Praslin ek La Digue. Konmkwa ki nou tou lo sa 2 zil nou ankor pe pey tou keksoz pli ser ki lo Mahe. Kan ki sa Ladministrasyon pou get dan sa problem? Kan ki zabitan sa 2 zil pou ganny en soulazman reel e dirab? Konbyen letan ankor ki zabitan sa 2 zil pou kontinyen sibir sa fardo pri ser konpare avek Mahe.

Mr Speaker, vi ki Prezidan Larepiblik i responsab zil Praslin, silvouple dir nou ki ou anvizaze fer pou adres sa size. Dan repons Bidze mon ti demann bann Minis pou komans vin vwar dimoun lo Praslin ek La Digue, parey zot fer zot vwar zabitan lo Mahe. Sa vizit i posib aköz dan sak zot Bidze i annan en provizyon pou *domestic travel airfare*. Silvouple servi sa pou donn en zour pou zot vwar zabitan Praslin ek La Digue, i sel fason pou zot konpran vre soufrans sa bann dimoun.

**(APPLAUSE)**

### **HON CHURCHILL GILL**

Menm si nou'n tann dir ki sa pei pe ganny fer marse koman en biznes, bann serten desizyon ki pe ganny pran i pa neserman an liny avek vre *business knowhow*.

Mr Speaker, tou dimoun Sesel i konnen ki Praslin i depan bokou, elarzman atraver aktivite touristik pou lekonomi zil marse an term lanplwa e biznes. Me i annan en tandans ki pe devlope, sa pe seryezman afekte biznes lo Praslin e pou kontinyen afekte dan lefitir si en desizyon pa ganny pran.

Ozordi bokou biznes, *guest house* e lotel lo Praslin pa

neserman ganny bokou kliyan an relasyon avek lakantite touris ki pe antre dan pei.

Mon konsidere ki sa i en stratezi kalkile. Rezon se ki mazorite *arrivals* i ganny ankouraze pou reste Mahe, vi ki mazorite zot i vin atraver *DMC*. E sa i fer li posib pou ogmant lakantite *day trippers* pou al lo Praslin ek La Digue. Sa fenomenn i afekte biznes ekskirsyon, *passenger ferry* lo Praslin dan en fason tre alarman.

Sa aparman dan lot *factor Air Seychelles* ki'n redwir konsiderableman, touzour an relasyon avek lakantite *arrivals*. Sa i vedir ki mazorite *tourist* ki pe vin Sesel pe reste lo Mahe, ki i vedir ler zot reste Mahe? Lotel ek *guest house* lo Praslin i perdi biznes, bann konpanyen ki fer *day trip* sorti Mahe i benefisyè avek *day trippers* toulezour.

Kestyon se kote sa bann *day trippers* i depanse? Eski sa i en lapros oubyen i en stratezi pou redwir biznes lo Praslin? Zabitan Praslin sa i en pwen konsern tre serye. Se la kot prezans plizyer *NGO* i neserman pou en travay konzwent, avek bi pou trouv en solisyon pou sa bann konsern. Me malerezman nou ti annan *Praslin Business Association* me i nepli ganny

reprézante, me plito ganny met akote.

Akoz i napa en konvèsasyon ki ganny inisye par Prezidan Larepublik vi ki i pe ansarz Praslin, pou get dan sa sityasyon pou benefis tou sa bann biznes lo Praslin, pou sa bann dimoun kapab ganny en bout sa gato ki pe ganny kwi Sesel, dan nou Lendistri Touris.

Mon bann ser, frer ki dan biznes touristik, swa dan lotel *Guest House*, ekskirsyon, *passenger ferry*, *dive center*, restoran, vander fri, artizan, *taxi drivers*, *omnibus*, *car hires*, *nature reserve*, *take-away vendors*. Mon rekonnèt ki nou zil pe pas dan en sityasyon tre serye. Mon avek zot. Mon konpran zot defi, nou tou ansanm nou bezwen kontinyen pouse pou nou arive vwar en solisyon. Pou ki en nouvo lapros ki benefisye tou parti ava ganny seryezman konsidere e enplimante dan mwens dele posib.

Zabitan Baie Ste Anne nou bezwen kit nou lizye ouver, debout pou nou distrik e nou zil, Praslin. Napa personn dan sa Lasanble ki pou pli konn santiman zabitan Baie Ste Anne, plis ki sa bann zabitan zot menm. E mwan koman Manm Elekte mon pou fer sir ki sa bann santiman i ganny pase

pou ariv lo en meyer rezilta, pou nou tou. Mersi Mr Speaker.

**(APPLAUSE)**

**MR SPEAKER**

Mersi Onorab Gill. Prosen entervenans lo lalis i Manm Elekte pou distrik Anse Etoile, Onorab Georges Romain.

**HON GEORGES ROMAIN**

Mersi Mr Speaker. Bonn apre midi Mr Speaker. Bonzour tou Manm koleg Onorab, tou dimoun ki a lekout. E en bonzour spesyal pou tou zabitan Anse Etoile.

Mr Speaker, pou mwan i touzour en privez pou fer mon repons lo diskour lo Leta Lanasyon. Mon ti a kontan premyerman remersye e felisit nou Prezidan pou son diskour ki ankor enn fwa in donn nou bokou lespwar pou lavenir nou pei.

Nou Prezidan in vin koz fran lo sityasyon nou pei. E malgre bann move kondisyon ki sa nouvo Ladministrasyon ti vin zwen sa pei ladan an 2020, ansanm ek bann defi ki lemonn e Sesel osi ti pe fer fas avek, nou'n kapab reisi e akonpli bokou. Nou pei in kapab fer bokou progre e nou'n reste rezilyan kont sa bann defi.

Ozordi nou kapab dir ki nou vreman fyer pou sa bann lakonplisman. E tousala annou pa bliye se gras a direksyon en Gouvernman ki serye e ki annan en vizyon pou nou pti pei Sesel.

Mr Speaker, ler nou get lemonn antye ki ankor pe soufer avek lefe advers ki COVID in anmennen 2an pase. Nou fyer ki nou pti pei Sesel in kapab remet son lekonomi debout apre sa bann difikilte ki nou'n pas atraver. Ozordi Sesel nou'n vwar ki son lenflasyon i parmi enn ki pli ba dan lemonn. Konpare ek en pe plis ki 10poursan dan bokou pei devlope, nou Sesel nou'n vwar en lenflasyon ki mwens ki 3poursan lannen pase.

Ler nou get nou Roupri Mr Speaker, nou vwar ki in tenir tre for kont Dolar ek Ero e i ankor pe mentenir en stabilite vreman enpresyonnen. Ler nou get lenpak ki lager *Ukraine* in annan lo lemonn enkli nou pei, sirtou atraver pri lenerzi e pri transportasyon, nou vwar ki Sesel in sirmont tou sa bann difikilte avek gran sikse.

Mr Speaker, ozordi kot lezot pei dan lemonn pe pey en pri tre o pou karbiran, menm ti annan pei kot ti annan mankman sa prodwir, nou isi Sesel pri lo laponp in desann

preski menm pri ki i ti ete avan COVID.

Mr Speaker, mon mazine ki tou Seselwa in kapab vwar en rediksyon dan pri elektrisite. Kot an mwayen nou'n vwar en rediksyon apepre R300 lo zot *bill*. E sa ankor Mr Speaker, nou fyer pou dir ki sa i en rezilta en rediksyon dan pri karbiran e osi an rezilta bon zesyon lo tarif elektrik ki Komisyon Lenerzi in kapab fer pou *minimize* bann gro logmantasyon. E protez PUC ki li osi i bezwen pey son pri pou karbiran e son kou looperasyon. Ankor enn fwa Mr Speaker, sa se gras a en Government ki pe zer bann looperasyon byen e annan son pep a ker.

Mr Speaker, pou en pei ki, son lekonomi i depan en kantite lo tourizm, nou vreman apresye travay ki'n ganny fer pou nou pei rebran apre ki COVID ti'n tap nou. Ozordi nou pei pe akey bokou viziter sorti dan diferan kwen lemonn pou zot vin pas zot vakans Sesel. Stabilite ki nou annan dan nou pei, nou labote natirel e servis ki nou pe ofer i enn ki kontinyelman atir bann viziter ki pe ede pou ogmant nou reveni nasyonan.

An 2022 nou'n ganny nou en pti pe plis ki 332mil touris konpare avek selman 182,849

an 2021 ki reprezant en logmantasyon 82poursan dan nonm viziter ki'n debark Sesel. E sa i montre ki mannyer ki nou koman en pti pei, nou kapab redres nou lekonomi dan en kourt peryod letan. Pou kontinyen nou travay pou mentenir larises nou pei. E la nou reste ankouraze pou tandé ki i annan lezot laliny aeryen parey *Saudi Airline* e lezot ki pe donn zot lentansyon pou anvol Sesel.

Ler nou get *Air Seychelles* Mr Speaker, nou laliny aeryen nasyonal ki ti'n mal ganny zere dan lefase e kot bokou det e perd ti'n ganny fer, nou vwar ki depi ler sa Gouvernman in vin o pouvwar in annan plizyer demars ki'n ganny fer pou esey rektifye bann problem ki *Air Seychelles* ti ladan. Ozordi nou pa pe koz pou frenm li; nou pa pe tann nonm okenn *redundancy* oubyen menm ni fer retournen avyon.

O kontré Mr Speaker, sa ki nou pe vwar se nou laliny aeryen pe fer bokou vwayaz dan lemonn e pe fer flote nou paviyon dan plizyer erport dan lemonn. E pli enportan san okenn sibvansyon sorti kot Gouvernman. Menm nou'n tandé ki *Air Seychelles* pe fer profi Mr Speaker. Me par kont Mr Speaker, si Gouvernman *US*

ti ankor o pouvwar, *Air Seychelles* ti pou zis en keksoz lefase. Mr Speaker mon poz sa la.

E la depi lannen pase Out Mr Speaker, nou'n aprann ki *Air Seychelles* i sa premye laliny aeryen o monn ki'n ganny permisyon pou kapab anvol dan lespas *Saudi Arabia* anrout pou *Israel*. Sa i anmenn bokou benefis, tel ki redwi lakantite karbiran ki avyon i servi lo sa larout. E aköz sa i kapab anmenn ankor 20 pasaze an plis lo sa larout.

La mon le profite pou felisit *Board, Management* ek tou travayer *Air Seychelles* pou sa bon travay ki zot pe fer. E mon swete ki zot a kontinyen dan sa bon direksyon.

Mr Speaker, en lot lakonplisman dan lannen 2022 ki'n soulaz bokou dimoun se sa reentrodiksyon trezyenm mwan saler. Sa in posib aköz Gouvernman in byen zer son Bidze e in kapab retourn sa benefis ek travayer Gouvernman. Ler i pa ti kapab nou ti vwar en Gouvernman ki ti fran, onnet e responsab. Ki ti vin anver son pep pou eksplike aköz pei ti napa mwayen pou pey en trezyenm mwan saler.

Avek sa reentrodiksyon, Gouvernman ti'n garanti 50poursan sa trezyenm mwan

saler e lot 50poursan ti pou baze lo performans. Be ki nou'n vwar? Se lamazorite travayer Gouvernman in resevwar 100poursan sa trezyenm mwan saler. E sa menm si lopoziyon ti pe fann bokou propagann lo sa size.

E la Mr Speaker, nou vwar ki Gouvernman pe al revwar saler tou travayer Gouvernman apartir Avril sa lannen. E kot osi serten bann *allowance* pou ganny entegre dan zot saler debaz, an plis en logmantasyon 10poursan.

Mr Speaker, la mon kontan pou tande ki i osi annan biznes prive ki pou donn logmantasyon zot travayer. Mon ti ava kontan felisit sa bann biznes prive e osi ankouraz lezot pou fer parey. Sa i montre Mr Speaker ki nou lekonomi pe fer byen. Nou pei pe al lo en bon semen e i pe prospere.

Mr Speaker, anba sa Ladministrasyon *LDS* menm si nou'n pas dan serten difikilte nou'n kontinyen rod fason pou fer bann proze lenvestisman ki bokou fwa nou'n tann lopoziyon dir pa fer. Sa i enkli proze semen, proze dan bann por, proze lakaz pou mon nom enn de. E sak fwa ki sa bann lenfrastruktir i annan en louvertir se sa menm lopoziyon pe sey reklanmen ki zot ki ti par

deryer. Me si nou ti'n ekout zot Mr Speaker proze pa ti pou zanmen fini.

Mr Speaker, Seselwa i merit vwar lekel ki pe anmenn progre dan sa pei e lekel ki pe sey met retar dan nou progre. Akoz si nou pa investir dan reparasyon e dan nou nouvo lenfrastruktir, nou devlopman pou ganny afekte. E sa i pa bon ditou pou lavansman en pei.

Me Mr Speaker, i annan bokou lezot proze ki zot pou vwar sa lannen ankore. Nou annan Lopital La Digue ki pou ouver. Devlopman dan Lasose La Digue ek Praslin. Devlopman semen e sistenm *sewage* lo La Digue. Nouvo lekol primer e segonder lo La Digue. Libreri Nasyonal ki pe al re ouver tre byento apre en renovasyon entansif.

Fasilit sportif tel ki kot Stad Linite ki pe met nouvo *track* ek *astro turf*. *Palais de Sport* ki'n sanz son twatir. E menm nou'n okouran ki pou annan en *Juvenile Centre* lo Praslin. E sa ler pou ouver pou kapab ed nou bann zenn ki annan problemm disiplin e konportman.

Mr Speaker, lo kote Anse Etoile nou pou annan konstriksyon 24 *unit* lakaz La Gogue. E larzan in fini mete dan Bidze sa lannen. E si tou i al

byen i pou pran 15 mwan pou konplete e sa i ava ede soulaz en pe problem lakaz dan distrik. Nou pou vwar byento en nouvo bazar pou Anse Etoile. Kot peser ava vann zot pwason dan en lanvironnman pli konvenab.

La Retraite pou ganny son bazar legim la ki larzan in ganny mete dan Bidze pou 2023. E la osi mon espere ki nou ava kapab fini rezourd sa problem delo pou nou bann ferme dan distrik. Nou pou reganny nou Kordgard apre ki renovasyon i ganny konplete. Sa Mr Speaker, i pou soulaz nou bann zabitan ki'n fer bokou demann pou nou kapab reganny nou Stasyon Lapolis aktiv dan nou distrik.

Nou pou kontinyen ek nou bann proze dan nou distrik. Sa i enkli agrandisman semen dan La Gogue. Proze drenaz dan La Retraite, Quincy e La Gogue ek lezot landrwa. Proze *crash barrier* dan Maldive. Re sirfas bann semen segonder kot pa ti ankor konplete. Proze lalimyer semen dan Ste Helene dan Kafe kot bann flat La Gogue ek lezot landrwa.

Mr Speaker, nou Ladministrasyon in fer bokou ozordi pou donn loportinite son pep. Ozordi nou vwar ki tou Seselwa ki anvi travay i kapab ganny en travay. Nou'n vwar

mwan pase dan en *job fair* ki ti annan kot ICCS, ti annan bann diferan lakonpanyen ki ti pe *advertise* bann *vacancy*. E nou ti vwar ki i annan plis ki 700 *post* travay ki ti pe ganny pibliye dan diferan domenn. Dan Lendistri Touris, Lapes, Ladefans, Lapolis e plizyer lezot.

Nou Ladministrasyon i enn ki krwar dan kontribisyon son pep pou nou lekonomi marse. Pou bann ki kapab travay me pa pe fer li annou reflexir byen. Pou bann ki kapab reflexir byen fodre zot leve e pran zot responsabilite e angaz zot dan en lanplwa pou zot siport zot fanmir. Gouvernman i toultan ganny kritike ki i annan en kantite etranze ki pe kontinyelman pran bann travay ki Seselwa ti kapab fer. Mr Speaker, oli sa bann Seselwa ki annan sa bann kapabilite? Akoz definitivman nou annan sa lafors travayer dan serten sekter.

Me malerezman dan bokou lenstans fodre ki nou Seselwa nou pran plis responsabilite ek komitman anver nou travay ki nou ava kapab devlop en lafors travayer ki Sekter Prive ensi ki Gouvernman ava kapab kont lo nou dan plas fer vini etranze.

Mr Speaker, enn bann lakonplisman ki nou bezwen tre fyer koman en pei, se sa bon Gouvernans ki nou pei i annan e ki la demokrasi dan nou pei i solid. Annou regard nou pozisyon dan lemond an relasyon avek plizyer Lendis tel ki Drwa Imen, Laliberte Lapres, Persepsyon Koripsyon, *Mo Ebrahim Index*.

Ankor en fwa Mr Speaker, Sesel in sorti premye dan Lafrik dan tou sa bann Lendis eksepte *Mo Ebrahim Index* kot zis Moris ki'n depas nou. Akoz i reste nou ankor en pe travay ki nou pe deza fer pou fasilite lafason ki biznes i ganny fer dan nou pei.

Ler nou regard laliberte lekspresyon dan sa pei, nou vwar ki napa personn ki per pou eksprim son lopinyon, me malerezman nou menm vwar enn de endividi ki abiz sa privez e senm bokou propagann ek negativite. E menm mank respe pou nou bann dirizan. Menm si zot pwennvi i diferan, rar nou vwar ki zot vin avek solisyon kot zot ti ava kapab kontribye dan en fason pozitiv.

Mr Speaker, ozordi Sesel i ganny regarde dan lemond koman en Sanpyon Lanvironnman ek Lekonomi Ble. Sesel i ganny vwar koman en lavwa serye pou ed lezot kont

bann lenpak advers ki sanzman klima pe anmennen. Sirtou lo bann Pti Leta Zil. Nou fyer koman en Seselwa ler nou vwar nou Prezidan pe adres bann *forum* enternasyonal e pe debout for pou bann pti leta zil. Bravo Mr Prezidan, pou sa travay formidab ki ou ape fer kot ou pe fer non Sesel ganny sa respe dan tou kwen lemond.

Me Mr Speaker, malgre nou'n fer bokou progres i reste ankor defi ki nou bezwen fer fas avek e ki nou konnen ki i kre serten fristrasyon. E la, mon le fer enn de remark lo sa size. I ankor annan detrwa dimoun ki pe trenn lipye parey nou toultan kontan dir. Tarde reponn *email*, pa anmas telefonn e pe kontinyen senm sa fristrasyon dan nou popilasyon e sa pa akseptab ditou.

Par egzamp, latitid dan travay e dan Servis Piblik i reste enn sa defi enportan pou nou korize. Nou'n kontinyen fer fas avek serten dimoun ki pe travay dan Servis Piblik ki dir avek dimoun "Eskize, mon pa kapab fer plis ki sa, akoz sa ki ti dir ou tik anler in dir nou fer koumsa".

Mr Speaker, sa pa pe montre latitid responsabilite, konpasyon oubyen bon fason travay. Me plito i pe montre en latitid anmenn politik dan travay, kre fristrasyon avek bi



pou destabiliz e sali zimaz sa Gouvernman. Se sa bann mantalite ki sa Gouvernman fodre eliminen dan Servis Piblik. Nou Servis Piblik i devret annan dimoun ki vin travay ek son leker koman en profesyonnel e avek en sel bi pou deservi tou kliyan san okenn faver oubyen malis.

Mr Speaker, en pti pei parey Sesel pa devret annan divizyon. Nou pa kapab diviz sa pei e nou pa kapab servi politik pou kre dezord, oubyen pran desizyon popilis olye desizyon ki baze lo la realite nou lekonomi. Par egzanp, ler nou dir ek pep Seselwa ki laz pansyon i bezwen mont ankor par 2an, i senpleman akoz napa ase dimoun prodiktiv ki pe travay pou soutenir nou popilasyon ki pe aze.

Nou sel bi se pou protez bann ki'n donn tou pou zot pei, pou fer sir ki zot pansyon e zot sekirite sosyal, i garanti pou zot lavi. Ozordi dan lemonn i annan bokou bann pei ki bokou pli devlope ki Sesel kot zot pe osi fer laz pansyon monte. Akoz dimoun pe viv pli lontan e zot osi zot bezwen kapab vwar sa finansman pou okip sa kous popilasyon.

En lot defi Mr Speaker, se lentegrasyon teknolozi dan nou fason travay, ki nou annan

ankor bokou pou fer. Mon krwar ki Sesel i bezwen e i kapab fer bokou plis pou nou fer sir ki tou nou sistenm dan Servis Piblik i vin lo en baz nimerik. Sa i vedir ki nou pou kapab met papye dekote, e fer tou prosedir vin bokou pli senp. Bann biro i ava Vwar pli fasil pou partaz lenformasyon dan en fason elektronik. Biznes i ava trouv zot pe ganny laprouvasyon pli vit, e formalite a ganny klersi dan detrwa minit e non pa dan detrwa semenn.

Mon krwar sa i bann defi enportan ki nou bezwen adrese o pli vit posibil pou ki nou pei i antre dan sa nouvo faz devlopman. Kot Seselwa i ava vwar sa vre lefikasite e kot nou ava met nou lo menm lesel modernite kot bann pei devlope pe montre ozordi. Si nou travay dan sa direksyon nou pou vwar en Sesel bokou pli prospere e ankor enn fwa nou pou kontinyen ranport bann tit bon performans lo nivo mondyal.

Mr Speaker, lalit kont drog i merit reste enn nou pli gran priyorite. Espesyalman bann drog ki pe antre dan nou pei, akoz sa i en menas pou nou lafors travayer e nou bann zenn ki pe leve.

Nou ankor vwar en kantite dimoun ki alinyen tou le bomaten pou al pran

*methadone* e sa Mr Speaker i montre ki mannyer drog pe afekte nou sosyete. Resaman nou'n vwar sa dokimanter *BBC* ki'n ganny prodwir lo drog dan nou pei e pe montre zistans ki sa problemn in arive.

I pe estimen ki 10poursan nou popilasyon in ganny afekte ek drog. Savedir dan sak 10 Seselwa, i annan en dimoun ki'n ganny afekte ek drog. Mr Speaker, sa i soka e menm si Gouvernman *LDS* in erit sa problemn, i enportan ki nou rod solisyon pou sa problemn.

Mr Speaker, i enportan ki nou esey reabilit e tret bann ki'n ganny afekte pou zot kapab re entegre e kontribye pozitivman dan devlopman nou pei. Mon lans lapel pou nou annan bann program nasyonal ki target nou bann zenn pou kontinyelman edik zot lo danze drog lo nou lasante e lenpak lo zot karyer, lo zot fanmir. E ki mannyer sa sibstans i kapab detri zot lavenir.

Nou bezwen vwar plis program ledikasyon, ki tous diferan platform ki zenn i enterakte avek, tel koman rezo sosyal, televizyon, radyo e osi lo nivo lekol koumsa nou ava kapab ogmant lefikasite bann program. Annou servi bann zenn pou pas mesaz

prevansyon ek lezot e ki kapab enspir zot bann zanmi. San bliy bann paran kot lakour. Zot osi zot annan en rol enportan pou zwe dan edik zot zanfan.

Sa problemn i enn ki tous pei antye e alor, nou tou nou bezwen donn en koudmen e non pa ekspekte zis Gouvernman ki pou fer tou. La mon pe lans lapel ek landrwa travay, landrwa rekreasyonnel, tel ki *bar*, *nightclub*, kot nou kapab servi sa bann loportinite pou nou pas mesaz ek sa bann lodyans. Akoz si nou pa zwenn ansanm pou redres sa problemn, nou lekonomi e pei antye pou ganny afekte.

Mr Speaker, mon ti a osi kontan fer enn de remark lo nou Lafors Lapolis. Premyerman mon'n vwar progre dan zot fason travay e pou sa mon ti a kontan felisit zot. Nou'n vwar bann larestasyon pe ganny fer bokou pli vit e nou vwar reaksyon pou donn lenformasyon ek manm piblik pe ganny fer vit.

Me Mr Speaker, mon pou osi kontinyen demande ki nou devret annan plis prezans Lapolis dan nou kominote e dan lavil koumsa manm piblik a santi zot an plis sekirite ek bann zofisye Lapolis ava kapab enterakte avek kominote pli byen. Sa i kapab ede pou redwir

bann bagar, krim e vyolans ki nou'n tande ase souvan pandan sa bann dernyen semenn. E kot nou'n vwar bann zouti pe ganny servi pou bles kanmarad. Sa i ase alarman pou en pti pei parey Sesel, kot nou'n vwar zenn ki'n perdi zot lavi.

La Mr Speaker, mon ti a kontan lans en lapel avek tou bann paran kot bann lakour pou zot asize e koz ek zot bann zanfan lo bon savwar viv. Akoz se kot lakour ki nou komans edik nou zanfan, Mr Speaker. Nou kominote i merit en landrwa kot i annan lape e larmoni e non pa vyolans ek krim.

Pou konklir Mr Speaker, mon ti a kontan remersye sa Gouvernman dirize par Prezidan Wavel Ramkalawan pou sa bon performans pandan sa dernyen lannen. Nou pei i lo en bon semen, me lemonn ozordi i annan bokou enstabilite e byensir sa afekte tou pei, enkli bann pti zil parey Sesel.

Me se akoz nou annan en Prezidan ek en Gouvernman ki serye, ki fer tou desizyon baze lo realite lavi ek sityasyon ekonomik ki devan li, Sesel in kapab eparyn li ek bokou malez ki lemonn pe fer fas avek.

Mon profite pou remersye tou dimoun dan Gouvernman,

nou Prezidan, Vis-Prezidan, nou bann Minis ek tou larestan travayer Sekter Piblik ki pe vremen donnen e pe fer marse sa Gouvernman. E pe met pei avan tou.

Mon oule profite pou osi remersye tou biznes dan Sesel ki pe ed nou moter lekonomi. Akoz se zot sa sekter enportan ki donn bokou lanplwa e kontribye dan reveni nou pei. Mon oule osi remersye Zidisyer pou gard lazistis dan pei e mon konnen ki dimoun i annan konfyans dan sa sistenm.

Mon osi oule remersye ou menm Mr Speaker e tou bann Manm koleg Onorab. Madanm Clerk ek son Depite ek tou travayer Lasanble pou sa bon travay ki nou fer ansanm. Mon oule osi profite pou remersye DA Anse Etoile, Mrs Shirley Mussard ek son tim dan Ladministrasyon Distrik Anse Etoile. Ansanm ek mon *clerk* Mrs Doreen Dugasse, pou sa bon travay ki pe ganny fer pou nou distrik.

San oubliy tou zabitan Anse Etoile, mersi pou zot sipor ki zot ankor pe kontinyen donn mwan pou nou kapab vwar plis devlopman dan nou distrik. Mon priye ki Bondye i ava kontinyen gid nou Prezidan ek son lekip pou fer bann bon

desizyon dan lentere pei ek son zabitan.

Mon demann pep Seselwa pou osi kontinyen travay dir pou anmenn nou pei pli devan e annou montre sa respe pou nou fre ek ser Seselwa. Viv byen dan kominote, ansanm nou kapab fer li. Mon priye ki lannen 2023 i ava anmenn plis boner pou tou Seselwa e ki Bondye i ava kontinyen protez nou pei. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Romain. Nou pou pran *break* aprezan parske nou'n termin en pe pli boner ki nou ti'n prevwar, me i pa grav nou ava kantmenm sa retournen 4er.

Nou ava pran ankor 2 entervenans pou nou termin nou lazournen travay pou ozordi.

Donk nou ava rezwenn 4er. Mersi.

**(BREAK)**

**MR DEPUTY SPEAKER**

*Welcome back.* E bonn apre midi ankor enn fwa. Nou kontinyen avek nou sesyon travay pour ozordi. Nou dernyen erdtan, nou annan ankor de entervenans lo lalis pour kontiny zot repons pour

Mesaz Prezidan lo Leta Lanasyon. Nou ava apel Manm Elekte pour distrik Beau Vallon. Onorab John Hoareau.

**HON JOHN HOAREAU**

Mersi Mr Speaker. Bonn apre midi Mr Speaker, bonn apre midi tou koleg. Bonn apre midi tou koleg e tou dimoun ki pe ekoute dan lakour. E bonn apre midi spesyal pour zabitan Beau Vallon.

Mr Speaker, Ladres Leta nou Nasyon par Prezidan i enn ki pou mwan, in meyer depi ler in ganny sa manda pou diriz Sesel par lamazorite pep Seselwa. In en Ladres ki'n ensit bokou zabitan mon distrik pou *call* mwan e dir mwan felisit Prezidan pou *être* fran, e pou tous tou sa bann pwen enportan e ki dekrir vre leta nou pei. Sa i montre ki Prezidan i reste konekte avek son pep e i annan son ledwa lo pou son pep.

Mr Speaker, dan mon repons, mon pou donn mon reaksyon lo detrwa pwen ki Prezidan in fer, e ranforsi serten prensip e vizyon *LDS* ki sorti dan nou manifesto. Sa kontra ki nou parti in fer avek sa pep anba tenm "Sesel pour tou son zanfàn".

Mr Speaker, mon pou konmans mon lentervansyon

avek leta nou Servis Piblik. Lo paz 14 nou manifesto nou'n promet pou retir politik, remet profesyonnalizm e lantrennman, akseler devlopman platform nimerik, parmi bann transformasyon ki nou'n konmanse.

Lo kote profesyonnalizm e lantrennman. Gouvernman in transform Lenstiti Guy Morel konman en *Public Service College*, kot bann kour pe kontinyelman ganny fer pou adres demann e legzizans dan Servis Piblik. Lo kote *e-government*, bokou platform nimerik pe ranplas *files*, papye par egzant lopital in konmans servi *Health Information System*.

Target se le 30 Zen sa lannen kot tou servis Gouvernman pou'n fini vin nimerik. Sa pou ogmant nou *ease of doing business*, an rezilta atrakte plis *foreign direct investment*.

Mr Speaker, malgre tou sa zefor, leta nou Servis Piblik i reste pli gran sours dezapwentman pou bokou dimoun. Vi ki nou napa resours natirel apard pwason ler i ariv lo nou port, nou resours imen i reste nou resours pli enportan, pou nou kontinyen zer reveni atraver tourizm e lezot servis pou fer marse nou pei.

I pa drol alor ki bokou dimoun i travay dan sekter servis, swa Gouvernman swa dan prive. Etandonnen ki sa i le ka, ou kapab annan teknolozi pli bon e pli meyer. Me si nou *civil servant* pa pe delivre teknolozi pa pou abouti.

Nou lendistri servis i bezwen enn ki o nivo, performan, efektiv e ki reponn legzizans sa kliyan ki pe peye. Ki swa Seselwa ou etranze. Malgre nou pe bouz rapidman avek devlopman teknolozi nimerik, sirtou dan sekter servis finansyel e biznes enternasyonal. I malere pou dir ki *mindset* bokou dimoun ki sa Gouvernman in erite dan Servis Piblik i bezwen sanze. Mon le dir tou bann bon *civil servants*, tou bann bon *civil servants* profesyonnel, ki zot pe azir dan en fason profesyonnel e ki les bonn konplezans diriz zot travay, bonn kontinyasyon e kit sa bon lespri pozitiv.

Tandis ki pou bann ki pe trenn lipye, e lipye i lo fren parey Prezidan i dir, mon ti a kontan ki zot pran konsyans ki zot pa pe travay pou nanryen. Zot pe resevwar en lapey tou le lafendimwan pour zot delivre serten fonksyon pou sa pep atraver larzan *tax*.

Desanm lannen pase, ou boner sa lannen zot tou zot in

benefisye avek en trezyenm mwan saler. E byento apartir Avril, tou travayer pou ganny en 10poursan logmantasyon. Get byen lekel ki pe met larzan dan zot pos. Avan zot met zot lipye lo fren mazin byen sa dikton Kreol ki dir “ *le conseiller ce n’est pas le payeur* ”.

Ler ou annan move zerb dan ou plantasyon ou bezwen derasinen pou ou bann lezot plant pous byen. Sa ki’n dir zot pez fren e fer dimoun fristre, pa pou la pou donn zot en lapey ler zot pou ganny zot let remersiman. Akoz Prezidan in determinen plis ki zanmen pou li met en lord enn fwa pou tou dan Servis Piblik. *LDS* in touzour krwar dan travay dir e responsabilite dan travay. Pou bann ki pe konsey bann *civil servants* pou sabotaz pei. Mon oule dir zot ‘*shame on you!*’ parey zot koleg in dir zot. Akoz lepep pou ziz zot par zot aksyon e pini zot ankor en santans 5an dan Lopozisyon an 2025.

Mr Speaker, souvandfwa konman politisyen, nou pa donn ase latansyon e lenportans sa pilye fondamantal en sosyete ki permet nou pep epanouir, emansipe e entegre dan sa vilaz global. Sa pilye ki mon pe refer lo la se ledikasyon.

San en sistenm ledikasyon ki performan, modern, vize ver lavenir, i pou enposib pou nou akonpli nou rev pou fer Sesel vin en model pou tou bann Pti Leta Zil. Setadir bann pti zil ki souvandfwa i annan en lekonomi vilnerab par rapor avek son izolasyon fizikal, son groser e lefe ki zot napa preski ditou resours natirel parey mineral, petrol ou lezot.

Leta nou ledikasyon i montre ki’n annan bokou progre tanzib anba Ladministrasyon *LDS*, ki menm lo nivo enternasyonal, *World Bank* in rekonnet atraver raport lo *Human Capital Index*. En mezir ki montre ki kantite resours par tet zabitan en Gouvernman i mete dan Lasante e Ledikasyon relye avek devlopman en zanfan ziska i vin en profesyonnel. Sesel nou’n sorti pli o dan Lafrik, e pozisyonnen 43enm lo 157 pei dan lemond.

Gouvernman pa’n aret la. Anviron 300 etidyan dan 17 pei pou ganny en logmantasyon 10poursan lo zot *stipend*. Sa i reflekte ankor plis lenvestisman sa lannen lo lazenes e nou resours imen. Sa i en gran sikse. Me malgre sa, i ankor annan ankor bokou defi dan Ledikasyon.

I malere pou vwar ki bokou zanfan pa pe viv zot lanfans, en staz lavi kot zot devret pe pran lentere pour aprann e dekouver labote e leksitasyon konesans. Problem konportman dan lekol an zeneral i pa a en nivo ki fer latmosfer laprantisaz dan laklas ideal.

Pou re dres sa sityasyon, fodre sa twa mayon dan sa relasyon triparti i zwenn. Setadir, ant lekol, paran e zanfan i marse. Paran i bezwen zwe son rol pou donn tou sipor neser son zanfan, lekol i bezwen donn formasyon e lesan ki kit lentere motivasyon zanfan. E a son tour zanfan i bezwen develop en kiltir serye ver son letid, respekte son *teachers* e son bann koleg.

Mr Speaker, statistik ozordi prodwi par *NBS* i montre en to fertilite adolesan, 63 nesans pou sak mil adolesan.

Me sa ki pli enkyetan Mr Speaker, se sa anviron 500 *abortion* tou-le-z-an ki arive. Prenon kont ki bokou plis i kapab pe ganny arive ilegalman e pa pe ganny raporte. I fer ki i touzour reste en defi mazer pou nou edik nou zenn adolesan lo lasante seksyel e pou konvenk zot pou swazir opsyon letid olye sex san proteksyon a en tre zenn az.

Mr Speaker, menm Levek Katolik in fer en demann spesyal avek Zidisyer a lokasyon louvertir Lakour, ki bokou plis dimoun i devret ganny anmennen devan Lakour e lo sa size lansentman anba laz. Vi ki rarman ou tande ki aksyon legal ki'n ganny pran.

Sa ki pli sagrinan se sa group adolesan ki tonm ansent e ki pa kontinyen zot letid. Souvandfwa san en siport familial e sosyete, zot tonm dan sa serk visye kot war zot dan prostitisyon e dan drog apre nesans zot premye zanfan.

Prenon kont ki zanfan ki pe ne san en striktir familial, i osi annan en gran sans pou zot a zot tour, vin bann ka sosyal e laplipar zot i pri dan sa serk visye e tonm dan drog. Sa ki nou'n vwar, serten ka kot manman e zanfan dan menm fwaye pe servi drog. Sa serk visye i annan potansyel pou pouri en sosyete.

Mr Speaker, bann sityasyon koumsa pe vin tro komen e nou bezwen rod en fason pou redrese moralman koman en Nasyon. Setadir, sa se pa zis problemn Gouvernman, me i en problemn sosyete ki demann en konversasyon nasyonal ki Seksyon Lafanmir, Minister Ledikasyon, *NGO* e lepep li

menm i bezwen angaze. Nou devret oriyante ver solisyon dan nou lapros, olye zis blanm kanmarad.

Mr Speaker, mon oule siport zefor ki nou Lafors Militer, Lord e Lape pe fer pou premyerman konbat proliferasyon drog ilegal e krim maritim organize dan larezyon. Sa Ladministrasyon in fer ki son seval batay pou anmenn en lalit asarnen kont drog. Lannen pase Lapolis e *Coast Guard* in fer plizyer lasezi, ou detri plizyer tonn drog lo lanmer e entervenir trafik imen kot in retourn ek nou frer Seselwa ki ti'n ganny mete lo dav konman garanti.

Zot in osi ede, tir lapes ilegal dan nou lanmer. Malgre tou sa zefor, ki pe kout Gouvernman annan de fwa plis ki en R1milyon pou deplway bato, avyon e lezot resours militer zis pour en sorti, sa pwazon pe kontinyen rantre dan nou pei.

Konsekans, se ki bokou bann zanfan i ankor pe mor avan zot selebre zot laniverser 25an avek maladi, relye avek adiksyon drog. Oubyen dan bann bagar kot la vyolans i ganny servi oubyen menm ou tande ki zot zis in disparet san latras.

En laz e letan dan zot lavi kot sa bann zenn ti sipoze pli

prodiktiv e pe kontribye dan lekonomi pei a zot tour pe konmans en fanmir. Zis mazine si sa anviron 6 a 7000 zenes ki adikt ti pe pran en travay formel, ki kantite benefis ti pou anmennen pou pei?

Premyerman, nou ti pou redwir nou depandans lo travayer imigran. Dezyenmman, nou reveni *tax* ti pou ogmante ki vedir plis larzan pour ledikasyon, pou lasante, lakaz eksetera.

Trwazyenmman reveni Fon Pansyon, ti pou ogmante e petet ti pou napa nesosite pou ogmant larz pansyon pour sorti 63an pou vin 65 an. Me ki nou vwar?

Ozordi, nou pe vwar bokou paran pe pler larm disan akoz zot zoli pti garson, oubyen pti fiy ki zot in donn nesans pa tro lontan, pe vitman vin en mandyan, voler ou en prostitye e finalman en zonbi e lesklav sa pwazon.

Sa bann adikt in vwar zot pri dan en lemonn fantezi e dezespar. Tandis ki sa bann gro *dealers* pe aste *power boats*, *jet ski*, gro lakaz, plizyer loto, e pe montre lo *Facebook* ki manner zot depans larzan dan lotel *five-star* Sesel e aletranze.

Malerezman, bann program tretman pou adiksyon e reabilitasyon dan lepase pa'n



tro byen marse. Akoz in annan tro bokou manipilasyon politik par sa gro garson ki ti ansarz zot, ki ti ansarz zis pou li akonpli son lanbisyon politik.

Mr Speaker, menm pandan kanpanny eleksyon, nou'n vwar ki en parti politik in servi bann aktivis pou donn drog bann adikt, zis pou ganny vot. Si ozordi nou pei i koumsa, nou premye lo litalizasyon drog par tet zabitan, se gras a zot. In arive anba zot *watch. Shame on you! Comme* dir nou konfrer Simon.

Se zot ki'n gat lavenir sa zenerasyon ki malerezman ozordi i leta serten nou lazenes. Mon le akeyir lanons ki Prezidan in fer kot in donn son garanti, ki avek sa don sorti kot enn nou zanmi Emirat Arab Ini, en nouvo sant reabilitasyon pou ganny konstri.

Dan nou manifesto lo paz 27 nou'n promet sa pep, ki nou pou met an mars en reabilitasyon efektiv, ki plis ki zis tretman *methadone*. Fotespere, avek en bon program konsey, mon konvenki ki bokou plis adikt pou reganny lespwar e pran legzanp parey Mr Faddy Bannane.

Fodre ki osi nou rekonnet ki problemn drog i annan en *corrélation* direk avek lapovrete. Mr Speaker, ankor mon oule fer

en pledwari avek nou pep, ki sa lalit pa pou zanmen abouti si nou koman en pep nou pa ede. Annou fer en ve pou nou denons drog e ed Lotorite detri sa fleo.

Annou pran letan pou fer konpran nou zanfan, nou lazenes ki selman atraver ledikasyon, formasyon ki swa akademik ou vokasyonnel e atraver travay dir, ki nou pou sorti dan lapovrete e ganny ase larzan pou elev nou fanmir, e elev nou standard lavi.

Se selman ler ou leve bomaten e ou dir ek ou lekor, ozordi mon pe al travay pou anmenn dipen lo latap, ki ou lavi pou amelyore e ou pou santi en lakonplisman. Ou lavi pa pou amelyore atraver mont en pti *scooter* ki ou servi pou al delivre drog. Akoz zour ou pou ganny atrape ou pou al poze Montanny Poze.

Mon le osi adres bann *dealers* e dir zot ki in plis ki ler pou aret anmenn sa pwazon Sesel. Met zot 1 ou R2milyon ki zot annan dan en biznes prop olye pran ban risk pou fer vini drog. Akoz zot osi si zot ganny atrape to ou tar, zot pour perdi tou zot byen mal aki e zot pour fini zot letan Montagne Poze.

Par kont i annan bokou *success stories*, kot mon le felisit serten lazenes ki'n fer

nou pei fyer dan zwe *CJSOI* e in ranport meday pou Sesel. Bann zenn syantis ki'n partisip dan konpetisyon enternasyonal pou *Robotics* anba gidans *NISTI*.

Bann zenn antreprenner ki'n develop bann platform nimerik pou *booking* lotel, parey *Seybooking.com*, e lezot ankor.

Mr Speaker, Prezidan in osi pas an revi bokou devlopman ki'n arive oubyen pou arive dan sa lannen. Mon sir ki nou lazenes pe akey, nou bann lazenes ki aktiv dan sport pe akeyir sa bann devlopman e redevlopman *Palais de Sport*, Stad Linite e lezot sit sportif parey Anse Royale. Preparasyon pou *Jeux Des Iles*, *Open Sea World Swimming* ki pou fer ankor Beau Vallon Sa lannen, pli tar an 2025 osi kot nou pou *host* zwe *CJSOI*, osi *World Beach Soccer Games*

I osi annan en langazman pou fer 80 *unit* lakaz Barbarons; konstruksyon en nouvo Lopital Sesel; renouvle nou Libreri Nasyonal e en nouvo sant lasante e Lekol La Digue. Menm si *MNA* ti fer petisyon kont sa.

Nouvo Lasose Ero Praslin e La Digue. Be sa msye pa pe travay? Sa ki pa vwar tousala se li ki pa anv vwar. Petet akoz sa semiz rouz konman lasos tomat i blok son vizyon, oubyen akoz

son louveraz i zis eksite ler i vwar bann madanm parey i dir dan son *speech* pou Lokazyon Zournen Bann Madanm.

Mr Speaker, mon oule osi profit sa loportinite pou mwan dir ki konman Manm Elekte Beau Vallon ki mon pa satisfes avek nivo *community policing* dan mon distrik. Mon fondamantalman krwar ki Lapolis lo teren, olye dan stasyon i fason pli efektif pou anpes krim e donn konfyans nou zabitan.

Mr Speaker, mon vwar ki depi Stasyon Lapolis in ganny klimatize, ou menm nepli vwar bann gard ankor deor pe zet en regar. Ozordi mon le lans en lapel spesyal avek Komandan Lapolis dan mon distrik, pou nou travay ansanm lo en plandaksyon pou ede avek bann kriminalite dan distrik. Mon konnen ki sa i swe bokou mon bann lezot Manm isi dan Lasanble. E mon konfidan ki sinerzi ant nou de lofis pou anmenn bokou plis solisyon pou nou distrik.

Mr Speaker, mon oule osi akeyir lanons ki Prezidan in fer lo devlopman sit bazar labrin Beau Vallon. Fodre fer remarke ki sa landrwa i pres ek mon leker, akoz se mwan ki'n persyad Prezidan Faure pandan mon manda presedan pou aste

sa propriyete pou fer devlopman pou zabitan Beau Vallon.

Byento zabitan Beau Vallon pou benefisye avek en nouvo fasilite *indoor sports* ki pou menm pli o lo nivo bokou pei dan larezyon. En lantreprenner in osi pare pou *sponsor* environ R15milyon, pou fer tou bann lenfrastruktir pou bann vander.

Mon le profite pou demann korperasyon tou bann vander ki deza la lo sa sit, ki ler devlopman i konmanse pou sed la plas apre zot a retournen. Devlopman Stasyon *Cable Car* ki pou sorti Beau Vallon pou lavil an pasan par Mont Sinyal i lo staz final *ESIA*, (*Environmental Social Impact Assessment*)

En devlopman kot environ \$40 milyon pou ganny depanse dan sa landrwa. Si mon pa tronpe, i pour enn premye dan larezyon. E nou'n ganny garanti ki si tou i pas byen, dan 24 mwan i pou an operasyon. Sa pou anmenn en lelan touristik e osi rezourd bokou problemm konzasyon trafik lo semen Beau Vallon Saint Louis.

Pou terminen Mr Speaker, mon oule fer resorti ki Ladres Leta Lanasyon ki Prezidan in fer, i enn kot Prezidan in koz ek

son pep fran e onnet. In met lanfaz lo bann keksoz ki son Ladministrasyon in fer, pou byennet Seselwa. In koz lo serten latitid dan travay ki devret sanze e donn direksyon e solisyon.

Mon konnen ki sa pti group semiz rouz, kravats nwar in vreman dezapwente. Zot in dezapwente aköz zot ti krwar ki ler zot ti kit *State House* avek en kof vid san en stratezi e vizyon konman pou refer lekonomi, kot tou lenfrastruktir ti pe tonm an rin, saler pa ti pe garanti, erport ti'n fermen, e pei ti parey en kales kase, ki *Father* avek son lekip ti pou *fail*.

Tandis ki zis dan 2an Gouvernman formen par *LDS* anba *leadership* Wavel, John, Charles Ramkalawan, sa pei in pran en plas pli o lo podyonm enternasyonal e sa pep pe rezouir en standar lavi *high income countries*.

**(APPLAUSE)**

### **HON JOHN HOAREAU**

Wi pa tou ki'n mars byen. I annan keksoz pou amelyore. Nou bezwen pran plis ka avek bann dimoun ki pe ise pouse pou fer de bout zwenn. E annan serten kous popilasyon ki nou bezwen atrap zot lanmen e

donn zot serten lasistans pour zot epanouir.

Determinasyon e volonte politik i la, fodre ki nou met nou lakaz annord. Kot fodre nou fer li, nou a fer li dan lentere Sesel, avek bi pou pa kit personn deryer e annan plis progre.

Me zot lo lot kote latab napa okenn zot ki kapab donn nou leson. Sel leson dan zot kaye, se konman pou fer faid pei e met larzan zis dan zot prop pos.

**(APPLAUSE)**

**HON JOHN HOAREAU**

En leson ki zot in servi de fwa, pandan letan ki zot in o pouvwar. En leson ki nou, nou pa enterese pou aprann. Mr Speaker si pa *LDS* dir mwan lekel?

**(APPLAUSE)**

**MR DEPUTY SPEAKER**

Mersi Onorab Hoareau. In ariv ler pou nou pas aprezan lo prosen entervenans, Manm Elekte pou bann Zil Pros, Onorab Uranie.

**HON ROCKY URANIE**

Mersi Mr Speaker. Bonn apre midi tou koleg Onorab, tou zabitan Zil Pros, frer, ser telespektater. I regretab ki

Prezidan pa'n fer en diskour Leta Lanasyon ki donn laklerte sa pep, me plito enn ki'n servi pou tir son fristrasyon.

Mr Speaker, permet mwan eksplik sityasyon Zil Pros. Lasose Praslin in fini fer son louvertir e byento La Digue osi nou pou vwar louvertir premye faz nouvo lasose. E osi komansman dezyenm faz ki pou fasilite tou bann operater Digwa, viziter e piblik an zeneral ki servi sa por. En proze ki nou Gouvernman ti'n fini met larzan a dispozisyon. Mon swete ki bann konsern ki fezab, ki zabitan Digwa ti fer resorti i ganny adrese e ki nou pa vwar nou avek bann defayans ki kapab kout nou bokou pli ser dan le fitir.

Mon enplor Gouvernman ki lasose pa anmenn en kou ki pou fer kou lavi lo nou zil vin pli fermal lo kominote Digwa ki i deza ete la. Akoz la deza i tre fermal. Bato pasaze, pri in deza ogmant tre o, e sirtou pou nou Digwa ki bezwen akse bann servis gouvènmantal lo Mahe oubyen Praslin. Nou sibir bokou, alors mon pe senserman demann Gouvernman, pou angaz li dan bann konversasyon tre serye avek bann operater, pou fer ki annan en balans. Koumsa nou tou nou ava benefisye.

Bann operater bato, mon konnen zot osi zot annan zot bann depans. Alor, mon ti ava apresye si zot zwenn avek Gouvernman pou bann diskisyon pli meyer solisyon, pou ede anmenn bann pli meyer solisyon pou nou zabitan, ki nou pa ava santi sa gro lenpak lo nou zil La Digue e osi Praslin.

Konstriksyon nouvo blok lekol La Digue. Wi, nou bezwen en batiman pli modern. Me eski Gouvernman i vreman pe get fonksyonman sistenm ledikasyon? Mankman *teachers* ki zot pa'n *recruit*, pourtan nou ti vot larzan pou *recruitment*, me larzan ti retourn dan kof Leta, e de la en presyon enorm lo nou bann *teachers* pou zot delivre. Mank materyo de baz e plizyer lezot problem ki pe fer paran, ansennyan, fristre e osi fer Prezidan fristre. Be lekel ki o latet pou tir sa fristrasyon sa pep? Aret zwe avek Seselwa. Aranz lavi nou pep parey zot in aranz zot silvouple.

I toultan en plezir pou nou bann zanfann lekol, bann ansennyan, paran e piblik an zeneral, zwir nou bann fasilite sportif ki lo nou zil. Nou ti ava swete ki bann aktivite sportif parey konpetisyon atletik skoler, bann *match* futbol, *volleyball*, i kontinyen ganny fer

lo nou zil, pou nou zabitan apresye nou bann talan, e motiv lezot pou fer en aktivite sportif pou devlopman zot potansyel.

Ki plan reparasyon laplenn? *Court tennis, court volleyball, fencing* kot nou *sport complex* La Digue? Kan eski nou bann tim futbol pou kapab zwe *match home* kot nou lo laplenn silvouple? Si zot ti napa en plan reparasyon pare, akoz zot in pran sa kalite desizyon? En fristrasyon ki zot ki'n kree.

Nou'n vwar louvertir en nouvo *gym* ek bann lekipman modern par en biznes prive. E la mon dir mersi Mr Rodney Henriette. E sa i a ede retir bann zenn dan bann move lenfliyan. Se sa kalite ki oule vwar. Alor la mon oule lans lapel avek bann biznessmenn pou siport bann linisyativ sportif. E la petet zwenn bann lekip e ofer plis sipor, sirtou finansyel pou ede kit sa bann lekip an mouvman avek bann deplasman, ki kout zot tim bokou. E menm bann siporter pa kapab akonpany zot lekip, akoz zot napa le mwayen pou al regard bann *match*, akoz tou bann *match* i zwe Praslin oubyen Mahe.

Minister pou spor NSC, i bezwen vin eksplik nou bann lekip ki retar e ki direksyon zot

anvi pran pou ede tir fristrasyon ki zot ki'n kree?

Mr Speaker, nou bezwen annan plis lofis bann servis gouvènmantal lo La Digue, pou ki nou zabitan i kapab ganny plis akse ek lenformasyon e leksplikasyon pou ed zot dan zot bann demars an relasyon ek servis e Polisi Gouvernman.

Servis Gouvernman i bezwen vin konsistan e byen kordinen. Pa fer zis en sel dimoun dan en Servis Piblik, deservi nou distrik. Prezan si sa zour i malad, napa ranplasan pou li e Digwa i ganny retar dan zot demars. Ganny dir kekfwa lot semenn.

Apre, pa bezwen ariv lo bato 9er45 bomaten. Komans travay 10er e midi zot bezwen ale pou ganny bato e Digwa pa ganny servis ki zot merite. Pa bliye ki bann anplwaye i bezwen demann son anplwayer, enn ou 2ertan *release* pou al akse servis Gouvernman pou zot tranzaksyon. Si sa zour i pa ganny asiste, i pou bezwen al rod *release* ankor lot semenn. Letan i presye, i ganny gaspiye, e sa i rann nou zabitan fristre.

Oli *leadership*? Oli bann Sef pou sirvey travay zot departman? Fristrasyon ki zot menm zot in kree.

Mr Speaker, la lo menm laliny, si en zabitan dan en

fason irzan i bezwen fer son tranzaksyon marse, i napa swa, me i pou bezwen desann Mahe. E la, i pou bezwen vwar *minimum* R1000, akoz zis tiket pli ba pou transportasyon sorti La Digue-Mahe e vis versa, i kout R660. San prenon kont lezot lozistik parey manze, delo, *taxi* e bann dokiman ki annan *processing fee*. En kou enorm lo saler malere.

Nou pa inyoran. Nou konpran zeografikman ki i pa fasil pou fer tou keksoz menm pri lo La Digue parey lo Mahe. Me Gouvernman i kapab anmenn plis servis pli vit, pli konsistan, pli afordab, pou nou zabitan Zil Pros. Alor, tir fristrasyon ki zot in kree.

Bann zournalis ki pe ekout mwan, ozordi napa en Gouvernman ki pli per laliberte lekspresyon ki Gouvernman *LDS*. Zot ti dir zournalis fer lenvestigasyon, demann kestyon, pa per pou fer zot travay. Me ki nou vwar? Si sa ki ganny raporte pa dan zot faver, oule fer nou krwar zournalis i lalang. Zot pe rod tou fason pou entimid medya pou zot pa fer zot travay libreman. Nou dan *US* nou pe dir avek bann zournalis, pa per, kontinyen fer zot travay pou asire ki laliberte lapres i ganny respe ki i merite.

Dimoun ki'n ganny ase

avek lenkonpetans sistenm ozordi i mont lo *Facebook* e lezot platform medya sosyal pou plenny zot douler e montre zot mekontantman e fristrasyon. La osi zot oule rod tou fason pou anpes sa bann dimoun koze. Les zot menm, zot *bann* dimoun lo *Facebook*. Zot pe rod tou lipou ek sa pep ki ankoler e fristre aköz bann fristrasyon ki zot ki'n kree.

Seselwa, annou demande lekel ki ti komans fer tou sort demagozi lo medya sosyal? Si pa ti *LDS* letan zot ti dan Lopozisyon? Zot ti ankouraz tou kalite fason maltret dimoun e Gouvernman lepase mannyer zot ti anvi. Zot ti kapab fer li aköz nou Gouvernman *US* ti les lapres lib. Sirtou medya sosyal, pou zot zwir sa vre demokrasi e zot drwa pou eksprim zot lib.

Si zot ti oule pouvwar, Si zot ti oule pouvwar, me zot pa ti oule sa demokrasi, alors silvouple, *step down*, les nou...

**(APPLAUSE)**

### **HON ROCKY URANIE**

I fermal pou zot vwar bann mesaz e *video* kot sitwayen Seselwa pe eksprim zot dezapwentman e mekontantman ki fer zot fristre. E alor la zot pou oule menas dimoun ki fer li. Seselwa pou

kontinyen koze, aköz preski 3an zot o pouvwar zot pa pe kapab delivre lo zot bann promes. E sa i rann Seselwa fristre.

Ler zot pa kapab delivre lo zot promes, zot target e ensilte travayer ki pe donn tou pou ed nou fer pei marse. *Leadership* i fay, napa direksyon. Alors bann Minister e departman zot konfize. Zot pa siport kanmarad e pa konnen kote zot pe ganny antrennen avek bann move desizyon ki sanze dizour o landmen, zis aköz zot in vwar en komanter lo medya sosyal. E dela zot reakte.

Sa sityasyon i montre ki zot napa prensip, aköz medya sosyal pa devret fer ou vatevyen lo ou desizyon si ou vremen krwar dan sa ki ou pe enplimante. Zafer i vremen sal e an dezord. Alors, i pli fasil blanm pti travayer pou protez lenkonpetans Minis e *leadership*. Donn lenpresyon ki bann travayer e en serten parti politik ki'n met lipye lo fren. Non mon bann kanmarad Seselwa, pa krwar sa. Sa i aköz bann Minis pa konn drive *manual*. Zot ti krwar tou keksoz pou otomatik.

Mwan e tou mon koleg dan *US*, nou oule vwar Sesel pe bouze, Seselwa zwaye dan nou pei, fyer partou kot nou ale.

Alors, aranz lavi nou pep silvouple. Fer desann kou lavi parey zot ti promet Seselwa, sirtou nou bann zabitan Zil Pros. Kou lavi in defons plafon e nou pe zis anpar son soufrans ki met lo nou.

Premye konversasyon ki en gran aktivis *LDS* ti dir mwan ler ti zwenn mwan La Digue, son parol mon site "Onorab, ki mannyer zot viv isi, be keksoz tro ser?" Mon retir sitasyon. Mon ti dir li, "Be ou Sef ti promet nou pou fer desann. O kontrer, prezan ki ogmante."

Gouvernman i reste silans lo la. Nou ti pe ekspekte li vin dir nou en keksoz lo sityasyon pri lavi pou soulaz nou. Me i pa'n abord sa size ditou. Menm logmantasyon 10poursan pa'n ganny koz lo la. Zafer pa bon. Apre tou sa bann gran diskour lannen pase, eski i vre tou Seselwa pou ganny logmantasyon 10poursan? Sa, Avril pa lwen. *Time will tell.*

Sanzman in arive. Ler dimoun i demande oli sa sanzman, i degize i vin transformasyon. Ler dimoun i demann transformasyon, i degize i vin tranzisyon, e Seselwa pe ganny lanflanmasyon ek fristrasyon.

**(APPLAUSE)**

### **HON ROCKY URANIE**

Blanm travayer, pou sov Minis. En diskour klerman ki pe rod konpasyon sa pep. Zot in vwar ... Lepep in vwar zot dan kler. Zonm ek fanm in fatigue. Pres 3an anba sa kalite Ladministrasyon, keksoz i pli dan mal ki sa 43an. Zot ankor pe esper nou pou donn zot direksyon.

Zot koz lape, linite, rekonsilyasyon. Selman en lape dan sarkastik. En lenvitasyon anmer anver mwan pou vin koup riban nouvo lopital La Digue, en gro batiman. Pa bliye, ki lopital pa vedir *building*, me bann lekipman mendev, latizann, e servis apropiye e efikas.

**(APPLAUSE)**

### **HON ROCKY URANIE**

Sa enn ki nou deza annan i reste vid. I reste vid preski toulezour. Zis dan bomaten ki i annan en pe mouvman. Problenm mankman dan Lopital Santral *Victoria* i definitivman afekte nou lo La Digue. Toudmenm mon tir mon sapo avek nou bann travayer kot lopital Logan La Digue, pou zefor ki zot mete dan zot travay. Mon swete ki zot ganny sipor letan zot bouz dan nouvo lopital. Ki zot kapab delivre



alaoter pou donn sitwayen e nenport ki, ki bezwen en servis lasante.

Malgre tou demagozi, Digwa pa'n zanmen dir i pa oule en nouvo lopital. Digwa toultan in annan konsern avek lokasyon. Alors zot ti fer en petisyon ki zot drwa anba sa demokrasi. Alor, pa bezwen vin anbet personn.

Gro problemm i Lopital Sesel kot travayer i de motive. Mank latizann e lezot nesesite. Ankor la, olye rod fason aranz servis zot pe koz fer nouvo *building*. Napa problemm. Konpletman, zot pa pe konpran sityasyon lo teren. Zot in dekonekte akoz zot annan *allowance*, pou zot kapab al kot prive e aletranze, pou akse meyer servis lasante. Me nou pti malere nou pa kapab.

Byento, renovasyon lo vye kordgard pou konplete. Apre bann desizyon vatevyen ki sa Gouvernman enkonpetan ti pe lager avek son prop lekor, kote pou fer? Finalman, kordgard i ankor menm landrwa. Mon enplor bann travayer Lapolis pou fer zot travay byen, malgre bann lenterferans.

Krim, vyolans in ogmante, e sivilyen pe lager avek gran kouto, *baseball bat* ek tou kalite. Zonm e fanm in vin pli anmer anver kanmarad akoz sa

laenn pil lo li e fristrasyon ki'n ganny kree dan pei. Seselwa napa en landrwa pou zot kapab plenny zot sor e ganny led.

Sityasyon pe fer ki nou pep pe mank rezilyans e motivasyon. E swisid in vin bokou pli aparan koman en solisyon. Dimoun pe viv anba stres enorm, me napa en lanmen senser ki vin ver zot pou gid zot. O kontrer nou pran en sistenm bef dan disab, sakenn vey son lizye. Seselwa i dir zot, in ganny ase e 2025 zot pou definitivman zet anba.

**(APPLAUSE)**

### **HON ROCKY URANIE**

*Drug dealers* in toultan antete. Zot pa fek antete la. Tou Gouvernman in anmenn en lager asarnen kont sa bann dimoun ki dan sa kalite aktivite ilegal. Me selman, ti annan ki ti fer nou krwar ki zot kapab dil ek sa problemm. Zot ti konn tou *drug dealer*. Menm fer konversasyon avek sa bann *drug dealer*. Me prezan ki drog i antre!

Lavyann torti ek zarm nou ti vwar ler pe ganny detri. Akoz sa medya ti ganny envite pou filmen. Me sa 1tonn eroin ki nou pa'n zanmen vwar. Nou ganny dir i 3mil met anba lanmer. Plizyer dimoun lanmen

i ankor lo labous e en pwen kestyon par lao latet, pe ankor demande. Zot pe demann zot lekor ki degre laverite i annan ladan, vi ki drog i ankor pe parwaze dan kanton an gran kantite.

Zot ti koz la transparans, alor oli sa la transparans? Ki lager ki zot pe anmennen kont drog? Gete lekel bann prizonnyen ki pou ganny large premye. Bann *drug dealer*. Kondann en bann, apre larg en lot bann lo serten rezon ki zis en bann ki konnen.

O kontrer, ler mon tann Prezidan dir ki - *sorry*. Mr Speaker, ou konnen ler mon tann Prezidan dir ki i ti kapab zwe lo lans ek son pti zanfan. I pa konnen ki dernyen fwa in al lo lans. I fer mon mazin sa *video* kot sa msye ti dir, i pa ti anvi vin la. Zot pou rann li son larzan.

Ler ou pou *micromanage* tou keksoz, byensir ou pou napa letan pou ou. Ler ou napa bon planifikasyon, byensir pou napa letan pou ou. Personn pa ganny forse pou vin Prezidan. Sa i en swa ki ou'n fer e ou ti anvi. Tou Prezidan i bezwen fer bokou sakrifis e komit son lekor. Sa pozisyon pa enn ki *run* otomatik oubyen lo *auto pilot*. Ou bezwen konn mannevre e

navige. An lot mo, ou bezwen annan kapasite pou dirize.

Aprè tou, Sesel pour tou son zanfan. Kantmenm zot in retir preski tou bann siporter *US* dan pozisyon kle, parey *CEO*, Direkter, Administrater Distrik e dan lezot bann plas *leadership* e ranplase par zot bann prop siporter, zot ankor pe ganny bokou problem pou zot kapab delivre. Savedir, i annan bann move desizyon ki pe ganny pran e ki pa efikas.

Ler zot pa kapab delivre, zot dir sabotaz. Ler *US* ti o pouvwar, dife lo *landfill* ti pran, zot ti dir move zesyon *landfill*. Me ozordi ler zot o pouvwar, dife i pran, zot oule fer nou krwar ki serten dimoun pe fer sabotaz. Aret bat latet dimoun e pran zot responsabilite.

**(APPLAUSE)**

### **HON ROCKY URANIE**

Onor zot bann promes. La ler mon lo promes Mr Speaker, mon le profit sa lokazyon pou re afirm mon komitman anver mon zabitan. Mon pou toultan la pou siport zot dan tou meyer fason ki mon kapab. Mersi pou kontinyen met konfyans dan mwan. An 2025, nou pou rebran nou pei Sesel e montre zot ki mannyer i diriz nou pei. Mersi Mr Speaker.

***(APPLAUSE)***

**MR DEPUTY SPEAKER**

Mersi Onorab Uranie. Onorab Uranie ti dernyen entervenans lo lalis pou ozordi. Donk, nou'n ariv a lafen nou sesyon travay pou sa Merkrede. Nou pou rezwenn demen bomaten 9er pou kontinyasyon larepons bann Manm lo Mesaz Prezidan lo Leta Lanasyon. Mersi, nou ava rezwenn demen 9er bomaten.

***(ADJOURNMENT)***